

Jesu buhedore ïgu apinirã erã iirare wereripũ ãhraa

—*Espíritu Santo arigucumi, arĩnumi Jesu-
cristo ïgu buherãre*

¹⁻² Teófilo, ero core yu gojamuhtarapũ mera Jesu ïgu iirare, ïgu buherare mure weretuhabu. Te amarogue ïgu mariarare weretubu. Jesu ïgu mariaboro core ïgu Espíritu Santo turari mera dorepu ïgu apinirãre. Erã ïgu beyenirã arĩnorã.

³ Eropi Jesu ïgu crusague ïgu sîrira puhru yu-
juyerisuburi dâpucugû dehyoapu ïgu apinirãre.
Cuarenta nari puhru dehyoatupu. Eropigu ïgu
ïgu basi ojocarigu arĩrire ihmupu erãre. Eropa
dehyoagu Goãmu mari Pagu ïgu opu arĩrire õari
buherire werepu erãre.

⁴ Gajisubu Jesu ïgu apinirã mera arĩgu õpa arĩ
erãre werepu:

—Jerusalén ta arĩnique dohpa. “Espíritu San-
tore mure obeogura,” yu Pagu ïgu arĩdigure
corenique. Irire ïgu eropa arĩrare mure
wereabu yuhu.

⁵ Ñu mure waïyegu deco mera mure
waïyemi. Yupu ïgu iira tauro iigura mure.
Espíritu Santo mua mera ïgu arĩniguicãcũ iigura
mure, arĩpu Jesu.

Jesu amarogue mariara

⁶ Eropi gajisubu utãgugue Olivo waicudigugue
Jesu erãre dehyoacũ erã serẽpiñorã ïgure:

—OpɁ, ¿i Israe yebare mari ya yebare dohpárcũ guare dipaturi doreburire apibocuri mɁhɁ guare? ¿Dohpárcũ mari acawererã gohrare opɁ acugɁcuri mɁhɁ? arĩñorã ïgure.

⁷ Erã eroparĩcũ peegɁ Jesu õpa arĩpɁ:

—Mari PagɁ dihta irinɁrire mɁa ya yebare mɁa õaro árĩborore apimasimi. IrinɁrire mɁare masiya mara.

⁸ Eropirã mɁare Espíritu Santo ïgɁ eracũ GoãmɁ ya turarire oparãca mɁa. Iri turarire mɁa oparã Jerusalén majarãre, árĩpehrerã Judea majarãre, Samaria majarãre, árĩpehreri yeba majarãre õari buherire buherãca mɁa yaha árĩburire. YɁ sĩrirare, yɁ masa mɁriarare erãre buherãca mɁa, arĩ werepɁ Jesu erãre.

⁹ Eropa arĩ weretuhaja, Jesu Ɂmarogue mɁria wapɁ. Erã ïgure erã ïhanɁrusia mujucũ imica cururi pohecague ñaja dedere mɁria wapɁ.

¹⁰ Eropirã erã Jesu ïgɁ mɁriagure erã ïhanɁrusia mujurisubu perã anyua boreri suhricurã Jesu ïgɁ apinirã pohro dehyoanugajañorã.

¹¹ Eropirã erãre õpa arĩñorã:

—MɁa Galilea majarã, ¿duhpirã ïhamuju nigu-irã iiri mɁa? Ihĩ Jesu Ɂmarogue mɁriagɁ, ïgɁ mɁriadiro dopa ta dipaturi arigɁcumi daja, arĩ wereñorã anyua.

Jesu ïgɁ apinirã Judare gohrotobure beyeñorã

¹² Eropiira pɁhrɁ Jesu yarã Ɂtãgugue Olivo waĩcudigugue árĩnirã dijari, Jerusalengue duja-jañorã. IrigɁ ɁtãgɁ yuju kilómetro wecañari Jerusalén ejaboro pohro árĩyoro.

13 Dujaja erã ɯmarogue erã árĩri taribugue mæria wañorã. Oã árĩñorã erã: Pedro, Ñu, Santiago, Andre, Felipe, Toma, Bartolomé, Mateo, Santiago, Simo, Juda árĩñorã. Santiagopɯ Alfeo magɯ árĩpɯ. Simopɯ celote waĩcæri curu majagɯ árĩpɯ. Judapɯ Santiago acaweregɯ árĩpɯ.

14 Eropirã bajasuburi oã árĩpehrerã, nome mera, María Jesu pago mera, Jesu pagɯ porã mera ôaro gamenere, turaro mera Goãmure mari Pagure serẽmuriñorã.

15 Eropi irinũre masa bajarã ciento veinte ejaboro gohra gamenereñorã. Eropigɯ Pedropɯ ïgɯ mera majarã Cristo yarã watope nũgaja, werepɯ erãre.

16 —Yɯ acawererã, Goãmɯ iribojegue ïgɯ arĩdiro dopa ta eropa wahaa. Irire Espĩritu Santo Davire weredoreñumi Juda mæru eropa warare. Juda Jesure ñeha wejẽmorãre ïhmudi árĩmi.

17 Juda mæru mari mera Jesu yare ii, gɯa mera majagɯ ta árĩrimi.

18 Judapɯ ïgɯ Jesure ïhmura wajare iri niyerure ïgɯ wiara pũhrɯ ïgɯ basi wejẽ sĩripɯ. Eropigɯ yuhridija wa, ïgɯ gũramisida yehguea sĩria wapɯ. ïgɯ wiara niyeru mæra mera gajirã merogã yebare asũñorã.

19 Eropirã árĩpehrerã ohõ Jerusalén majarã masipehrecãma Juda mæru ïgɯ ñero warare. Eropa masirã ïgɯ niyeru mera erã asũra yebare Acéldama di cóari yeba waĩcɯa, arĩma iri yebare.

20 Iribojegue erã arĩ gojadiro dopa ta eropa wahãmi Juda mæru. Salmo waĩcæripũgue ôpa

arĩ gojañuma:

Īḡu árĩdirore cóãdiro árĩporo. Eropirã gajirã Īḡu árĩdirore árĩbircãporo, arĩ gojañuma.

Ohõ sãre õpa arĩ gojañuma:

Gajigũ Īḡu mohmerare gohrotogũ árĩḡucumi, arĩ gojañuma Salmogue, arĩpũ Pedro.

²¹⁻²² “Eropirã mari yujugũ beyerã Juda mårure gohrotobure. Ñu waĩyegũ Īḡu masare buhera-subu árĩdigũre, Jesu mera mari mera árĩdigũre beyero gahmea mari mera majagũ árĩbure. Jesu masa måriacũ sãre ĩadigũre beyero gahmea. Eropa beyera pũhrũ Jesu Īḡu masa måriarare mari mera buheḡucumi, arĩ werepũ Pedro Īḡu acawererãre Cristo yarãre.

²³ Īḡu eroparĩcũ peerã perãre beyedoboñorã erã. Yujugũ José Justo waĩcũḡure beyeñorã. Īḡu Barsabá erã arĩ piyugũ árĩpũ. Eropirã gajigũre Matia waĩcũḡure beyeñorã.

²⁴⁻²⁵ Erã perãre beyedobotuhaja, erãre Goãmure õpa arĩ serẽñorã:

—Mũhu gũa Opũ árĩpehrerã masa erã pepirire masia. Oã åhrima gũa perã beyerã. Juda mårure gohrotobure nihi mũ gameḡure beyeque. Juda mårũ Jesure cóãdigũ peameḡue wadigũ árĩmi. Eropigũ ĩḡure gohrotogũ Jesu Īḡu apidigũ árĩḡucumi. Eropigũ gũa mera õari buherire buheḡucumi, arĩñorã erã Goãmure.

²⁶ Eropa arĩrã ta utã mera deamũriñorã beyemorã. Matia yañe õaro wiricũ, Matiapũ Jesu Īḡu apinirã once apinirã mera majagũ dujapũ.

2

Espíritu Santo ĩgu yarã mera árĩnũgapũ

¹ Eropii Pentecoste waĩcũrinũ árĩũ erã yujuro mera árĩpehrerã yuju wihi gamenereñorã.

² Irisubure ta miruñe bũrigã ariro dopa ta umarogue bũsũro cariyoro. Ero eropa bũsũro caricũ peeñorã árĩpehrerã iri wihigue gamenere árĩrã.

³ Eropiro peame porãrigã dopa bejari erã árĩpehrerã dipu wecare dehyoayoro. Iri peame porãrigã nediru dopa bejari dehyoayoro.

⁴ Eropigũ Espiritu Santo erapũ erãre ĩgu turarire ogũ arigũ. Eropirã Espiritu Santo erãre ĩgu itamuropẽ erãpũ gajirã yare õaro wereniguinũgañorã.

⁵ Irinũrire Jerusalén bajarã judio masa eranirã árĩñorã. Goãmũre umupeorã erarã árĩñorã. Erã macari nũcũ majarã árĩñorã.

⁶ Eropirã umarogue bũsũcũ peerã masa bajarã Jesu buherã pohrogue gamenere wahgãñorã. Masa nũcũ yare Jesu buherã erã wereniguicũ peeñorã. Erã eropa wereniguicũ peerã, erã pee uca wañorã.

⁷⁻⁸ —Yaho, ¿Duhpirã oã Galilea majarã árĩquererã õaro mari yare wereniguiri? Erã mari masa dehyoadirogue árĩnirã iro dopa ta wereniguirã iima, arĩñorã erãpũ.

⁹⁻¹⁰ Árĩpehrerã mari yare dohpaguere wereniguirã iima. Partia majarã, Media majarã, Elam majarã, Mesopotamia majarã, Judea majarã, Capadocia majarã, Ponto majarã, Asia majarã, Frigia majarã, Panfilia majarã, Egipto

majarã, Africa majarã, Cirene majarã, Romague arirã ãhraa mari. Yujurãyeri judio masa ãhraa mari. Gajirã judio masa árĩbirã judio masa ya buheripure buherãgue ãhraa mari.

¹¹ Creta majarã Arabia majarã sã mari mera ãhrima. Eropirã oã mari yare erã wereniguicũ peea mari. Erã mari ya mera Goãmũ turari mera ïgũ òaro iirare wererã iima, arĩ wereniguiñorã masa erã basi.

¹² Erã eropa arĩrã uca wañorã. Erã ïarare erã peerare òaro masibiriñorã.

—¿Dohpárirono oã gajirã ya mera Goãmũ yare eropa òaro wereniguiñorã mũa pepicũ? arĩ game serẽpiñorã erã erã basi.

¹³ Eropirã gajirã wereyañorã.

—¿Dohpa oã siburi ihrinijarã mererã iiri? arĩ wereyañorã gajirã erã basi.

Pedro masare werepũ

¹⁴ Eropigũ Pedro once Jesu ïgũ apinirã mera wahgãnũgaja, masare werepũ:

—Mũa Judea majarã, árĩpehrerã Jerusaléngue árĩrã, ire yũ werecũ òaro peeque mũa.

¹⁵ Mũa pepiri diaye árĩbeaa. Dohpaguere nueve ãhraa. Ëmũgue ãhraa. Eropirã oã merebeama.

¹⁶ Oã Goãmũ iribojegue ïgũ werediro dopa ta iirã iima. Iire Joere Goãmũ ya weremũhtadigũre ire weredoreñumi Goãmũpũ.

¹⁷ Ojogorocũrinũ árĩcũ òpa árĩroca: Yũhũ Espíriture masare árĩpehrerãre obeogũra. Eropirã mũa porã Goãmũ yare wererãcoma. Eropirã mũa mera majarã mamarã Goãmũ

deyoro moarire ñarãcoma. Eropirã mũa mera majarã mურãք quẽrre quẽrãcoma.

¹⁸ Eropigւ yւ pohro majarãre yւ Espiriture obeogura. Eropirã erã yahare wererãcoma.

¹⁹ Eropigւ yւ turari mera iigւca ւմսիցւ. Yebague sãre yւ turari mera irire ñhmugւca. Eropigւ di mera, peame mera, imica mera ñhmugւca yւ turarire.

²⁰ Yւ eropiicւ abe ւմւ majagւ naitĩa wagւcumi. Ñami majagւ abe diagւ ցւհարo wagւcumi. Őpa waroca Cristo mũa opւ ñgւ dujariburinւ, yւ arĩranւ core. Irinւ ñha ւca warãca mũa. Eropiro irinւ ցւհարinւ árĩroca.

²¹ Eropiro ōpa árĩroca: Árĩpehrerã masa Cristore erã ñerire cóãdore serẽnirãre ñgւ erãre peamegue wabonirãre taugւcumi Goãmւ, arĩ gojañumi Joe, arĩք Pedro masare.

²² “Mũa Israe masa yւհւ werecւ peeque, arĩք daja. Jesu Nazare majagւք Goãmւ ñgւ obeodigւ árĩmi. Jesure “Goãmւ obeodigւ ãhrimi,” masa erã arĩ masiboro dopa Jesu Goãmւ turari mera deyoro moarire masare ii ñhmucւ iidi árĩmi Goãmւ Jesure. Mũa irire masia.

²³ Mũa Jesure wejẽdorecւ Goãmւ iribojegue ñgւ “Eropa waroca,” ñgւ arĩdiro dopa ta eropa wahabւ. Eropirã mũa Jesure crusague wejẽdorerã wiabւ ñgure masa ñerãre.

²⁴ Goãmւք Jesu sĩridigւre masuami. Eropigւ dipaturi ne sĩrisome ñgւ. ñgւ sĩri wajabeami. Eropa ojocarinigucãbu ãhrimi.

²⁵ Őpa arĩñumi Davi iribojegue majagւ Cristo

ĩgu arĩbodirop dopa ta:

Yu Opu, yu mera aħraa mahu. Umuri nucu Goamu yu Opu yu pohro mahu arĩcu ĩamurabu yuhu ĩuibiriboro dopa.

²⁶⁻²⁷ Mahu Goamu yu siporare sirinira era arĩroguere ne coasome. Yure mu mahigure ñerogue yu siporare coasome mahu. Yuhu mu pohro majagu mre umupeogu aħraa. Yu dupure boadoresome mahu. Eropigu buriga mucubiria. Mucubiriri mera wereniguia. Eropigu mre Goamre buriga umupeogu arĩgu ĩuro mariro oaro arĩca.

²⁸ Yure dipaturi ojocaricu iiguca mahu. Yu mera mahu arĩcu buriga mucubiria, arĩ gojani mi Davi Cristo ĩgu arĩbodirop dopa ta, arĩpu Pedro.

²⁹ "Acawererã, opa oaro weregura mre Davire mari acaweregu mre, iribojegue majague, arĩnemopu daja Pedro. ĩgu Davi siria wani mi. Eropigu ĩgure era yaara gobe dohpaguere arĩnia. Eropigu "Yu dupure boadoresome mahu," arĩ gojagu ĩgu basi waipeo weregu iibiriñumi.

³⁰⁻³¹ Iribojegue Goamu Davire opa arĩñumi: "Diaye ta arĩgu iia. Mu paramera arĩturiara mera majagu mu iiro dopa ta i maca majara weca opu arĩgucumi," arĩñumi Goamu Davire. Davi Goamu yare wereyugu arĩñumi. Eropigu Cristore Goamu ta opu acuborore masigu, Cristo ĩgu masa mariaborore weremhtatuhanumi Davipu. Opa arĩ wereñumi ĩgu: "Ĩgu sirinira era arĩroguere arĩwajasome. ĩgu dupu ero boasome," arĩñumi Davi.

32 Ìre Jesucristore Goãmũ masuami. Ìgũ ma-sudigure gũa árĩpehrerã ìabũ.

33 Eropigũ Cristo ɔmarogue mari Pagũ di-ayepũ árĩcumĩ doregũ árĩgũ. Eropigũ ìgũ Pagũ “Èspĩritu Santore yebague obeogũra,” arĩpũ ìgũre. Eropigũ Cristopũ Espĩritu Santore dohpague obomi gũare. Eropirã Espĩritu Santore ìgũ gũare obeorare ìarã iiaa mũa. Eropirã mũa peea.

34 Davipũ Jesu ìgũ mũriadiro dopa ta ɔmaroguere mũriabiriñumi. Eropigũ ìgũ ìgũ basi õpa arĩñumi:

Goãmũ arĩmi yũ Opũre: “Ohõ yũ diayepũ doaque mũhũ.

35 Eropigũ mũre ìhaturirãre mũre tarinũgabasagũra yũhũ mũ pohro majarã dopa árĩmorãre,” arĩmi Goãmũ yũ Opũre, arĩ gojañumi Davi.

36 “Eropirã árĩpehrerã Israe masa ire õaro masique mũa. Ihĩ Jesure mũa crusague wejẽdigũre mũa opũ acuami Goãmũpũ. Ìgũre mũare taubure Cristore apiami Goãmũ, arĩ werepũ Pedro masare.

37 Ìgũ eroparĩcũ peerã bũrigã bũjawere, gũirã masapũ Pedro sãre serẽpi ìañorã:

—Gũa acawererã, ¿dohpa iirãcuri gũa? arĩ serẽpi ìañorã erã.

38 Erã eropa arĩ serẽpi ìacũ yũhripũ Pedro sã.

—Mũa ñero iirire bũjawererã árĩque. Õarire gohrotoque. Eropirã Jesu waĩ mera waĩyenirã árĩque mũa árĩpehrerã. Mũa eropa iicũ mũa ñerire cãdijigũcumĩ Goãmũ. Mũa eropa iicũ

Espíritu Santo mũa mera árĩgũcumi. Goãmũ ĩgũ Espíritu Santore eropa ocãgũcumi mũare.

³⁹ Mũaare, mũa porãre, mũa pãramerã árĩturiarãre yoarogue majarãre, árĩpehrerã Goãmũ mari Opũ ĩgũ beyenirãre “Diaye ta itamugũra mũare,” arĩ apiñumi Goãmũ, arĩpũ Pedro masare.

⁴⁰ Eropa arĩtuhaja baja werenemopũ Pedro. Eropigũ turaro mera werepũ erãre.

—I yeba majarãre erã ñero iira dipuwaja dipuwaja moagũcumi Goãmũ. Eropirã mũapũ Goãmũ yarã árĩque. Mũa eropa árĩcũ ĩgũ mũare dipuwaja moasome, arĩpũ Pedro masare.

⁴¹ ĩgũ eroparĩcũ peerã bajarã ĩgũ werenigu-irire õaro peeñorã. Eropigũ ĩgũ sã erãre waĩyepũ. Eropirã Goãmũ yarã mera majarã tres mil masa wanemoñorã.

⁴² Eropirã erã masa Cristo ĩgũ apinirã mera mũmuri nũcũ árĩmuriñorã. Eropirã erã buherire mũmuri nũcũ peemuriñorã. Erã barire game guere, Goãmũre serẽ, Cristo ĩgũ apinirã mera õaro árĩcãñorã erã.

Jesu yarã ne árĩnugarã erã árĩricurire werepũ Luca

⁴³ Eropii Goãmũ ĩgũ turari mera deyoro moarire ii ĩhmuñorã ĩgũ apinirã. Erã eropa iicũ ĩarã masa árĩpehrerã ĩha uca wañorã.

⁴⁴ Eropirã árĩpehrerã Jesure umupeorã gamenere, õaro árĩcãñorã. Eropirã erã yare game gueremuriñorã.

⁴⁵ Erã yare dua, árĩpehrerãre gajinore moorãre erã nũcũ omuriñorã erã.

⁴⁶ Eropirã umuri nucu erã Goãmũ wihigue gameneremuriñorã. Áripehrerã yujurãyeri erã wirigue yujuyeri cururi mucubiriri mera gamenere bamuriñorã.

⁴⁷ Erã eropa gamenererisubu “Goãmũ ðagũ aħrimi,” arĩ umupeomuriñorã. Eropirã gajirã masa erãre gametarimuriñorã. Eropigũ umuri nucu Goãmũ gajirãre ĩgu yarã wacũ iimuripũ.

3

Curimasibigũ ðagũ warũ

¹ Ñamicague tres árĩcũ Goãmũre serẽrisubu árĩcũ Pedro, Ñu mera Goãmũ wihigue warã iĩñorã. Iri wihi disiporo yujugũ umũ doarũ.

² Umuri nucu iri wihi disiporo ðari disiporo waĩcũri disiporo gajirã ĩgũre aĩgãri duhuboñorã. ĩgu umurũ ne masa dehyoagugue ta curimasibigũ árĩpũ. Eropigũ ĩgu iri disiporo pohro doagũ niyerure serẽmuripũ iri wihire ñajarãre.

³ Eropii Pedro, Ñu iri wihigue erã ejanugajacũ curimasibigurũ erãre ĩha, niyerure serẽpũ.

⁴ Eropirã erã Pedro, Ñu mera ĩgũre ĩha, Pedropũ ðpa arĩpũ:

—Guare ĩaque mũhũ, arĩpũ Pedro ĩgũre.

⁵ ĩgu eroparĩcũ peegũ erãre ĩha “Niyerure orãcoma yũre,” arĩ pepiripũ.

⁶ ĩgu eropa arĩ pepiquerẽcũ ta Pedro ĩgũre ðpa arĩ werẽpũ:

—Niyerure opabeaa yũhũ. Opabiriqueregũ ta ire iigũra yũhũ mũre. Jesucristo Nazare majagũ

ĩḡu turari mera curique mũhũ, arĩpũ Pedro curimasibigũre.

⁷ Eropa arĩḡu ta ĩḡu mojtore diayepũ maja mojtore ñeha, ĩḡũre tarawahgũ nugupũ. Irisubu ta curimasibigũ ĩḡu guburire, ĩḡu ñigarire turari ñajayoro.

⁸ Iri eropa ñajara pũhrũ ĩḡu wahgãnũgajapũ. Eropigũ ĩḡu waha buhrima mũria “Goãmu turagu õagũ ãhrimi,” ĩḡu arĩ mucubiridiro mera erã mera Goãmu wihigue ñajaapũ pare.

⁹ ĩḡu eropa curicũ, “Goãmu õagũ ãhrimi,” arĩ gaguiniguicũ masa árĩpehrerã ĩḡũre ãañorã.

¹⁰ Eropirã masa ĩḡũre ĩha masiñorã. “Ihĩ iri wihi maja disiporo õari disiporo pohro ĩḡu niyerure serẽ doagũ ãhrimi,” arĩñorã erã. Eropirã ĩḡu eropa curicũ ĩarã ĩhamaria wañorã.

Pedro Goãmu wihigue masare buhepũ

¹¹ Eropii curimasibiridigũ Pedro sãre ĩḡu duhubirisubu, masa árĩpehrerã ĩhamaria warã Pedro sã pohro omagã, gamenereñorã. Erã Goãmu wihigue árĩrã Salomo waĩcũripũgue arĩñorã.

¹² Erã eropa gamenerera pũhrũ Pedropũ werepũ erãre.

—Mũa Israe masa, ¿duhpirã ĩre ĩha ucari? ¿Duhpirã guare mũa ĩhanũrũri? Gũapũ gũa ya turari mera, Goãmũre gũa umupeori mera, gũa ejatuharo ĩre curicũ iibirabũ gũa. Jesu irire ĩiami.

¹³ Mari ñecũ sũmarã mũra Abrahã, Isaa, Jacobo mũra Goãmũre umupeomũriñorã. Erã umupeodigapũ Goãmũpũ ĩḡu magũre Jesure

turagu, ðagu ĩgu árĩcũ ĩhmumurimi. Mũa Jesure ĩhaturirãre ohabũ. Eropigu Pilato ĩgure ĩgu peresugue wiudiacũ mũapũ ĩgure ĩgu wiucũ gamebirabũ. Pilatore Jesure ohabũ mũa.

14 Pilato ĩgure wiudiarami. Mũaapũ Jesure ðagure, ðaro iigure gamebirã gajigure masa wejẽdigupure wiudoreabũ mũa.

15 Eropirã Jesure mari ojocaricũ iigure wejẽabũ mũa. ĩgu sĩricũ Goãmũ ĩgure masuami. ĩgure masudigure gua ĩabũ.

16 Eropirã gua ĩgure umupeorã ãhraa. Gua eropa umupeocũ ĩagu ĩre mũa dohpague ĩagure mũa ĩha masigure Jesupũ ĩgu turari mera ĩgu curicũ iiami.

17 “Yũ acawererã, mari oparã mera Jesure ðaro masibiriquererã ĩgure wejẽabũ mũa. Irire masia yũhũ.

18 Iribojegue majarã Goãmũ yare weremũhtanirã Goãmũ erãre ĩgu weredoreiro dopa ta wereñuma erã sã. “Cristo ñero tarigũcumi,” arĩ wereyũñuma erã. Erã eropa arĩ werediro dopa ta eropa wabũ dohpaguere.

19 Eropirã dohpaguere mũa ñero iirare bujawererã árĩque. Õaripure gohrotoque. Cristore umupeoque. Mũa eropa iicũ mũa ñerire cãdijigũcumi Goãmũ. Eropigu mũare mucubiririnũre apigũcumi ĩgu. Eropirã ðaro sĩñajarãca.

20 Eropigu Goãmũ Cristore ĩgu beyedigure mũare obeogũcumi daja. Cristo Jesu ta ãhrimi.

21 ĩgu Jesu Goãmũ pohroque árĩcumi dohpa. Iribojegue Goãmũ ĩgu yare weremũhtanirãre

wereyudoreñumi ïgũ iiburire. Ìgũ werediro dopa ta árípehrero amugũ iicumí. Ìgũ amutuhaja Cristore obeogũcumí daja.

²² Moise irire weregũ õpa arĩñumi: “Mari mera majagũre mari acaweregũre Goãmũ yare weremũhtagũre Goãmũ mari Opũ obeogũcumí mũare. Yũre ïgũ obeodiro dopa ta obeogũcumí ïgũ sãre. Eropirã mũare ïgũ werecũ peep-ehrecãrãca mũa.

²³ Õpa árĩroca. Árípehrerã ïgũre peebirã, ïgũ dorerire iibirã ïgũ cóãnirã árĩrãcoma. Goãmũ yarã mera majarã árĩsome erã,” arĩmũriñumi Moise iribojeque.

²⁴ “Árípehrerã Goãmũ yare weremũhtanirã nũcũ, Samue ïgũ pũhrũ árĩrã sã i dohpague warire wereyuñuma.

²⁵ Mari ñecũ sũmarãre iribojegue majarãre “Masare õaro iigũra,” arĩ weremũriñumi. Ìgũ erãre werediro dopa iimi marire dohpaguere. Eropigũ Abrahãre ïgũ arĩdiro dopa ta mari sãre arĩ weregũ iĩñumi. Õpa arĩ wereñumi Goãmũ Abrahãre: “Árípehreri yeba majarãre õaro iigũra. Õpa irire iigũra: Mũ acaweregũ pũhrũ árĩgũpũ masare õaro iibasagũcumí yũre,” arĩñumi Goãmũ Abrahãre.

²⁶ Maripũre Goãmũ Jesure ïgũ magũre ïgũ masudigũre mari pohrogue obeomũhtami mari ñero iirare cóãbure. Eropa iigũ ïgũ mũare õaro iiami, arĩpũ Pedro erãre.

4

Pedro, Ñũ mera oparãre weretamuñorã

1-3 Īgu eropa wereniguisubu pahia, Goām̄u wihire corerã surara op̄u, saduceo masa sã erãre peeñorã. Ōpa buhep̄u Pedro Ñu mera masare:

—Jesu ĩgu s̄irira p̄hr̄u masa m̄aria wami. Īgu eropa masa m̄ur̄iacũ ĩarã, p̄hr̄u mari sã ĩgu yarã mari masa m̄ur̄iaborore masia mari, ar̄i werep̄u Pedro sã. Erã eropar̄icũ peerã, oparãp̄u erã mera guañorã. Eropa guarã naimerecũ ĩarã erã Pedrote, gajirã Jesu apinirã sãre ñeha, peresu iñorã.

4 Oparã eropa gamebiriq̄uerecũ ta masa bajarã Goām̄u yare Pedro sã buherire peerã “Diaye ta ãhraa,” ar̄i pepiñorã erã. Eropirã Jesu yarã bajarã wañorã. Erã ũma dihtare queocũ Jesure umupeorã cinco mil masa ár̄iñorã.

5 Eropii gajin̄u iri maca majarã m̄urã, oparã, judio masa buherã mera Jerusaléngue gamenereñorã.

6 Eropiḡu pahia op̄u Ana waĩcuḡu ero ár̄ip̄u. Īgu acawererã sã ár̄iñorã. Caifa, Ñu, Alejandro, gajirã mera Ana acawererã ár̄iñorã.

7 Eropirã erã Pedro sãre erãre gamebeocũ, surarap̄u peresugue erãre aĩwiu oparã watopegue erãre aĩ ejañorã. Erã eropa iira p̄hr̄u oparã ser̄epi ñañorã Pedro sãre.

—¿Noa ya turari mera m̄ua curimasibigure õaḡu iiar̄i? ¿Noa ãhr̄iri m̄uare irire iidoreḡu? ar̄i ser̄epi ñañorã erã.

8 Erã eropar̄icũ peeḡu Esp̄iritu Santo ĩgu ita-murire õaro opaḡu werep̄u Pedro erãre.

9 —Mũa oparã, mũa mũa, ¿gua curimasibigũre gua õagũ iirare serẽpi ãarã iiri mũa guare?

10 Ire masique mũa árĩpehrerã, Israe masa. Ire Jesucristo eropa iiami. Jesu Nazare majagu, mũa crusague wejẽdigũ, Goãmũ masudigu, ãgũpũ ihĩ curimasibigũre õagũ wacũ iiami. Eropirã ãre dohpaguere mũa ãhuro ãgu curicũ ãhaa mũa. Õpa ãhraa Goãmũ yare erã gojarapũgue Cristore wereyuro:

11 “Ihĩ Cristo utãye iro dopa ta Goãmũ beyedigũ ãhrimi. ãgu Goãmũ beyedigũ árĩquerecũ masa ãgũre gamesome. ãgũre erã gamebiriquerecũ Goãmũ ãgũre opu acuami árĩpehrerãre dorebure,” arĩ gojañumi iribojegue.

12 Ne gajigu masare peamegue wabonirãre taugu ne marimi. I yebaguere Jesu dihta masare taugu ãhrimi. Ne gajirã ãgu iro dopa árĩrã ne marima, arĩ werepũ Pedro erãre.

13 ãgu eropa arĩ werera pũhrũ, Pedro Ñu mera buheya marirã erã árĩcũ ãarã, gũiro mariro erã buhecũ ãarã, mũa, oparã, judio masa buherã mera pee uca wañorã. Eropirã Jesu iro dopa erã buhecũ ãarã, õpa pepiñorã erã. “Pedro, Ñu sã diaye ta Jesu mera majarã ta ãhrima oã,” arĩ pepiñorã erã.

14 Eropigu curimasibiridigu Pedro sã mera árĩpũ. ãgu, ãgu õagũ árĩcũ ãañorã mũa, oparã, judio masa buherã mera. Eropirã erã Pedro sãre “Ñero iirã iiaa,” arĩ weresãmasibiriñorã.

15 Eropa weresãmasibirã oparã erã

gamenereri taribugue árĩrãre Pedro sãre wiriadoreñorã.

¹⁶ Erã wiriara pũhrũ erã basi weretamuñorã.

—¿Oãre dohpa iirãcuri mari? arĩ wereniguiñorã erã.

Õpa arĩ wereniguinemoñorã:

—Pedro, Ñu mera Goãmũ turari mera curi-masibigũre curicũ iinirã ãhrama. Eropirã Jerusalén majarã árĩpehrerã erã eropa õaro iirare masiama. Eropirã maripũ “Eropa iibirama erã,” arĩmasibea mari.

¹⁷ Eropirã Jesu ïgũ buherare gajirãre buhe-dorebircãrã erãre gajirã erã buherire gameri arĩrã, arĩ wereniguiñorã erã erã basi.

¹⁸ Eropa arĩ wereniguituha Pedro sãre sihubeo õpa arĩñorã:

—Jesu ïgũ buherare ne buhebiricãque gajirãre. Irire ne wereniguibircãque, arĩriñorã erãre.

¹⁹ Erã eroparĩcũ peerã Pedro Ñu mera õpa arĩñorã erãre:

—Mũa õpa arĩcũ mũare yũhrirã Goãmũpũre tarinũgãrã iiboca gũa. ¿Nihĩ yapũre gũa werecũ gahmeri mũa? ¿Mũa yapũre gũa iicũ gahmeri mũa? ¿Goãmũ yapũre gũa iicũ gahmeri mũa?

²⁰ Guapũre gũa ïarare, gũa peerare guare yayasãma masiya mara masare, arĩ yũhripũ Pedro Ñu mera.

²¹ Erã eroparĩcũ peerã oparãpũ dipaturi doreriñorã daja erãre.

—Jesu ïgũ buherare mũa buherã ñero tarirãca mũa, arĩriñorã oparã erãre.

Eräre “Ñu, Pedro mera ñero iirã iima,” arĩmasibiriñorã erã. Eropirã masapũ curimasibiridigũ ãgũ ðagũ wacũ ãarã, “Goãmũ diaye ta ðagũ ãhrimi,” arĩñorã masa. Erã eroparĩcũ peerã oparãpũ Pedro sãre dipuwaja moamasibiri, erãre wiuñorã.

²² Curimasibigũ ðagũ erã iidigũ cuarenta bojori opagũ árĩpũ.

Jesu yarã erã güibiriburire serẽñorã Goãmũre

²³ Eropii, Pedro Ñu mera erã mera majarã pohrogue eja, pahia oparã, mũrã erãre erã arĩrare wereñorã.

²⁴ Erã eroparĩcũ peerã erã árĩpehrerã yujuro mera mari Pagũre Goãmũre serẽñorã.

—Gũa Opũ, mũhũ ɔmarore, yebare, diarire iigũ, árĩpehrerãre ojocaricũ iigũ ãhraa mũhũ.

²⁵ Mũ Espĩritu Santo gũa ñecũre Davi mũrũre mũ pohro majagũre ðpa weredoreyoro mũ arĩdiro dopa ta:

¿Duhpirã judio masa árĩbirã guari? Pee masibirã ãhrima masa.

²⁶ Baja macari majarã oparã gamenere, mari Opũ Goãmũre, ãgũ opũ acudigũ Cristo sãre ãhaturi, ñero iidiana erã, arĩ weredoreyoro mũhũ Davire iribojegũre.

²⁷ Eropa ta ãhraa, arĩ serẽnemoñorã Goãmũre. I macare Herode, Poncio Pilato, judio masa árĩbirã, judio masa mera mũ beyedigũre Jesure ðagũ mũ pohro majagũre wejẽdia gamenereama.

²⁸ Irisubu mũ gamediro dopa ta “Eropa waroca,” mũ arĩdiro dopa ta iiaama erã. Mũ masiri mera eropa wereyoro mũhũ.

29 Eropigu, gua Opu, erã guare “Mua buheri waja ñero tarirãca,” erã arĩrare guñaque mũhu. Guare itamuque. Eropigu guare mũ pohro majarãre güiro mariro mũ buherire weredoreque guare.

30 Mũhu mũ turari mera dorecurãre õarã iique. Eropigu mũ buherire güiro mariro werecũ iique guare. Eropigu mũ deyoro moarare Jesu mũ pohro majagu ïgu turari mera ii ïhmudoreque guare. Eropigu dorecurãre õarã gua wadorecũ mũ turari mera itamuque guare, arĩ serẽñorã erã mari Pagure.

31 Erã eropa arĩ serẽra pũhrũ, erã gamenereri wihi ñohmemaa wayoro. Ero eropa ñohmecũ ta Espiritu Santo ïgu turari mera guñaturarã wacũ iipũ erãre. Eropa warã, Espiritu Santo ïgu dorediro dopa ta iiñorã. Güiro mariro Goãmũ yare wereñorã erã.

Jesu yarã erã yare dũca wañorã

32-33 Eropirã Goãmũ ïgu turari mera erã Jesu ïgu apinirã õpa arĩ wereñorã masare: Jesure Goãmũ masudigure gua ïabũ, arĩ wereñorã erã masare. Eropigu Goãmũ erã árĩpehrerãre õaro itamumũripũ. Eropirã Jesure umupeorã bajarã árĩñorã. Erã yujuropa ta pepirã árĩmũriñorã. Eropirã erã erã yare erã doberire “Yaha dihta ãhraa,” ne arĩbiriñorã. Erã árĩpehrerã erã yare gajinore moorãre erã mera majarãre dũca wamũriñorã.

34 Eropirã erã mera majarã mojomorocurã marimũriñorã. Erã mera majarã yeba oparã, wiri oparã erã yare duamũriñorã.

³⁵ Eropa duarã erã wajasearare erã aĩgãri, Jesu ĩgu apinirãre omuriñorã. Eropirã erãpũ irire erã mera majarãre dũca wamuriñorã. Árĩpehrerã opabirãre dũca wañorã.

³⁶ Irisubure yujugũ erã mera majagũ José waĩcũgu árĩpũ. Jesu ĩgu apinirã Josere Bernabé waĩyeñorã. ĩgu waĩ Bernabé “Masare mucubiricũ iigu ãhrimi,” arĩma Griego ya mera. ĩgu Leví ya curu majagũ Chipre nũgũro majagũ árĩpũ.

³⁷ Eropigũ ĩgu poeri opagũ árĩgu irire duarũ. Eropigũ ĩgu wajasearare Jesu ĩgu apinirãre ópũ ĩgu gajirãre gueredoregũ.

5

Ananía ĩgu marapo Safira mera gũyarũ

¹ Gajirã sã Bernabé iro dopa iimuririñorã. Erã Ananía waĩcũgu, ĩgu marapo Safira waĩcũgo árĩñorã. Eropigũ Ananía erã ya poerire duarũ ĩgu.

² Eropa duaqueregũ ta ĩgu wajasearare ĩgu basi aĩpũ. ĩgu marapo sã ĩgu eropa iirare masipo. Eropigũ erã wajasea dũharare aĩgãri, Jesu ĩgu apinirãre ópũ Ananíapũ. Eropa ogũ, “Opehogũ iiaa,” arĩripũ ĩgu.

³ ĩgu eropa iicũ ĩagu Pedro ĩgure wererũ.

—Ananía, watĩ mure gũyadorecũ mũhũ gũyabũ Espĩritu Santore. Eropigũ mũa ya poerire dua, mũ wajasearare mũ basi aĩbu ãhrabũ mũhũ.

⁴ Mũ duaboro core mũa ya poeri árĩribũ. Eropiro mũ duara pũhrũ mũ ya wajatari ta

ãhrabu. ¿Eropigu dohpa árironore eropa guyari mahu? Mahu gua dihtare guyabeaa. Goãmu sãre guyabu mahu, arĩpu Pedro ïgure.

⁵ ïgu eroparĩcũ peegu ta, Ananíapu mehmereja, sĩria wapu. Eropirã árĩpehrerã ïgu eropa warare masirã, buriã güiñorã.

⁶ ïgu sĩrira puhru mamarã ahri, ïgu dupure suhri mera oma, disiporogue aĩgã, yaañorã ïgure.

⁷ Eropii uhre hora puhru Ananía muru marapo ïgu sĩrirare masibigo Pedro pohrogue ñajapo.

⁸ Eropigu Pedro igore opa arĩpu:

—¿Mua ya poerire duanijarã dipẽ wajatari mua? arĩpu ïgu. Eropigo igo igo marapu muru ïgu arĩrañepẽ ta, “Iripẽta wajatabu gua,” arĩ wereripo igo sã.

⁹ Eropigu Pedro igore werepu:

—¿Duhpirã mua yujuro mera Goãmu Espĩriture guya ñhadiari mua? Peeque dohpaguere. Mu marapu murure yaanirã ta ahrima daja. Mu sãre mu dupure aĩrã ahrima, arĩpu Pedro.

¹⁰ ïgu eropa arĩ werecũ ta igo mehmereja, sĩria wapo. Eropirã mamarã iri wihire ñajarã, igo ya dupu murarore aĩ wiria wañorã. Aĩgã, igo marapu muru dipaba yaañorã.

¹¹ Eropirã Jesu yarã árĩpehrerã gajirã irire peerã sã, güitariacãñorã.

Jesu ïgu apinirã Goãmu turari mera ii ñhmuñorã

¹² Eropirã masa watope Jesu ïgu apinirã basuburi Goãmu turari mera deyoro moarire ii

ĩhmumuriñorã. Eropirã erã Salomo waĩcũri taribugue õari taribugue gameneremuriñorã.

¹³ Eropirã gajirã erãre güirã, erã pohrogue wabiriñorã. Eropa güiquererã erãre Jesu ĩgu apinirãre, “Õarã ãhrima oã,” arĩñorã masa.

¹⁴ Eropirã ɯma, nome bajarã Jesure umu-peonũgañorã.

¹⁵ Eropirã erã dorecũrãre aĩgãri, omasiariñe mera pũtãpi apigãñorã Pedro waburi mague erãre. Eropirã dorecũrãre õarã wacũ gameã Pedro erãre ĩgu ñapeocũ gameñorã erã aĩgãnirãpũ. Erãre ĩgu ñapeobiricũ Pedro erã weca ĩgu watĩ merejariñe dihtare gameñorã erã. Iri dihtare gameñorã erã erã õarã waboro dopa.

¹⁶ Eropirã Jerusalén pohro árĩri macari majarã sã, dorecũrãre, watẽa ñajasũnirã sãre aĩgãriñorã. Eropirã erã árĩpehrerã erã dũpũ õaro wañorã.

Oparãpũ Jesu ĩgu apinirãre ñero iidoreñorã

¹⁷ ĩgu eropa iicũ ĩarã pahia opũ, ĩgu mera majarã mera Pedro sãre peyocũpũ. Pahia opũ mera majarã saduceo masa árĩñorã.

¹⁸ Pedro sã iirare peerã erã guatarirã Jesu ĩgu apinirãre ñehadore, peresu iĩñorã.

¹⁹ Eropiira pũhrũ iri ñami ta Goãmũ ĩgu anyu pãgũpũ erãre peresugue árĩrãre. Tuhajanugu erãre wiriridore õpa arĩ werepũ anyu:

²⁰ —Goãmũ wihigue waque. Iri wihigue árĩrã Goãmũ masare ĩgu tauburire, iri õari buherire wereque masare, arĩpũ anyu erãre.

21 Īgũ eroparĩcũ peerã ñamigã ñari Goãmũ ya wihigue ñaja, masare buheñorã erã.

Irinũ ta pahia opũ, ĩgũ mera majarã, Israe masa oparã mera gamenere, Jesu ĩgũ apinirãre peresugue árĩrãre aĩgãridoreripũ surara oparãre.

22 Eropirã surara oparã peresugue doarãpũre aĩgãrirã wariñorã. Erãre bocabiriñorã. Bocabiri dujaa wañorã daja.

23 Dujaja wereñorã erã oparãre.

—Peresugue árĩri disiporori bihara disiporori ãhrabũ. Eropirã erã iri disiporori pohro peresu iinirãre corerã niguiama. Eropa ĩabũ gũa. Eropirã gũa disiporore pãgũcũ, masa marabũ, arĩ wereñorã erã.

24 Erã eroparĩcũ peerã, surara Goãmũ wihire corenirã opũ, pahia oparã mera irire pee uca wa, “¿Dohpa waha ojogorocurãcuri erã eropa iirã?” arĩ pepiñorã erã.

25 Eropigũ erã pohrogue gajigũ ahri, erãre werepũ.

—Mũa peresu iinirã Goãmũ wihigue ãhrama. ĩarã waque bu. Iri wihigue masare buherã iiama erã, arĩ werepũ.

26 Īgũ eroparĩcũ pee, surara opũ, ĩgũ surara mera waha, Jesu ĩgũ apinirãre dipaturi ñeagãriñorã daja. Eropa ñearã erãre surara turibiriñorã. Eropirã erãre pabonirã árĩquererã, masare gũirã pabiriñorã erãre. “Oãre mari pacũ gajirã masapũ utã mera dearãcoma marire,” arĩ pepiñorã erã surarapũ.

27 Eropirã erãre aĩgãri, oparã core duhuboñoã erãre. Erã eropa aĩ eraa dobocũ pahia opũ erãre turipũ.

28 —Mũare gua weretuhabũ. Jesu yare buhebircãque, arĩrabũ gua mũare. Gua eropa arĩquerecũ ta mũapũ arĩpehrerã Jerusalén majarãre buhea mũa. Jesu ĩgu sĩrira waja, gũare dipuwajacũcũ iidiarã iica mũa, arĩpũ pahia opũ.

29 ĩgu eroparĩcũ peegu Pedropũ gajirã Jesu ĩgu apinirã mera yũhrĩpũ.

—Goãmũ ĩgu dorerapũre iimũhtarãra. Eropirã pũhrũ Goãmũ gamecũ masa erã dorerire iirãra.

30 Goãmũ mari acawererã iribojegue majarã opũ Jesure masudi arĩmi. ĩgu ta ãhrimi mũa crusague pabia wejẽdigũ.

31 Jesure masura pũhrũ Goãmũ ĩgũre “Õagũ ãhrimi,” arĩ, ĩgu diayepũ doadoremi Jesure ĩgu Pagupũ. Eropigu Jesu masa opũ, masare masugu arĩgu, Israe masare erã ñeri iirare bũjawererã arĩdoregu, erã ñerire cóadiami Jesu.

32 Eropirã gũapũ Jesu ĩgu iirare ãanirã arĩrã irire werea gua. Espĩritu Santo irire ĩhmuquũ arĩgu weremi ĩgu sã. ĩgũre Espĩritu Santore Goãmũ obeoami. Arĩpehrerã Goãmũ dorerire iirãre ĩgu Espĩritu Santore ohomi, arĩ werepũ erãre.

33 ĩgu eroparĩcũ peerã oparãpũ guatariacãñoã. Eropirã erã Jesu ĩgu apinirãre wejẽdiariñoã.

34 Irisubure erore Gamalie fariseo masũ ero arĩgu erãre wejẽdoregu iibiripũ. ĩgu oparã

mera majagu, dorerire buhegu ïgu árĩcũ, masa erã umupeogu árĩpu. Eropigu Ìgu Jesu ïgu apinirãre merogã coredoregu gajirugue erãre aĩgãdorepu surarare.

³⁵ Erã eropa aĩgãra puhru ïguru wereru masare.

—Mua Israe masa, oãre mua iiburire ðaro pepique muague wejẽri arĩã.

³⁶ Guñaque Teuda mæruere. Ìgu, ïgu basi “Masare tarinugagu ãhraa yuhũ,” arĩmi masare. Eropirã masa bajarã cuatrocientos masa ïgu mera majarã dujama. Eropirã gajirãpu ïgure wejẽnirã árĩma. Ìgu sĩricũ ïha ïgu buherire buhenirãpu wasiria wanirã árĩma. Eropirã erã dohpaguere marima.

³⁷ Puhru masare erã queorisubu árĩcũ Galilea majagu Juda waĩcugu masare ïgu buhecũ ïgu mera masa bajarã dujama. Ìgu sã sĩria wadi árĩmi. Eropii ïgu yarã árĩpehrerã wasiria wanirã árĩma erã sã.

³⁸ Eroparĩgu dohpaguere muare ire arĩgu iiaa. Eropa ïacãque oãre Jesu yare wererãre. Eropii i buheri oã erã ya buheri Goãmu ya buheri árĩbiro, pehrea waroca.

³⁹ Goãmu ya buheripu árĩro, ne pehresome. I buheri Goãmu ya árĩcũ ne ire ne dederecũ iimasibea muã. Mua ire dederecũ iidiarã Goãmu mera gamequeãrã iiboca muã, arĩpu Gamalie erãre.

Ìgu eropa arĩ werecũ peerã, “Diaye ta ãhraa,” arĩ, peeñorã oparã.

⁴⁰ Eropirã erã Jesu apinirãre sihubeo, erã eracũ ïarã erãre tãrañorã. “Jesu yare buhebiricãque

mua,” arĩtuhaja, eräre wadoreñorã.

⁴¹ Eropã wadorecũ peerã erã oparã pohrogue árĩnirã waha wañorã. Jesu ya árĩburire ñero tarirã burigã mucubiriñorã Jesu ñgu apinirã.

⁴² Eropirã umuri nucu erã ya wirigue, Goãmũ wihigue sãre Jesucristo yare buhe weremuriñorã erã.

6

Siete itamumorãre beyeñorã Jesu yarã

¹ Irinurire Jesure umupeorã bajarã wañorã. Eropirã griego masa judio masa mera game-turiñorã erã Jesu yarã dihta árĩquererã. Griego masa wapeweyarã nomere umuri nucu erã barire ñaro erã guerebircũ ñarã judio masare turiñorã.

² Eropirã Jesu ñgu apinirã, docepu Jesure umupeorãre árĩpehrerãre erã pohrogue sihubeo, ñpa arĩ wereñorã:

—Gua Goãmũ yare buherã ãhraa gua. Barire gueremorãno árĩbeaa gua.

³ Eropirã mua gua acawererã, siete umare, gajirã “Ñarã,” erã arĩrãre, Espĩritu Santo oparãre amaque. Erãpũre barire gueredoreque mua.

⁴ Eropirã guapu umuri nucu Goãmũre serẽ Goãmũ yare buherãca, arĩñorã Jesu apinirã erã Jesure umupeorãre.

⁵ Erã eroparĩcũ peerã, “Áu, eropa ta iirã,” arĩñorã erã árĩpehrerã Jesure umupeorã. Eropirã Estebanre Cristore umupeogũre, Espĩritu Santo turarire wũaro opagũre beyeñorã erã. Gajirã sãre beyeñorã. Filipere, Prócorore,

Nicanore, Timore, Parmenare, Nicolare bari gueremorãre beyeñorã erã. Nicolapũ judio masũ árĩbigũ Antioquía majagũ judio masa buherire gamegũ erã mera ñajadigũ árĩpũ.

⁶ Erã beyenirãre Jesu ïgũ apinirã pohro aĩ erañorã gajirã Jesu yarãpũ. Erã eropa aĩ eracũ ïarã erã Goãmure serẽbasañorã. Eropirã erã beyenirã weca erã mojotorire duhpeoñorã Goãmũ turarire orã.

⁷ Eropirã iri yeba majarã Goãmũ yare masipehrenijarã iñorã. Eropirã Jerusaléngue árĩrã Jesure umupeorã bajarã wanemoñorã daja. Eropirã pahia sã bajarã Jesu yarã wañorã.

Gajirã Estebanre ñeañorã

⁸ Eropigũ Esteban Goãmũ turarire opagũ árĩpũ. ïgũ Goãmũ õaro iigũ árĩpũ. Eropigũ ïgũ Goãmũ turari mera deyoro moarire ii ïhmupũ masa erã ïaro.

⁹ Judio masa erã buheri wihi majarã ïgure ïhaturiñorã. Eropirã ïgũ mera game duyasonũgañorã. Erã Liberto waĩcurã árĩñorã. Eropirã erã Cirene majarã, Alejandría majarã, Cilicia majarã, Asia majarã mera bajarã árĩñorã erã Esteban mera duyasorã.

¹⁰ Esteban masigũ dopa ta, Espíritu Santore wũaro opagũ ta ïgũ wereniguicũ peerã erã yujuro bojebiriñorã ïgure.

¹¹ Eropa yujuro bojebirã erã gajirãre ahma gũyadore, wajayeñorã erãre. Erã eropa gũyadorecũ õpa arĩ weresãñorã erã Estebanre:

—Ihĩ Goãmure ïgu ñero wereniguicũ, Moiserer ïgu ñero wereniguicũ sãre gua peeabu, arĩ weresãriñorã erã gũyarãpũ gajirãre.

¹² Erã eroparĩcũ peerã masa, judio masa buherã, murã sã ïgu mera guañorã. Eropirã erã Estebanre ñeha erã oparã pohro aĩgãñorã ïgure.

¹³⁻¹⁴ Eropirã erã gajirãre gũyanemodoreñorã. Õpa arĩñorã erãpũ:

—Ihĩ umari nũcu Goãmũ wihire, ïgu doreri sãre ñero wereniguigu aħrimi. Peeabu gua ïgure ïgu õpa arĩcũ. “Jesu Nazare majagu Goãmũ wihire cóagũcumi. Eropigu ïgu Moise dorerare marire ïgu wererare gohrotogũcumi Jesu,” arãmi Esteban gua peecũ, arĩ gũya weresãriñorã erã.

¹⁵ Eropirã arĩpehrerã ero doarã Estebanre õaro ïhamehtu, ïgu diapore ïañorã erã. Anyu iro dopa deyoyoro ïgu diapo.

7

Esteban Jesu yare wererũ

¹ Eropii pahia opũ serẽpipũ Estebanre.

—¿Oã erã arĩri diaye ta aħriri? arĩ serẽpipũ ïgu Estebanre.

² ïgu eroparĩcũ peegu, Estebanpũ erãre õpa arĩ wererũ:

—Acawererã, murã, gua pagũ sumarã, peeque. Abrahã mari ñecũ murũ iribojegue majagu Mesopotamiague ïgu arĩcũ, Harãngue ïgu arĩboro core, Goãmũ turagu gosesiriro dopa ïgure Abrahãre dehyoañumi.

3 Eropa dehyoagu Goãmũ wereñumi ïgũre. “Mũ ya yebare mũ acawererã mera árĩbircãque. Eropigu gaji yebague waque. Mũ eropa wacũ mũre iri yebare ïhmugũra yũhũ,” arĩpũ Goãmũ Abrahãre.

4 ïgu eroparĩcũ peegu Abrahã sã Caldea majarã ya yeba árĩrã wañuma. Pũ Harãngue ejañuma. Erogu eja árĩñuma. Eropigu ïgu pagũ ïgu sĩrira pũhrũ i yeba dohpague mũa árĩri yeba Goãmũ ta árĩdoreñumi Abrahãre.

5 ïgũre eropa árĩdorequeregu Goãmũ Abrahã ïgu árĩri yebare ðaro gohra apibirimũriniñumi ïgũre. Ne merogã apibiriniñumi. Eropigu Abrahã ïgu porã marigu árĩquerecũ ta Goãmupũ ïgũre õpa arĩ wereñumi. “Mũre mũ pãramerã gaji turi majarãguere i yebare ogũra,” arĩñumi Goãmũ Abrahãre.

6 Eropa arĩgu ta õpa arĩ werenemoñumi Goãmũ Abrahãre. “Mũ pãramerã gaji turi majarãgue gaji yebague waha, erogue gajirã pohro árĩrã erã pohro majarã árĩrãcoma erã. Eropirã cuatrocientos bojori gohra ero majarã ñero iirãcoma mũ pãramerã arĩturiarãguere.

7 Eropigu ero majarãre erã eropa iira waja dipuwaja moagũra yũhũ. Yũhũ eropiira pũhrũ mũ pãramerã i yeba erarãcoma daja. Eropirã i yeba yũ dorerire iirãcoma erã,” arĩñumi Goãmũ Abrahãre.

8 Eropa arĩgu Goãmũ “Yũ arĩdiro dopa ta iigũra,” arĩgu Abrahã ïgu guñaburire õpa apiñumi ïgũre. Merogã gasirogãre ïgu dũpũre wiri aĩdoreñumi ïgũre, ïgu eropa arĩ wererãguere guñadoregu. Eropiira pũhrũ Abrahã

Isaare porãcũñumi. Ocho nãri pũhrũ merogã gasirogãre wiri aññumi Isaa dũpũ sãre. Pũhrũ Isaa Jacobore ãgũ porãcũra pũhrũ wiri aññumi ãgũ dũpũ sãre. Eropigũ Jacobo doce gohra porãcũñumi. Erã docerũ mari cururi nũcũ oparãgue árĩmũriñuma.

⁹ “Eropirã erã Jacobo porã mari ñecũ sũmarã mũra Josére erã pagũ magure peyocũmũriñuma. ãgũre cohã, duacãñuma Egiptogue warãre. Eropigũ Josére Goãmũ itamumũriñumi.

¹⁰ ãgũ ñero taricũ ãagũ Goãmũ ãgũre itamumũriñumi. ãgũ eropa itamucũ Josérũ ðaro pee masigũ wañumi. Eropigũ faraõ Egipto majagũ opũpũ Josére ãgũ gamecũ iĩñumi Goãmũpũ. ãgũ eropiicũ faraõpũ Josére Egipto majagũ opũ, ãgũ ya wihi majagũ opũ apiñumi.

¹¹ “Eropii irisubure ta Egiptogue, Canaa waĩcũri yeba sã ne deco aribiriyoro. Eropirã ero majarã ñero tariñuma. Eropirã Canaague árĩrã Jacobo porã mari ñecũ sũmarã mũra bari bocabirimũriñuma.

¹² Eropigũ Egiptogue trigo árĩcũ peegũ, Jacobo ãgũ porãre erogue bari asũdoregũ ne obeogũ iĩñumi.

¹³ Pũhrũ Egiptogue erã ejacũ José ãgũ tĩrãre wereñumi. “Mũa pagũ magũ ta ãhraa yũhũ,” arĩñumi erãre. Eropigũ José acawererãre ne ãagũ iĩñumi opũ faraõ waĩcũgũ.

¹⁴ Pũhrũ José ãgũ tĩrãre erã pagũ Jacobore sihudoregũ obeoñumi. ãgũ acawererã setenta y cinco masa árĩñuma irisubu.

¹⁵ ãgũ magũ ãgũ sihubeocũ peegũ Jacobo

Egiptogue wañumi ñgu magu pohrogue. Ñgu magu pohro ãhri, puhru síria wañumi pare. Eropirã ñgu porã mari ñecu samarã mura erogue síripehrea wañuma erã sã.

16 Eropirã Siquẽ waicuri yebague erã dupure aĩ, masa goberigue seatuha yaañuma erã dupure. Abrahã ñgu asũra yebague arĩyoro iri yeba erãre yaara yeba. Ero core Abrahã iri yebare Hamor porãre asũyuñumi niyeru mera.

17 Eropigu Goãmũ Abrahãre “I yebare ogura mure,” arĩmuriñumi. “Iri yebare ogura,” ñgu arĩrasubu ejacũ Abrahã pãramerã Israe masa bajarã masa wañuma. Egiptogue arĩñuma.

18 Egipto yeba erã arĩnicũ, gajigu opu ñajañumi. Eropigu ñgu opu opu José murere masibiriñumi.

19 Eropigu ñgu mari acawererãre ñero iidia, erã porãre wejedia, erã porãre wejẽ cóãcãdoreñumi erãre. Eropigu mari ñecu samarãre ñero iñumi opu faraõpu.

20 Ñgu eropiirisubu Moise arĩbupu masa dehyoañumi. Ñgu õagu, Goãmũ õaro ñhasagu arĩmuriñumi. Eropirã ñgu pagu samarã urerã abe gohra õaro ñhadibuñuma ñgugãre.

21 Moisere dibunemomasibiricũ ñgure erã cóãra puhru opu mago ñgure boca aĩ majaa, igo magu iro dopa ta dibuñumo ñgure.

22 Eropirã Egipto majarã õaro masirã yare buheñuma Moisere. Eropigu güiro mariro wereniguigu opu iro dopa iigu arĩñumi Moise.

23 “Eropigu Moise cuarenta bojori ñgu opaboro core ñgu acawererãre Israe masare ñadiagu erã

pohrogue curigü wañumi.

²⁴ Eropa curigü ejagü Egipto majagü Moise acaweregüre ñgu ñero iicü Moise ñañumi. Eropa ñagü ñgu acaweregüre itamuñumi Moise. Ñgu acaweregüre itamugü Egipto majagüpure pa wejēcãñumi ñgu.

²⁵ Eropirgü Moise òpa arĩ pepiriñumi. Yü acawererã erã acaweregüre yu itamucü ñarã, 'Goãmü marire òaro taricü iidoregü obeoñumi ñre,' yu acawererã yure arĩ pepirãcoma," arĩ pepiriñumi Moise. Erãpü ne eropa pepibiriñuma.

²⁶ Gajinü Moise ñgu acawererãre perã erã basi gamequeãrãre ñapü. Eropigü ñgu erãre bosariñumi. "¿Müa basi arĩquererã gamequeãri müa?" arĩñumi Moise erãre.

²⁷ Ñgu eroparĩcü peegü yujugü ñgu acaweregüre ñero iigü Moisere tuubeoñumi. "Mühü gúa opu arĩbeaa. Güare doregü arĩbeaa mühü.

²⁸ ¿Carãre Egipto majagüre mü wejëdiro dopa ta yu sãre wejëdiagü iiri mühü?" arĩñumi ñgu Moisere.

²⁹ Ñgu eroparĩcü pee üca wa Moise oma duhrigã waha warü. Madián waïcüri yebague waha wañumi. Erogue nomeore boca perã porãcñumi.

³⁰ "Eropii Moise cuarenta bojori gohra ero ñgu arĩra pührü Sinaí waïcüdigu ütagü pohro masa marirogue ñgu arĩcü anyu ñgüre dehyoañumi.

³¹ Eropa irigugã üjücü ñagü Moise ñha üca wañumi. Iri peamere pohrogã òaro ñgu ñagü wacü gohra Goãmü ñgüre wereñumi.

³² “Goãmũ ãhraa yũhũ. Mũ ñecũ sũmarã, Abrahã, Isaa, Jacobo erã Goãmũ ãhraa yũhũ,” arĩñumi Goãmũ Moisere. Ĩgũ eroparĩcũ peegũ Moisepũ naragãñumi. Ne ĩha wahgũbiriñumi.

³³ Eropigũ Goãmũ wereñumi ĩgũre. “Dohparagã yũ pohro niguigũ iiaa mũhũ. Eropigũ gũhyadiaro mera mũ zapature tuweaque.

³⁴ Yaharã masa Egiptogue erã ñero taricũ ĩabũ. Erã sĩwererire peeabũ. Eropigũ erãre itamugũ ahrabũ. Erã eropa wacũ ĩagũ waque mũ sã. Egiptogue mũre obeogũra erãre itamudoregũ,” arĩñumi Goãmũ Moisere.

³⁵ “Erãpũ mari acawererã Israe masa Moisere gamebirituhajañuma. “Mũhũ gũa opũ árĩbeaa. Mũhũ gũare doregũ árĩbeaa,” Moisere eropa arĩrã gamebirã iituhajañuma. Eropa erã Moiserẽ gamebiriqerẽcũ Goãmũ ĩgũre Egiptogue obeoñumi mari acawererãre, Israe masare itamubure, erãre dorebure. Ĩgũ eropa obeogũ anyupũre ĩgũre yucũgũgue dehyoadigũre itamudoreñumi ĩgũre.

³⁶ Moise ta mari acawererãre Israe masare Egiptogue árĩrãre wiudigũ árĩñumi. Eropigũ Egiptogue eja, ihĩ Moise Goãmũ turari mera ii ĩhmunũgañumi. Eropigũ wũariya diariyague eropa ta iĩñumi daja. Pũhrũguere masa marirogue sãre cuarenta bojori gohra Goãmũ turari mera deyoro moarire ii ĩhmunũriñumi ĩgũ erãre.

³⁷ Ihĩ Moisepũ mari acawererãre Israe masare weremũriñumi. “Yũ iro dopa ta Goãmũ yare weremũhtabure Goãmũ obeogũcumi. Eropigũ ĩgũ mũa mera majagũ mũa acaweregũ

árĩgũcumĩ. Ĩgũ eropa eracũ ĩgũre ðaro peeque mũa,” arĩmũriñumi Moise erãre.

³⁸ Moise masa marirogue mari acawererã Israe masa mera arĩmũriñumi. Eropĩgũ mari ñecu sũmarã iribojegue majarã mera arĩñumi ĩgũ. Eropa arĩgũ Sinaĩ waĩcũdigũ Ʃtãgũgue ĩgũre weredigũ anyu mera arĩñumi. Eroque Goãmũ ĩgũ dorerire aĩdigũ arĩñumi Moise.

³⁹⁻⁴⁰ “Iri dorerire Ʃtãgũgue Moise waha aĩrisubu mari ñecu sũmarã mũra Egiptogue dujadarã Moisere tarinũgañuma. Erã ĩgũre gamebiriñuma. Eropa gamebirã Aarðre Moise tĩgũre ðpa arĩñuma: “¿Ĩgũ Moise marire Egiptogue aĩgãridi dohpa wayuri ĩgũ? Masibirica mari. Eropĩgũ goãmarã wéanirãre iique mari yarã arĩmorã. Eropirã mũ wéanirã marire doreri mari wadiari maha marire aĩgãrãcoma,” arĩñuma erã.

⁴¹ Eropa arĩra pũhrũ erã wecũre oro mera wéañuma. Eropa iituhaja, erã waimũrãre wejẽ, erã wéadigũ pohro aĩgãri umupeoñuma ĩgũre. Eropirã erã erã iidigũre wecũre ĩarã, mucubiri, bosenu iĩñuma.

⁴² Eropĩgũ Goãmũ erã wéadigũre erã umupeocũ ĩagũ, erãre cóãcãriñumi. “Erã yũre cóãrã gajirã Ʃmaro majarãpũre umupeo curaporo,” arĩgũ cohãgã wariñumi. Goãmũ yare weremũhtanirã ðpa arĩ gojañuma Goãmũ wereniguirire:

Mũa Israe masa, yũre ñe ñero iiabũ. Masa marirogue cuarenta bojori gohra arĩrã waimũrãre mũa wejẽnirãre mũa soenirãre yũre mũa obodiro dopa ta umupeorabũ mũa.

Eropirã yũpũre umupeobirabũ mũa.

⁴³ Eropirã mũa Molo waĩcũgũre umupe-orã árĩrã, ĩgũre umupeori wihire iiabũ mũa. Eropirã “Refa gũa goãmũ áhrimi,” arĩrã ĩgũ necãmũ mũa wéadigũre mũa umupeoabũ daja. Erã wéanirãre mũa iinirãre mũa umupeoabũ. Mũa eropa iira waja mũare Babilonia sipũgue cóãbeogũra yũhũ, arĩñumi Goãmũ ĩgũ ya weremũhtanirã mera.

⁴⁴ “Eropirã masa marirogue Goãmũ masa mera ĩgũ árĩri wihire waimũrã gasiri wihire opamũriñuma mari ñecũ sũmarã iribojegue majarã. Iri wihi Goãmũ masa mera ĩgũ wereniguiiri wihi árĩyoro. Iri wihigue Goãmũ dorerire ĩgũ gojara mijiri utã mijiri árĩyoro. Iri wihire Goãmũ ĩgũ werediro dopa ta Moiserẽ ĩgũ ĩhmudiro dopa ta ii ĩhacũdoreñumi Goãmũ Moiserẽ.

⁴⁵ Pũhrũgue majarã mari ñecũ sũmarã Josué mera iri wihire aĩgãriñuma mari árĩri yebague erarã. Erã iri yebaguere Goãmũ ĩgũ apira yebaguere erã eraboro core iri yeba majarã mũrare Goãmũ cóãcãñumi. Irisubure Goãmũre umupeori wihire waimũrã gasiri wihire opamũriñuma mari ñecũ sũmarã. Ne Davi mũrũ ĩgũ árĩcũgue opatuñuma iri wihire.

⁴⁶ Eropigũ Davi mũrũ Goãmũre mucubiricũ iĩñumi. Eropigũ Goãmũ ya wihi árĩburire iidiagũ Davipũ serẽriñumi Goãmũre.

⁴⁷ ĩgũ eropa serẽquerecũ ta Salomopũ Davi magũpũ Goãmũ ya wihire iĩñumi.

⁴⁸ ĩgũ eropa iiquerecũ ta Goãmũpũ masa erã iira wihiguere árĩbeami. Ōpa arĩñumi Goãmũ wereniguirire weremũhtadigũ:

49 Ûmarogue yu doaro ãhraa. Ero doagu dorea yũhũ. Eropiro yebapu yu guburire duhpeoro iro dopa ta ãhraa. Yũhũ turatariagu ãhraa. Yaha wihi árĩborore iimasibea mũa. Goãmũ yu árĩcũ yu árĩburi wihire mũa iimasibea.

50 Yu basi i yebare árĩpehrero iabũ yũhũ, arĩmi Goãmũ, arĩ gojañumi Goãmũ yare weremuhtadigu, arĩpu Esteban.

51 Eropigu õpa werenemopu Esteban erãre:

—Mũa ne yũhridiadirã ãhraa. Goãmũ yare peequererã, ãgure yũhridiabea. Espĩritu Santore tarinũgataria mũa. Mũa ñecũ sumarã erã iidiro dopa ta iiaa mũa.

52 Mũa ñecũ sumarã árĩpehrerã Goãmũ ya weremuhtanirãre ñero iĩñuma. Erã Goãmũ yare weremuhtanirãpu “Pũhrũ õagu Goãmũ yare weremuhtagu arigucumi,” arĩ erã wererã árĩcũ peeñuma mũa ñecũ sumarã mũa. Eropa arĩ werenirã mũrare wejẽmuriñuma. Eropirã “Õagu,” erã arĩgure mũa sã dohpaguere ãgu ya curu majarã árĩquererã ta ãgure wejẽabũ.

53 Goãmũ dorerire anyuapu wereriñuma mũare. Eropirã mũa iri dorerire opariyoro. Eropirã iri dorerire tarinũgabũ mũa, arĩ wereniguitupu pare Esteban.

Erã Estebanre utãyeri mera dea wejẽñorã

54 ãgu eroparĩcũ peerã erãpu bũrigã guañorã. Eropa turaro guarã, gũhyarã wañorã.

55 Erã eropa guaquerecũ ta ãgu Espĩritu Santo ãgu dorero dopa ta iipehogu árĩgu, ãgu turarire õaro opagu árĩgu, ãmarogue ãhamemuju Goãmũ

gosesiririre ĩapũ Esteban. Jesu Goãmu diayerũ ĩgu niguicũ ĩapũ ĩgu.

⁵⁶ Eropa ĩagu õpa arĩpũ

—Umarogue merogã ero tuweamaacũ Jesu Goãmu obeodigu Goãmu diayerũ ĩgu niguicũ ĩhaa yũhũ, arĩpũ Esteban.

⁵⁷ ĩgu eroparĩcũ peerã ta erã burigã gaguinigu, erã gamirire bihacã, yujuro mera ĩgu pohrogue omagã, ĩgure ñeañorã.

⁵⁸ Ñehatuhaja, ĩgure aĩgã, iri maca tũro pohrogue cóañorã ĩgure. Eropirã utãyeri mera dea wejẽcãñorã erã ĩgure. Erã eropa wejẽboro core ĩgure utãyeri mera deamorã erã weca maja suhrire tuwea, mamũre Saulo waĩcũgure iri suhrire opabasadoreñorã erã.

⁵⁹ Eropigu Esteban erã ĩgure utãyeri mera dea wejẽrisubu õpa arĩpũ.

—Jesu yũ Opũ, yũ sĩporãre aĩque, arĩpu.

⁶⁰ Eropigu ĩgu mereja õpa arĩpũ:

—Opũ Jesu, oã dohpague ñero erã yũre iirire erãre dipuwaja moabita mũhũ, arĩpũ Esteban.

Eropa arĩtuhajagu ta sĩria wapũ ĩgu.

8

¹ Eropigu Esteban ĩgu sĩricũ ĩagu, “Õhaa,” arĩpũ Saulo.

Saulopũ Jesu yarãre ñero iipũ

Eropirã irinũre ta Jesu yarãre Jerusalẽgue arĩrãre ñero iinũgañorã Jesure gamebirãpũ. Erã eropa ñero iicũ Jesu yarã Judea yebague, Samaria yebague yoarogue duhrisirigã wañorã. Jesu ĩgu apinirã dihta wabiriñorã.

² Eropirã gajirã Goãmure umupeorã Esteban dɔpɔ mɔraroɔre yaa, buɔrigã oreñoɔrã erã.

³ Saulopɔ Jesu yarãre ñetariaro iimɔriɔpɔ. Īɔɔ erã ya wirigue ñaja, ɔmare, nomere ñeha, peresugue bihadobomɔriɔpɔ.

Samariague Jesu yare buheɔpɔ Felipe

⁴ Eropirã yoarogue wasirinirã Jesu yarãpɔ Jesu yare buheñoɔrã.

⁵ Eropigɔ Felipe Samaria waĩcɔri macague eja, Jesu yare buheɔpɔ iri maca majarãre.

⁶ Īɔɔ eropa buhecũ ero majarã õaro peeñoɔrã. Eropirã Goãmɔ turari mera deyoro moarire Īɔɔ ii ĩhmucũ ĩañoɔrã erã. Eropa ĩarã ĩɔɔre õaro peeñoɔrã erã.

⁷ Bajarã watẽa ñajasũnirãre ĩɔɔ pohro erã eracũ ĩagu watẽapɔre wadorepɔ ĩɔɔ. Watẽapɔ buɔrigã gaguinigui, duhugã waha wañoɔrã erãre. Eropigɔ bajarã dɔpɔ buhanirãre, curimasi-birãre dɔpɔ õarã iimɔriɔpɔ.

⁸ Īɔɔ eropa iicũ ĩarã iri maca majarã bajarã masa mucubiriñoɔrã.

⁹ Irisubure Simo waĩcɔɔɔ iri maca majagɔ yee arĩpɔ, Eropigɔ yeea erã iirare ii ĩhmumɔriɔpɔ Samaria majarãre. Īɔɔ eropa ii ĩhmucũ ero majarã ĩha ɔca wa ĩɔɔre guhyadiaro mera ĩarã arĩñoɔrã.

—Yũhɔ masipehogɔ ãhraa, arĩpɔ Simopɔ erãre.

¹⁰ Īɔɔ eropa iicũ ĩarã masapɔ õpa arĩmɔriɔriñoɔrã:

—Ihĩ Goãmũ ya turari opagũ ãhrimi. Goãmũ iro dopa turagũ ãhrimi, arĩmũriñorã masa erã oparã mera. Erã árĩpehrerã õaro peeñorã ïgũre.

11 Ìgũ yeea erã iiri ïgũ purisiriri mera yoari boje ii ïhmumũripũ erãre. Ìgũ eropa ii ïhmucũ ïarã erã Ʃca wamũriñorã. Eropirã erã ïgũre umupeomũriñorã.

12 Felipepũ erã ïgũre eropa umupeoquerecũ Goãmũ ïgũ opũ árĩrire, Jesucristo yare õari buherire werepũ. Ìgũ eropa werecũ erã ïgũre õaro peeñorã. Erã eropa õaro peecũ ïagũ ũma, nome mera waĩyerũ Felipe.

13 Eropigũ Simo ïgũ yee sã Felipepe õaro peerpũ. Eropigũ ïgũ sãre waĩyerũ. Ìgũ eropa iira pũhrũ Felipe mera dujarũ ïgũ. Felipepũ Goãmũ turari mera ii ïhmucũ ïagũ, dorecũrã õarã ïgũ iicũ ïagũ Simo ïha Ʃca wamũripũ.

14 Eropirã Samaria majarã Goãmũ yare erã burigã gamecũ peebeomũriñorã Jerusaléngue árĩrã Jesu ïgũ apinirãpũ. Erã eropa peebeorã Pedore, Ñu sãre obeoñorã Samariague.

15 Eroque erã ejara pũhrũ Pedro sã Goãmũre serẽbasañorã. “Oã Samaria majarã mũre umupeorã mũ Espĩritu Santore opaporo,” arĩ, serẽbasañorã erã Goãmũre.

16 Erã Samaria majarã Jesucristo waĩ mera waĩyesũnirã árĩñorã. Iri dihtare masiñorã erã. Eropirã Espĩritu Santore opabiriniñorã dohpa.

17 Eropigũ Pedro Ñu mera Samaria majarãre erã mojotorire erã weca duhpeora pũhrũ Espĩritu Santore opañogañorã erã.

18 Eropigu Pedro sã erã ya mojotori mera erã duhpeora pũhrũ Espíritu Santo eracũ ñapũ Simo yeerũ. Eropa ñagũ árĩgũ, erã turarire gamegũ niyeru mera wajayediariũ.

19 Ōpa arĩriũ Simo:

—Yũ sãre oque i turarire. Yũ sã yũ mojotori mera masa weca duhpeodiaca Espíritu Santore erã ñeaboro dopa. Eropigu i yũ iiburi wajare wajayediaa, arĩriũ Simo erãre.

20 Īgũ eroparĩcũ peegũ Pedro ōpa arĩriũ.

—Mũ niyeru mera Goãmũ ya turarire mũ asũdiara waja mũ niyeru mera ta peamegue waque mũhũ.

21 Goãmũ mũ pepirire masimi. Mũhũ ñegũ árĩnia. Eropirgũ ire gũa iirire iimasibea mũhũ. I mũ iirino árĩbeaa.

22-23 Bũrigã peyocua mũhũ. Eropigu mũ ñeri iirire ne duhumasibea mũhũ. Eropigu ire mũhũ ñero iirare bujawereque mũhũ. Goãmure mũ ñero pepirire ero diaye ta serẽque mũhũ. Mũhũ eropa iicũ ñagũ ĩgũ mũ ñerire cãdijibocumi, arĩ wererũ Pedro ĩgũre.

24 Īgũ eroparĩcũ peegũ Simo yũhriũ ĩgũre.

—Yũre serẽbasaque mũa Goãmure mũ arĩdiro dopa yũ wabiriboro dopa. Iri waja peamegue wadiabeaa yũhũ, arĩriũ Simo ĩgũre.

25 Ero pũhrũ Pedro Ñũ mera Goãmũ yare wereñorã. “Jesu ĩgũ masa mũriacũ ñabũ gũa,” arĩ, Samaria yeba árĩri macari majarãre ōari buherire buheñorã. Erãre Goãmũ yare buhetuhaja Jerusaléngue dujaa wañorã.

Felipe Etiopía yeba majagure buherũ

26 Eropii Goãmũ ãgu obeodigu anyu Felipere werepũ:

—Dohpaguere õdoca surgue waque. Jerusalén pohro árĩri mague Gazague wari mague waque, arĩ werepũ anyu Felipere. Iri maha masa marirogue árĩyoro.

27 ãgu eroparĩcũ peegu ãgupũ iri mague waha wapũ. Pũhrũ iri mague yujugũ masure bocatĩribu iipũ. ãgu bocatĩribu árĩpũ Etiopía yeba majagũ opũ. Eropigu Candace waĩcũgo Etiopía majago opo bũro yare niyerure árĩpehrerire ãhadibugũ árĩpũ. Eropigu ãgu Jerusaléngue mari Pagure umupeogu ejadi árĩpũ.

28 ãgu ya macague tũrudiru mera dujaagu irirugue waqueregu ta buhegu iipũ. Goãmũ yare weremũhtadigu Isaia ãgu gojarapũre buhegu iipũ.

29 Eropigu Espiritupũ Felipere õpa arĩ werepũ.

—Sihĩ tũrudirugue wagu pohrogue waque, arĩpũ Espiritu Santo ãgure.

30 ãgu eroparĩcũ peegu, Felipepũ tũrudiru pohrogue omagã, Isaia ãgu gojarare Etiopía majagũ ãgu buhecũ peepũ. Eropa peegu Felipe serẽpipũ ãgure.

—¿Mũ buherire masiri mũhũ? arĩpũ ãgu.

31 ãgu eroparĩcũ peegu Etiopía majagũ õpa arĩ yũhrĩpũ:

—Gajigu yũre weretaugu maricũ õaro masi-beaa yũhũ. Ohõ yũre weredoagu arique yũhũ dipaba, arĩ yũhrĩpũ ãgu Felipere.

—Áũ, arĩ, doajapũ ãgu pohro.

³² Eropii Goãmũ yare Etiopía majagũ ãgũ buheripũ õpa árĩyoro:

Ovejare erã ñeha wejẽdiro dopa ta ãgũ sãre ñeha wejẽrãcoma masa. Eropigũ ovejagãre ãgũ poare erã seacũ ãgũ gaguiniguibiro dopa ta ãgũ masũ sã ejari mariro árĩgũcumĩ.

³³ ãgũre erã wereyarãcoma. Eropirã ãgũ ãgũ ñero iibiriquerecũ ta erãpũ ñero iirãcoma ãgũre. ãgũ i yebague ãgũ árĩcũ erã ãgũre wejẽrãcoma. Eropigũ ãgũ porã marigũ sĩria wagũcumĩ, arĩ gojara árĩyoro.

³⁴ Iripũ eroparĩcũ ãgũ, Etiopía majagũ Felipe serẽpipũ:

—Wereque yũre. ¿Õpa Isaia ãgũ arĩgũ nihino árĩcuri ihĩ? ¿Isaia ãgũ basi weregũ iicuri? ¿O gajigũre weregũ iicuri? arĩ serẽpipũ Etiopía majagũ.

³⁵ ãgũ eropa serẽpi ãacũ peegũ Felipe iripũre ãha, Jesu yare werepũ Etiopía majagũre.

³⁶ Eropirã erã iriru mera waha, maugãgue ejañorã.

—ãaque. Ohõ maugã ãhraa. I maugãgue yũre waĩyeque, arĩpũ Etiopía majagũ.

³⁷ —Jesure mũhũ õaro umupeocũ ãgũ mũre waĩyegũra, arĩpũ Felipe ãgũre.

—Jesure umupeoa yũhũ. ãgũ Cristo Goãmũ magũ ãhrimi. Irire õaro masia yũhũ, arĩpũ Etiopía majagũ.

³⁸ Eropa arĩgũ ta ãgũ tũrudiru autugũre yaudorepũ. Iriru yũsumerejara pũhrũ wiriañorã erã. Wiria waha, iriyagãgue eja, ñumu wiri

nugajañorã. Ero ñumunugaja, Felipeꝝ ïgure waïyepꝝ.

³⁹ Waïyetuhaja erã majajanugajacũ Goãmũ ïgũ Espíritu Felipeꝝ aïgã warũ. ïgũ eropa wara pũhrũ Etiopía majagũ ðaro mucubirigũ ïgũ ya yebague dujaa warũ. ïgũ eropa iira ñjutayacũ ne dipaturi Felipeꝝ ïabiripũ.

⁴⁰ Felipeꝝ eropa iituhaja Azotogue ejaꝝ. Eropigũ baja macarire ðari buherire buherũ masare. Pũ Cesareague buhetumæripũ.

9

Saulo Jesucristore ïagũ ïgure umureonugapũ

¹ Irisubure Saulo Jesu yarãre ïhaturigũ, “Erãre wejẽgũra,” arïgũ, ïgũ opa pohrogue warũ.

² Eroque ejaꝝ ïgũ gojarapũrere serẽpũ pahia opũre. Opa arïpũ:

—Damasco maca maja wirigue mari buheri wirigue Jesu yarãre, umare, nomere yũhũ erãre bocaia, ñeha dihri, Jerusalengue aïgãrigũra. Iri wirigue árĩrãre yũ erãre ñeaburipũre paperapũre yũre goja oque, arï serẽpũ pahia opũre.

³ Iripũre aïtuhaja, waha, ïgũ Damasco pohro ïgũ ejaꝝ iicũ gohra umaro maja goesiri medijuyoro ïgure.

⁴ Eropa goesiri medijucũ ta ïgũ yebague mehmerejagũ, wereniguicũ peepũ.

—Saulo, Saulo, ¿duhpigũ mũhũ yũre ñero iiri? arïro cariyoro.

⁵ —Opa, ¿nihino ãhriri mũhũ? arïpũ Saulo.

—Yuhũ mũ ñero iigu ta ãhraa arĩpũ Jesu. Mũhũ yũ mera guagu yũre yũhribigu, mũ basi ta ñero tariaa, arĩpũ Jesu Saulore.

⁶ Īgu eroparĩcũ Saulo güiri mera naragãnijagu õpa serẽpirũ:

—Opũ, ¿dohpa yũhũ iicũ gahmeri mũhũ? arĩpũ Saulo.

Īgu eroparĩcũ õpa arĩpũ Jesu ĩgũre:

—Wahgãnũgajaque mũhũ. Macague waque. Iri macague ejacũ ero majagu mũ iiburire weregũcumi mũre, arĩpũ Jesu Saulore.

⁷ Īgu eroparĩcũ Saulo mera majarãpũ ĩgu werenigũiri dihtare peeñorã. Jesupũre ĩabiriñorã. Īgu eropa wacũ ĩarã güirã erã wereniguimasibiriñorã.

⁸ Eropigu Saulo yebague oyadigu wahgãnũgaja, ĩgu ĩacũ ĩgu cuiiri deyobiriyoro. Eropirã erã ĩgu mojtore ñeha, Damascogue tũã wahgã wañorã erã ĩgũre.

⁹ Eropigu ĩgu uhrenũ gohra ne ĩabiri, babiri, ne ihribiripũ.

¹⁰ Eropii Jesu ĩgu buhegu Ananía waĩcũgu Damasco arĩpũ. Eropigu Jesu dehyoapũ Ananiare. Eropa dehyoagu piyupũ ĩgũre:

—Ananía, ¿ãhriri? arĩpũ Jesu ĩgũre.

—Ãhraa yũ, arĩ yũhripũ Ananía ĩgũre.

¹¹ Īgu eroparĩcũ Jesu ĩgũre wererũ.

—Diaye waĩcũri mague waque. Eropa wagu Juda ya wihigue Tarso majagũre Saulo waĩcũgũre amaque. Īgu Goãmũre serẽniguigu iicumĩ.

12 Eropigu quëro dopa ta ïgu ïarare ïagu iicumi eroguerë. Õpa árïrë ïagu iicumi. Mũhũ mã mojtore ïgu weca duhpeo, ïgu cuiri ðaro wacũ ïagu iicumi ïgure dehyoarare, arïpũ Jesu Ananíare.

13 ïgu eroparĩcũ peegu Ananíapũ ðpa arïpũ:

—Opũ, ïgu mã yarãre ðarãre Jerusalén majarãre ñero iiapũ. Bajarã masa yũre eropa arï wereama.

14 Eropigu ðre ïgu árïpehrerã mãre umupeorãre peresu iigu arigu iiapũ. Pahia oparã ïgure eropa iidoreaõrã, arïpũ Ananía Jesure.

15 ïgu eropa arïquerecũ Jesupũ wererũ ïgure.

—ïgu Saulopũ yũ beyedigũ ãhrimi. ïgu yaha buherire baja macari majarãre, oparãre, Israe masa sãre buhegũcumi.

16 Eropigu bajasuburi yahare ïgu buheri waja ïgu ñero tarigũcumi. Irëre ïgure masicũ iigura. Eropigu waque mãhũ, arïpũ Jesu Ananíare.

17 ïgu eropa arïra pũhrũ Ananíapũ, waha eja, Saulo ïgu árïri wihigue ñaja warũ. Ñajaja, ïgu mojtore Saulo weca duhpeo, wererũ ïgure:

—Acaweregu Saulo, mari Opũ Jesupũ mague mãre dehyoadigu yũre obeoami mã cuiri mã ïaboro dopa. Espiritu Santore mã opaboro dopa, ïgu dorediro dopa mã iiboro dopa yũre obeoami mã pohrogue, arï wererũ Ananía Saulore.

18 ïgu eroparĩcũ ta ïgu cuirire wai nuturi dopa bejarire ïgu cuirire cohrodijacũ ïapũ pare Saulo. ïgu eropa ïatuhara pũhrũ ïgu wahgãnugajacũ gajigupũ waïyerũ ïgure.

19 Eropigu ïgu, ïgu bara pũhrũ turagu warũ.

Saulo Damascogue Jesu yare buhenugapũ

Eropii bajamenũri Damascogue Jesu yarã mera árĩmũripũ Saulo.

²⁰ Eropigũ irisubure ta ĩgũ judio masa buheri wiri árĩgũ, Jesu yare buhepũ masare. “Jesu Goãmũ magũ ta ãhrimi,” arĩ werepũ Saulo.

²¹ ĩgũ eropa werecũ ĩarã árĩpehrerã ĩgure peerã uca wañorã.

—Ihĩ Goãmũ yarãre Jesure umupeorãre ñero iidigũ ãhrimi. Eropigũ ĩgũ erãre ñeha, dihri, pahia oparãre odiadigũ árĩrimi. Eropiidiagu õguere aridigũ árĩrimi, arĩñorã masa ĩgure peerã.

²² Erã eroparĩquerecũ Saulo gũiro mariro turaro mera buhenugapũ. Judio masare Damasco majarãre õaro werepũ. “Ihĩ Jesu diaye ta Cristo marire taubu ãhrimi,” ĩgũ arĩ werecũ erãpũ ĩgure “Gũyagũ iimi ihĩ,” arĩmasibiriñorã ĩgure.

Saulo duhri wahgãpũ judio masare

²³ Eropirã bajanũri pũhrũ judio masa ĩgure wejẽdiañorã. Eropirã erã basi gamenere ĩgure erã wejẽburire wereniguiñorã.

²⁴ Eropirã ĩgure wejẽdiarã, iri maca maja disiporore umũre ñami sãre coremũriñorã. Saulo wiricũ ĩha wejẽmorã coreñorã. Erã eropa wejẽdiaquerecũ Saulo erã wejẽdiarire masipũ ĩgũ mera majarã mera.

²⁵ Eropirã ñamigue Saulo buherã ĩgure puibu wũari puibu mera aĩsã, iri maca maja sãriro pũrũpũgue duhudijucãñorã ĩgure.

Saulo Jerusalén árĩpũ

26 Eropigũ Saulo Jerusaléngue ejagũ, erogue Jesu yarã mera ãgũ árĩdiaripũ. Ìgũ eropa árĩdiacũ erã ãgũre “Jesure umupeogũ árĩbeamĩ ihĩ,” arĩñorã. Ìgũre gũĩ arĩñorã.

27 Erã eropa gũiquerecũ ta Bernabépũ ãgũre aĩgãpũ Jesu ãgũ apinirã pohrogue. Eropigũ Saulo mague Jesure ãgũ ãarare, Jesu mera ãgũ wereniguirare, Damascogue gũiro mariro Jesu yare ãgũ buhenugarare werepũ Bernabépũ.

28 Ìgũ eropa werera pũhrũ Saulo erã mera ñajagũ, Jerusaléngue erã mera árĩmũripũ.

29 Eropigũ ãgũ gũiro mariro Jesu yare buhepũ. Eropigũ ãgũ judio masare Jesu yare weretarinũgagũ iipũ. Erã judio masa griego masa ya wereniguirã arĩñorã. Eropirã Saulo ãgũ eropa weretarinũgari waja ãgũre wejẽdiañorã.

30 Erã eropa wejẽdiacũ ãarã, Saulo mera majarã Jesu yarãpũ ãgũre Cesareague aĩduhriãgã waha wañorã. Erogue ãgũre sihu árĩniguirĩ Tarsogue obeoñorã erã ãgũre.

31 Eropi árĩpehrerogue Judea yebague, Galilea yebague, Samaria yebague Goãmũ yarã õaro árĩmũriñorã. Irisubure ne masa ñero iibirimũriñorã erãre. Eropirã õaro buheñorã erã. Eropirã erã Goãmũre gũhyadiaro ãañorã. Espíritu Santo erãre ãgũ itamucũ erãpũ Jesure umupeorã bajarã wañorã.

Pedro Eneare õagũ wacũ iipũ

32 Eropii Pedro árĩpehreri macarigue wagũ, Jesu yarã Lida majarã pohrogue sãre ejapũ ãgũ.

³³ Erogue ejagũ Enea waĩcũgure bocajarũ. Enea dũpũ bũhadigũ árĩgũ, ocho bojori gohra erã pũtãpidi oyamũripũ.

³⁴ Eropigũ Pedropũ ĩgũre õpa arĩpũ:

—Enea, Jesucristo õagũ árĩcũ iimi mũre. Wahgãnũgajaque. Mũre pũtãpira gasirore amuque, arĩpũ Pedro ĩgũre.

Īgũ eroparĩcũ ta ĩgũ wahgãnũgaja waha wapũ.

³⁵ Eropirã árĩpehrerã Lida majarã, Sarón majarã ĩgũre ĩarã, erã erã ñeri iirare duhu, Jesure umupeonũgañorã.

Dorca waĩcũgore masupũ Pedro Jesu turari mera

³⁶ Eropii Jope waĩcũri macague Jesure umupeogo Tabita waĩcũgo árĩpo. Igo waĩ Tabita griego ya wereniguirĩ mera Dorca ãhraa. Igo õarire iigo baja omũriipo masare.

³⁷ Eropigo irisubure igo dorecũ wahgũ, sĩria wamũriipo. Igo sĩricũ ĩarã, erã igo dũpũ mũrarore õaro coe, umaro maja taribugue apiñorã igore.

³⁸ Lida waĩcũri maca Jope pohrogue árĩyoro. Ero eropa árĩcũ Jesure umupeorã Jope maca majarã Pedro Lidague ĩgũ árĩcũ peebeoñorã. Eropa peebeorã perã umare obeoñorã Pedro pohrogue. Īgũ pohrogue ejarã wereñorã Pedrorre erã.

—Yojaro mera waque gũa árĩirogue, arĩ wereñorã erã.

³⁹ Erã eroparĩcũ peegũ erã mera waha wapũ ĩgũ. Erogue ĩgũre erã aĩ ejara pũhrũ umaro maja taribugue sĩridigo pohro aĩmũria wañorã ĩgũre. Pedro árĩcũ ĩha árĩpehrerã wapeweyarã

nome orerã ĩḡu pohro ejanuḡamuriñorã. Tabita erã mera árĩnigogue baja suhrire iibasamuriḡo. Eropirã erã igo eabasara suhri m̄arare ĩhmuñorã Pedrore.

⁴⁰ Pedro erãre iri taribugue árĩrãre wiriadoreḡu. Erã wiriara p̄hr̄u ĩḡu mereja, Goãmure igore serēbasap̄u. Eropiḡu igo d̄p̄u m̄ararore maji ĩha,

—Tabita, wahḡãque, arĩḡu ĩḡu.

Ĩḡu eroparĩcũ ta igop̄u ĩha wahḡũ, Pedrore ĩha, wahḡã doajapo.

⁴¹ Igo eropa wahḡã doajacũ ĩha, ĩḡu igo mojotore ñeha tarawahḡũ nugup̄u igore. Eropiḡu ĩḡu ero majarãre Jesu yarãre, wapeweyarãre sihubeo, igore ojocarigore wiap̄u erãre.

⁴² ĩḡu eropa iira p̄hr̄u árĩpehrerã Jope majarã irire masirã bajarã masa Jesure umupeonuḡañorã.

⁴³ P̄hr̄u Jopegue Simo waimurã gasirire amuḡu mera bajaruri Pedro ĩḡu mera árĩḡu.

10

Pedro Corneliore Jesu yare werenuḡap̄u

¹ Irisubure Cesareague Cornelio waĩcuḡu árĩḡu. ĩḡu cien surara op̄u árĩḡu. Erã surarap̄u erã ya curu Italiano waĩcuḡo ro.

² Cornelio ĩḡu ya wihi majarã mera mari Pagure umupeorã, ḡuhyadiaro ĩarã árĩñorã. Eropiḡu ĩḡu judio masa mojomorocurãre itamuḡu baja gajinore omuriḡu. Eropiḡu ĩḡu umuri n̄cu mari Pagure serēmuriḡu.

³ Eropii ñamicague tres árĩcũgue Goãmũ yagu anyu ïgũre dehyoapũ. Eropa dehyoagu Cornelio pohrogue ñajajapũ.

—Cornelio, arĩ piyupũ anyu ïgũre.

⁴ Eropigu Cornelio ïgũre ïha güigũ õpa arĩpũ:

—Opũ, ¿ñehenore gahmeri? arĩpũ ïgũ.

—Masare mũ orare, mari Pagũre mũ serẽniguirare Goãmũ peeami.

⁵ Eropigu Jopegue mũ umare obeoque. Erogue Simo Pedro waĩcũgu añhrimi. ïgũre aĩgãridoreque mũ umare.

⁶ ïgu gajigu Simo waimurã gasiri amugu pohro, wũariya tũro árĩri wihi ta añhrimi, arĩpũ anyu Corneliore.

⁷ Anyu eropa arĩtuhaja, wiria waha wapũ. ïgu wiriara pũhrũ Cornelio perãre ïgũre itamurãre yujugu ïgu surara mera majagũre si-hupũ. Surarapũ Goãmũre umupeogu árĩgu, umuri nũcũ Corneliore itamudigu arĩpũ.

⁸ Eropigu Cornelio erãre werepeho, Jopegue obeopũ erãre.

⁹ Eropi gajinũ Jopegue erã warisubu goeri boje gohra árĩcũ Pedropũ wihi wecague Goãmũre serẽgu wapũ.

¹⁰ Eropigu ïgũre oa pũricũ badiapũ. Eropigu gajirã barire erã moarisubu ïgũpũ dehyoacũ ïapũ.

¹¹ Umare pãrimaacũ, wũari gasiro wapicũrisubu pepũri ojogorori dirira gasiro دچارĩcũ ïapũ.

12 Iri gasiro pohecague bajarã waimurã nugu majarã, yebague paha curirã, mirimagu porã majarã árñorã.

13 Irire igu ñara pũru, Pedore wereniguiro caricũ peepũ.

—Pedro, wahgãnugajaque. Oãre wejẽ baque, arĩro cariyoro igure.

14 Igu eroparĩcũ peequeregu ta Pedro òpa arĩru:

—Orũ, ne erãre babeaa yũũ. Ñerãre, Goãmu igu badorebirinirãre ne babirimurabu yũũ, arĩru Pedro.

15 Eropigu Pedro dipaturi wereniguiro caricũ peepũ.

—Goãmu, “Õarã àhrima,” igu arĩnirãre “Ñerã àhrima,” arĩbiricãque mũũ erãre, arĩro cariyoro Pedore.

16 Eropiũ ùhresubu eropa arĩ wereniguiro pũru iri gasiro ùmarogue mũria wayoro daja.

17 Eropigu Pedro burigã guña “¿Dohpa arĩdiari iiri yũre eropa dehyoaro?” arĩ pepiru igu igu basi. Igu eropa pepirisubu Cornelio ùma igu obeonirãru Pedro ya wihigue ejañorã. “¿Simo ya wihi nohogue àhriri?” arĩ, erã serẽpira pũru igu ya wihigue ejañorã erã.

18 Eropirã erã serẽ ñha purumujuñorã. “¿Simo Pedro waĩcũgu i wihire àhriri?” arĩ serẽpi ñañorã erã.

19 Eropigu Pedro igu pepirisubu Espĩritu Santo igure werepu:

—Ñaque. Ùrerã ùma mũre amarã iima.

20 Wahgãnugajaque. Dijaque. Erã mera waque. “¿Dohparĩri?” arĩ pepibigu ta waque

õaro mera. Yurũ erãre õguere obeoabũ, arĩrũ Espĩritu Santo Pedrore.

²¹ Īgũ eroparĩcũ peegũ Pedro erã pohroque dija wa,

—Īaque. Ohõ āhraa yũhũ mũa amagārigũ. ¿Duhpirã arirã iari mũa yũ pohro arirã? arĩrũ Pedro erãre.

²² Īgũ eroparĩcũ ta erãrũ õpa arĩñorã.

—Cornelio cien surara opũ, õarire iigũ, mari Pagure guhyadiaro mera umupeogũ, árĩpehrerã judio masa “Õagũ” erã arĩgũ mũre sihgāridoregũ obeoami guare. Goãmũ õagũ anyu Corneliore mũre sihudoreapũ. Ōpa arãrũ: “Pedrore mũa ya wihigue aĩgāridoreque mũa umare. Eropiĩ ĩgũ mũre weregũcumĩ,” arĩ, sihudoreapũ anyu Corneliore, arĩ wereñorã Cornelio Pedrore ĩgũ sihudorenirãrũ.

²³ Erã eroparĩcũ Pedropũ erãre ñajaridore, bari oho, ĩgũ ya wihigue carĩdorepũ erãre. Eropigũ gajinũ Pedro wahgã, erã mera waha wapũ. Eropirã gajirã Cristo yarã Jope majarã Pedrore wapicũgãñorã.

²⁴ Gajinũ erã Cesareague ejañorã. Eropigũ Corneliopũ ĩgũ acawererãre, ĩgũ mera majarã sãre sihu gameneo, Pedrore corepũ.

²⁵ Eropigũ Pedro Cornelio ya wihi pohroque ĩgũ aricũ ĩagũ Corneliopũ ĩgũre bocafĩri wiria, ĩgũ guburi pohro merejarũ.

²⁶ Īgũ eropa iicũ Pedropũ ĩgũre aĩ wahgũnugupũ.

—Niguique mũhũ. Yũ sã mũa iro dopa ta arĩgũ āhraa. Goãmũ árĩbeaa, arĩrũ Pedro ĩgũre.

27 Īḡu eropa arītuḡajara pūhrū Cornelio ĩḡure aĩñaja wapū ĩḡu ya wihigue. Erogue ñajajagū masa bajarā iri wihigue gamenere ĩḡure corerāre ĩapū Pedro.

28 Eropigū Pedro erāre wererū:

—Judio masū árīqueregū ta gajī curu majarā mera árīḡu gūa dorerire tarinūgagū iiaa yūhū. Irire ōaro masia mūa. Eropigū gajī curu majarāre “Ñerā āhrima,” arīdorebirami Goāmū. Ōpa arī wereami ĩḡu yūre.

29 Īḡu eroparīcū peegū ōguere mūa pohroguere ahrabū. Mūa yūre sihubeocū “Ne wasome,” arībirabū. ¿Dohpa árīronore yūhū ōgue aricū gahmeari mūa? arīpū Pedro erāre.

30 Īḡu eroparīcū peegū Corneliorū ōpa arīpū:

—Tres árīcū i horano gohra ta mari Pagū yagū anyu yūre dehyoami. Wapicūrinū wahaa ĩḡu yūre dehyoara pūhrū. Irinū ta mari Pagūre yū serēniguirisubū cuimijuri suhricūḡu yū pohro dehyonūgajami.

31 Eropigū ĩḡu yūre ōpa arāmi: “Cornelio, mūhū mari Pagū mera mū serēcū ĩḡu peeami. Eropigū mojomorocūrāre erā gamerire mū ocū ĩagū mari Pagū mū mera mucubirigū itamugūcumī.

32 Eropigū Jopegue mū ūmare obeoque Simo Pedro waīcūḡure mū pohroḡue erā aĩḡāricū. Īḡu gajigū Simo waimūrā gasiri amugū ya wihi, wūariya tūro pohro árīri wihi āhrimi ĩḡu. Īḡu mū pohro eragū mūre wererūcumī,” arī wereami ĩḡu yūre.

33 Īḡu eroparĩcũ peegu yu umare mure aĩḡaridoreḡu obeoabũ yũhũ. Eropigũ ðaro iigu ahraya mũhũ ḡua pohroguere. Eropirã ḡua árĩpehrerã ðre mari Pagũ ĩḡu ĩhabeoro árĩã iiaa ḡua. Árĩpehrerire mari Pagũ Goãmũ mure ĩḡu weredorera peediarã, cohreabũ ḡua, arĩpũ Cornelio Pedrore.

Pedro Jesu yare werepũ Cornelio ya wihi majarãre

34 Īḡu eroparĩcũ peegu, Pedro ðpa arĩ werepũ:
—Dohpague masia pare. Diaye ta ahraa. Goãmũ yujuropa ta ðaro iimi marire.

35 Eropigũ árĩpehreri macari majarã Goãmũre ḡuhyadiaro erã ĩacũ, ðarire erã iicũ, Goãmũpũ erãre mucubirimi.

36 Goãmũ ḡua judio masa pohro Jesucristore obeomi. Masa Goãmũ mera ðaro erã árĩboro dopa Jesupũ ðari buherire weremi. Iri buherire mũa masia. Jesucristopũ árĩpehrerã masa opũ aħrimi.

37 Ñũ waĩyegũ “Mũa ñerire bujawereque. Eropirã waĩyenirã árĩque,” masare ĩḡu eropa arĩ werera pũhrũ Galileague ðari buherire Jesupũ werenũgami. Pũhrũ Judea yebague iri buherire werepehomi.

38 Ĩhĩ Jesu Nazare majagũre Goãmũpũ ĩḡu turarire, Espĩritu Santo mera ĩḡu iimasiburire odi árĩmi Jesure. Eropigũ Jesu ðaro iigu wami. Eropa wagũ watẽa ñajasũnirãre, ñero tarirãre, árĩpehrerãre ðarã wacũ iimi. Mari Pagũ Jesu mera árĩdi árĩmi.

³⁹ Judea yeba, Jerusalén sãre árĩpehneri ĩgu iirare gũa ĩabũ. Pũhrũ erã crusague pabia wejẽma ĩgũre.

⁴⁰ Eropĩgu ũhrenũ waboro Goãmũ ĩgũre masudi árĩmi. Eropĩgu Jesure ĩgu masura pũhrũ gajirãre dehyoacũ iidĩgu árĩmi mari Pagũ.

⁴¹ Irisubu Jesure árĩpehnerã ĩabirima. Gũare bajamerãgãre dehyoami. Mari Pagũ ĩgu gamerãre, Jesure ĩamorãre iribojegue Goãmũ gũare beyepũ. Gũapũ Jesu ĩgu sĩridi masara pũhrũ ĩgu mera baha, ihribũ.

⁴² Eropĩgu ĩgu gũare doremi õpa arĩgu: “Masare wereque. Yũhũ Jesu árĩpehnerã ojo-carirãre, sĩrinirãre erãre dipuwaja moabu yũ árĩcũ iiami yũre Goãmũ. Eropirã irire wereque,” arĩ doremi Jesu gũare.

⁴³ Árĩpehnerã Jesure erã umupeocũ ĩagu Goãmũ erã ñerire cãdijigũcumi. Irire árĩpehnerã Goãmũ ya weremuhtanirã iribojegue majarã wereyuñuma, arĩ werepũ Pedro.

Judio masa árĩbirã Espĩritu Santore opañũgañorã

⁴⁴ Iri árĩpehnerire ĩgu eropa arĩ wererisubu, árĩpehnerã irire peerã mera Espĩritu Santo árĩnũgamuripũ.

⁴⁵⁻⁴⁶ Eropirã erã judio masa árĩbirã peeyamariri wereniguiiri mera mucubiriri mera wereniguiñũgañorã. Erã ya wereniguiiri mera “Goãmũ turagu, õagu ãhrimi”, arĩrã iĩñorã. Erã eroparĩcũ peepũ Pedro ĩgu acawererã judio masa mera. Eropirã Espĩritu Santo judio masa árĩbirã mera ĩgu árĩnũgacũ ĩarã judio masapũ

uca wañorã. Eropigu Pedro òpa arĩ werepũ judio masare:

⁴⁷ —Mari iro dopa ta Espiritu Santore opama oã sã. Erã eropa opacũ ãarã oãre waĩyedoremasia mari, arĩpũ Pedro erãre.

⁴⁸ Eropa arĩtuhaja Jesu waĩ mera judio masa árĩbirãre waĩyedorepũ Pedro. Erã eropiira pũhrũ “Gua mera bajamenurigã dujanique,” arĩñorã erã Pedro sãre.

11

Pedro Jerusalén majarãre Jesu yarãre werepũ

¹ Eropii judio masa árĩbirã sã Goãmũ yare erã òaro gamecũ Jesu ãgu apinirãpũ erã acawererã Judeague árĩrã mera peebeoñorã.

² Eropirã Pedro Jerusaléngue ãgu dujajacũ ãarã judio masa Jesu yarã bajamerãgã ãgure òpa arĩñorã:

³ —¿Judio masa árĩbirã pohro duhpigu ejari mũhũ? ¿Dohpa árĩronore erã mera bahari mũhũ? arĩ turiñorã erã Pedrore.

⁴ Erã eroparĩcũ peegu Pedro ãgu iirare werepehopũ erãre.

⁵ Òpa arĩ werepũ:

—Yũhũ Jopegue árĩgu Goãmũre serẽgu iibũ. Eropigu yãre òpa dehyoabũ. Yũhũ ãacũ wũari gasiro wapicũrisubu pepũri dirira gasiro umarogue yũ pohrogue دچارicũ ãabũ.

⁶ Eropigu iri gasirore òaro ãabũ “¿Ñeheno iri gasiroguere ãhriri?” arĩbũ. Eropigu ãabũ iri gasiroguere árĩrãre. Waimũrã nũgu majarãre, yebague paha curirãre, mirimagũ porã majarãre ãabũ.

7 Eropigu Goãmu ïgu yure wereniguirire peebu. “Pedro, wahgãnugaque. Wejẽ baque oãre,” arĩgu carimi yure.

8 Ïgu eroparĩcũ peegu õpa arĩbu yũhu. “Opũ, ne erãre babeaa yũhu. Ñerãre Goãmu badore-birinirãre ne babirimarabu yũhu,” arĩbu yũpũ.

9 Eropigu umarogue yure dipaturi wereniguigu carimi daja. “Goãmu ïgu ‘Õarã ãhrima,’ ïgu arĩrãre ‘Ñerã ãhrima,’ arĩbircãque mũhu,” arĩgu carimi yure.

10 Eropigu uhresubu ïgu eropa arĩ wereniguira pũhrũ iri gasiro dipaturi mũria wabu daja.

11 Yũ eropa ïarisubu ta urerã uma gũa árĩri wihigue ejanirã árĩma. Erã Cesarea majagu ïgu obeonirã árĩnirã árĩma.

12 Eropigu Espĩritu Santopũ yure erã mera wadoregu “‘Erã ñerã ãhrima,’ arĩbircãque erãre,” arĩ weremi ïgu yure. Eropirã oã seis mera yũ acawererã mera Cesarea majagu ya wihigue ñajajabu gũa.

13 Eropigu ïgu gũare õpa arĩ weremi. “Anyu yaha wihi dehyoacũ ïabu yũhu. Õpa weremi yure. ‘Jopegue Simo waĩcũgũre aĩgãridoreque.

14 Ïgu mũre mũ acawererã mera mũare árĩpehrerãre peamegue wabonirãre mũa tari-borore weregũcumi,’ arĩmi anyu yure,” arĩ weremi yure Cesarea majagu.

15 Eropii yũhu erãre wereniguirisubu Espĩritu Santopũ erã mera árĩnũgami marire ïgu iimũhtadiro dopa ta.

16 Eropigu Jesu ïgu wererare guñabu yũhu. Õpa arĩ weremi ïgu: “Ñũ mũare waĩyegu deco

mera waĩyemi. Yũpũ iri tauro iigũra mũare. Pũhrũ Espĩritu Santore mũa mera árĩniguicũ iigũra,” arĩ weremi.

¹⁷ Eropigũ Jesucristo mari Opũre mari umupeocũ ĩagũ Goãmũ ĩgũ Espĩritu Santore ohámi marire. Eropigũ Goãmũ marire ĩgũ Espĩritu Santore ĩgũ odiro dopa ta judio masa árĩbirã sãre ĩgũ ohámi. Goãmũ ĩgũ eropa iicũ ĩagũ ĩgũre tarinũgamasibea yũhũ, arĩpũ Pedro erãre judio masare Jesu yarãre.

¹⁸ ĩgũ eroparĩcũ peerã, erã ĩgũre ne arĩnemobiriñorã. ĩgũre erã turimasibiriñorã. Eropirã erã Goãmũre mucubirirã,

—Goãmũ ðagũ, turagũ ãhrimi, arĩñorã.

Õpa arĩnemoñorã erã:

—Judio masa árĩbirã sã erã ñerire bujawererã árĩrã Goãmũ ĩgũ taunirã árĩrãcoma. Eropa ĩgũ taunirã árĩrã erã sã mũmuri nũcũ ĩgũ mera árĩniguirãcoma, arĩnemoñorã erã.

Antioquía gajirã Jesu yarã árĩñorã

¹⁹ Eropii Estebanre erã wejẽra pũhrũ masa Jesu yarãre ñero iiñorã. Erã eropa iicũ ĩarã Jesu yarã duhrisirigã wañorã. Eropirã erã Feniague, Chipregue, Antioquíague waha, judio masa dihtare Goãmũ yare wereriñorã erã.

²⁰ Gajirãpũ Jesu yarã mera majarã Chipre majarã, Cirene majarã Antioquíague eja, judio masa árĩbirãre Jesu yare buheñorã Goãmũ erãre ĩgũ tauboro dopa.

²¹ Eropigũ mari Opũ erãre itamupũ. Eropirã masa bajarã Jesure umupeo, ðaripũre gohrotoñorã.

22 Eropii “Antioquía majarãgue Jesure gamecoma,” arĩ peebeoñorã Jerusalén majarã Jesu yarã. Erã eropa peebeora pũhrũ Jerusalén majarã Bernabé waĩcũgure Antioquíague obeoñorã.

23 Eropigũ ĩgu Antioquíague ejagũ, Goãmũ itamuri mera judio masa árĩbirã ĩgu yarã erã wacũ ĩagũ, burigã mucubiripũ. Eropigũ ĩgu ero majarãre õpa arĩ werepũ:

—Jesure eropa umupeoniguicãque. ĩgu yare ne duhubiricãque, arĩ werepũ ĩgu árĩpehrerãre erãre.

24 Bernabé õagũ árĩgu, Espĩritu Santore wũaro opagũ árĩgu, Jesu dorediro dopa iigu árĩgu Jesure õaro umupeodigu árĩpũ. Eropirã ĩgu buhera pũhrũ bajarã masa Jesure umupeoñorã.

25 Pũhrũ ĩgu Tarso waĩcũri macague Saulore amagũ wapũ.

26 Erogue ĩgure bocajapũ. ĩgu bocajara pũhrũ Antioquíague aĩgãpũ Saulore. Erogue erã ejara pũhrũ yuju bojori gohra erã Goãmũ yarã mera gamenere, bajarã masare buhemãriñorã erã. Eropirã Antioquíague Cristo yarã Cristiano waĩcũnũgañorã.

27 Irisubure Goãmũ ya weremũhtarã Jerusalén árĩnirã waha, Antioquíague ejañorã.

28 Eropigũ erã mera majagũ Agabo waĩcũgu Jesu yarã watope niguigu, Espĩritu Santo ĩgu turari mera werepũ erãre. “Árĩpehreri yebaguere burigã oanũ waroca,” arĩ wereyupũ ĩgu. Irisubure bari maririsubu árĩcũ árĩpehrerã weca opũ Claudio árĩpũ.

29 Eropirã Jesu yarã árĩpehrerã erã oparopẽ erã acawererãre odiarã erã basi game wereniguiñorã. “Judea yeba majarãre Jesu yarãre niyerure obeorã,” arĩñorã erã basi.

30 Erã eropa arĩra pũhrũ Bernabé Saulo mera erã iri niyerure aĩgãbasañorã. Eroque ejarã Judea majarãre Jesu yarãre wiañorã iri niyerure.

12

Pedrore peresu iñorã

1 Irisubu opũ Herode yujurãyerire Jesu yarãre ñero iinũgarũ.

2 Eropigũ ĩgũ Ñu tĩgũre Santiagopũre matamiji mera ĩgũ wejẽdorecũ gajigupũ ĩgũre wejẽpũ. Santiagore ĩgũ wejẽcũ judio masa mucubiriñorã.

3 Erã mucubiririre Herode masigũ, “Eropa dihta iicũ gahmema erã,” arĩgũ Pedro sãre peresu iipũ. Irinũrĩre bũgabiriri pan erã bari bosenu Pascua árĩyoro.

4 Eropigũ Herode Pedrore ñeha, peresu iipũ. Eropigũ diez y seis surarare ĩhadibudorepũ ĩgũre. Wapicũrã surara ĩgũre ĩhadibuñorã. Pũhrũ wapicũrã erã gohrotonirã ĩgũre ĩhadibumũriñorã. Eropa ta iñorã erã diez y seis surara. Herodepũ Pascua pũhrũ Pedrore peresugue árĩgũre masa core duhudobodiaripũ ĩgũre wejẽdorebu.

5 Eropigũ Pedro peresugue árĩpũ. ĩgũ erogue árĩcũ ta Jesu yarãpũ Goãmũre bũrigã serẽbasañorã ĩgũre.

Goãmũ peresugue árĩgũre Pedrore wiupũ

⁶ Iri ñamire ta Pedro comedari peda mera erã diridigu perã surara watope carĩgu iipũ. Eropirã perã surara disiporo coreniguiñorã ïgũre. Eropigu iri ñami boyoro Herode Pedrore judio masa core duhudobodiaripũ ïgũre wejẽdorebu.

⁷ Eropigu Goãmũ anyupũ Pedro carĩgu pohro ïgu niguicũ ïgu peresu árĩri taribu boyopehrea wayoro. Eropigu anyu Pedro pohro niguigu ïgu patorere puucarepũ ïgũre.

—Duru wahgãque, arĩpũ ïgu Pedrore. ïgu eroparicũ ta ïgu mojotorire erã dirira comedari pãrisiri dija wayoro.

⁸ Eropigu anyu ïgũre wererũ:

—Mũ ya suhrire sañaque. Mũ zapatu sãre sañaque, arĩpũ ïgu.

ïgu eroparicũ Pedropũ ïgu arĩro dopa ta iipũ.

—Mũ weca majañe suhrirore saña, yũ mera arique, arĩpũ anyu.

⁹ ïgu eroparicũ iri taribugue árĩdigũ wiria anyu pũhrũ waha warũ ïgu. Eropa waqueregu ta õpa arĩ pepiripũ ïgu. “¿I diaye árĩbiricuri? ¿O quẽgu iicuri yũhũ?” arĩ pepiripũ ïgu.

¹⁰ Eropirã erã ïgu árĩri taribu pohro niguirã surarare tarigã, gajirã yoañariro niguirã sãre tarigã, wũari disiporogue ejañorã. Iri disiporo macague wari mare cãhmotayoro. Iri biharise irise basi pãricũ erã wiriañorã. Wiria wa erã mague waha wañorã. Anyupũ waha warũ. Eropigu Pedro yujugũ ta dujarũ.

¹¹ Eropa ïgu anyu ïgu wara pũhrũ ïgu iirare Pedro masipũ pare. Õpa arĩ pepiripũ ïgu. “Anyu

Goãmũ ĩgũ obeodigu peresugue árĩgure yũre wiugũ erami. Dohpague irire masia ĩgũ eropa iirare. Judio masapũ yũre erã ñero iidiarare Goãmũpũ erãre iidorebirami. Eropigũ yũre Herode ĩgũ peresu iidigũre wiuami,” arĩ pepipũ Pedro.

¹² ĩgũ eropa arĩ pepira pũhrũ María Ñũ pago ya wihigue ejapũ Pedro. Ñupũ Marco waĩcũgũ árĩpũ. Iri wihigue masa bajarã gamenere, Goãmũre serẽrã iĩñorã.

¹³ Eropigũ Pedro disiporore eraa dotepũ. Rode waĩcũgo pohro majago ĩgũ dotecũ peego, ĩago ejapo igo.

¹⁴ Eropigo Pedro igore piyucũ peego ĩgũ wereniguirire pee masi, bũrigã mucubiri disiporore pãgũbiripo. Eropa mucubirigo ĩgũre pãgũbodio cãdija wapo. Pedro ero niguicũ ta igo majinũgaja oma ñaja wapo.

—Pedro disiporogue erami, arĩ werego ñajapo.

¹⁵ Eropirã iri wihi árĩrã igo eroparĩcũ peerã,

—Eropa arĩmaacãgo iiaa mũhũ, arĩñorã erã igore.

—Diaye ta ãhraa. Diaye ta arĩgo iiaa, arĩpo igo. Igo eroparĩcũ peerã,

—Ĩgũ árĩbircumi. ĩgũ sĩporã mũraro eraro iica, arĩñorã erãpũ.

¹⁶ Erã eropa arĩrisubu Pedro disiporore eropa ta doteniguiçãpũ. ĩgũ eropiicũ peerã, erã disiporore pãgũ, ĩgũre ĩha, uca wañorã.

¹⁷ Eropigũ Pedro ĩgũ mojoto mera “Ejarimaricãque,” arĩgũ, Goãmũ peresugue ĩgũre ĩgũ wiurare werepũ erãre.

—Ire wereque Santiagore gajirã Jesu yarã sãre, arĩpũ Pedro.

Eropa arĩ weretuhaja, ĩgũ gajipũgue tarigã waha wapũ.

18 Eropii boyodijiricũ surara Pedrore ĩhadibunirã ĩgũ dohpa ii wiriarare ne masibiriñorã. Eropa masibirã ũca wañorã.

19 Eropigũ Herode Pedrore amadoreripũ. Eropigũ ĩgũ surarare peresu corerãre ĩgũ serẽpira pũhrũ erãre wejẽdorepũ Herodepũ. Eropii Herode Judeague árĩdigũ waha Ceseareague árĩgũ waha wapũ.

Herode s̃ria wapũ

20 Ero pũhrũ Tiro waĩcũri maca majarã mera Sidón waĩcũri maca majarã mera sãre Herode guarũ. ĩgũ eropa guacũ ĩarã iri macari majarãpũ Herode mera amurã wañorã. ĩgũ erã mera ĩgũ guarare wereniguirã wañorã. Ejaa Herodere ĩaboro core Herode itamugũ Blasto waĩcũgũ mera weretamuñorã. Eropirã erã ĩgũ Blasto ĩgũ itamuri mera Herode pohro ejañorã. ĩgũ pohro ejarã õpa arĩñorã:

—Mari õaro árĩrã. Mari basi ĩhaturibiricãrã, arĩ serẽñorã erã Herodere.

Erã ya yeba majarã Herode ya yeba barire bocamũriñorã. Eropirã Herode erãre ĩhaturicũ gamebiriñorã erã.

21 Eropigũ Herode erã ĩgũre ĩarinũ ĩgũ queoranũ árĩcũ, opũ ĩgũ sañari suhri õari suhrire sañamũripũ ĩgũ. Eropigũ ĩgũ ĩgũ doaro doanijagũ, masare werenigui ĩhmumũripũ.

²² Īḡu eropa werenigui ĩhmucũ peerã masapũ gaguiniguĩñorã:

—Ihĩ wereniguigũ masũ árĩbeamĩ. Goãmũ ãhrimi, arĩ gaguiniguimuririñorã erã Herodere.

²³ Erã eropa arĩra pũhrũ Goãmũ ĩḡu anyu Herodere dore ópũ. “Goãmũ árĩbeaa yũhũ,” ne arĩbiripũ Herode. Īḡu eropa arĩbirira dipuwaja anyu ĩḡu dorecũcũ ĩipũ. Īḡu eropa dorecũcũ ĩḡure beca ba wejẽcãñorã.

²⁴ Eropii Jesu yarã masa bajarãre Jesu ya buherire buheñorã.

²⁵ Eropirã Bernabé, Saulo mera Jesu yarãre itamupehotuhaja Jerusaléngue árĩnirã Antioquíague dujaa wañorã. Eropirã Ñure Marco waĩcũḡure erã aĩḡãñorã erã mera.

13

Jesu yarã Bernabére Saulo mera Goãmũ yare buhedore obeoñorã

¹ Irisubure Antioquíague Jesu yarã gamenererã mera majarã, Goãmũ yare weremuhtarã árĩñorã. Masare buherã ta árĩñorã erã sã. Bernabé, Simo Negro waĩcũḡũ, Lucio Cirene majagũ, Manaén, Saulo mera erã árĩñorã. Manaénpũ opũ Herode murũ mera erã perã yujuro mera ta masanirã árĩñorã.

² Eropirã erã Goãmũ yare erã buherisubu, erã ba duhurisubu, Espíritu Santopũ werepũ erãre:

—Bernabére, Saulo mera apique yũ gamero dopa iimorãre. Irire iimorãre beye apigũ iiaa erãre, arĩpũ Espíritu Santo.

³ Īḡu eroparīcū erāpū ba duhu Goāmure serē, Bernabé weca Saulo weca erā mojotorire duhpeoñorā. Eropa duhpeorā erāre buhedorerā obeoñorā.

Chipregue Jesu ĭḡu apinirā buheñorā

⁴ Eropirā erā Espiritu Santo ĭḡu obeonirā árĩrā, Seleuciague eja, iri macare tarigā, Chipre waĩcūri nuḡurogue ejañorā erā.

⁵ Eropirā Salamina waĩcūri peramague ejañorā. Iri maca judio masa buheri wirigue Goāmū yare werenuḡañorā erā. Eropiḡu Ñu Marco sã erā mera waha, erāre itamupū.

⁶ Eropirā erā iri nuḡuro ojogoro maja. Pafu waĩcūri macague ejarā, yeere bocañañorā erā. Īḡu judio masū Barjesu waĩcūḡu árĩpū. Barjesu griego ya mera Elima erā arĩ piyugū árĩpū. “Goāmū yare weremuhtagū āhraa yuhū,” arĩ masare ḡuyaniguicāḡu árĩpū ĭḡu.

⁷ Eropiḡu ĭḡu Sergio Paulo waĩcūḡu mera majagū árĩpū. Sergio Paulopū iri nuḡuro majarā opū masipehogū árĩpū. Eropiḡu Goāmū yare peediagū erāre Bernabé, Pablo mera bocatĩripū ĭḡu.

⁸ Eropiḡu Elima yeepū erāre buhedorebiriripū. Īḡu Sergio Paulo Jesu yare ĭḡu umupeocū gamesābiripū yeepū. Sergio Paulore Goāmū yare ĭḡu peecū cāhmotadiaripū.

⁹⁻¹⁰ Īḡu eropa buhedorebiriquerēcū ta Saulo, Pablo waĩcūḡu Espiritu Santore ðaro opagū árĩḡu yeere ðaro ĩadihupi ĭḡure wererū:

—Muḡu ḡuyaricūḡu, ñeḡu, watĩ ĭḡu dorerire iḡu, ðarire ĩhaturigū āhraa muḡu. ¿Duhpiḡu

mari Opu yare “Ñeri ãhraa. Guyari ãhraa,” eropa arñiguicãri mũhu?

¹¹ Mũhu eroparĩra waja Jesu mari Opu mũre ĩgu pẽhrecũ cuiri ĩhajabigu arĩgũca mũhu. Eropigu bajamenurigã mũhu inurire ĩarisome, arĩpu Pablo.

Ĩgu eroparĩcũ ta ĩgu yeepu imica iro dopa arĩrire ĩamũhtagu, naitĩaro dihtare ĩapu ĩgu. Eropigu ĩgure tuã curibure amapu ĩgu.

¹² ĩgu eropa wacũ ĩagu, Sergio Paulopu Jesu yare “Diaye ta ãhraa,” arĩ masipu. Mari Opu yare ĩgu pee, uca wa, Jesure umupeonũgarpu.

Pablo Bernabé mera Antioquía Pisidia yebague arĩri macague arĩnorã

¹³ Eropi Pablo sã Pafogue arĩnirã dohodiru mera waha, Pergegue ejañorã. Perge Panfilia yebague ãhraa. Erogue eja, Ñu Marcopu erãre cohã wahgã, Jerusalengue waha wapũ.

¹⁴ Erãpu Pergegue arĩnirã waha, Antioquíague ejañorã. Antioquía Pisidia yebague ãhraa. Erogue ejarã, Sabadonũ arĩcũ erã judio masa buheri wihigue ñajaja, erogue doañorã.

¹⁵ Eropirã iri wihi majarã oparã Goãmu dorerire, Moisegue marire ĩgu apirare, Goãmu yare weremũhtanirã erã gojarare erã buhera puhru erã sihubeoñorã Pablo sãre.

—Acawererã, ¿masare mua werediarã iiri? Irire werediarã wereque dohparagã, arĩnorã iri wihi majarã oparã.

¹⁶ Erã eroparĩcũ peegu, Pablo wahgãnũgaja, “Wereniguibiricãque,” arĩgu ĩgu mojoto mera paaturpu. Erã ejarimaricũ ĩha, ĩgu õpa arĩpu:

—Israe masa, mũa mari Pagure umupeorã, peeque.

17 Mari ñecũ sũmarã mũa Goãmũre umupeomũriñuma. Erã mũrare Goãmũ beyemũriñumi. Eropirã erã mari ñecũ sũmarã yoari boje Egiptogue árĩmũriñuma gajirã árĩquererã. Eroque erã árĩcũ Goãmũ ôaro iimũriñumi erãre. Eropirã bajarã masa pore árĩñuma erã. Ôpa iĩñumi erãre. Erãre Egiptogue árĩrãre ãgũ turari mera aĩ wiuñumi Goãmũ.

18 ãgũ eropa wiura pũhrũ erã cuarenta bojori gohra masa marirogue curimũriñuma. Eroque ãgũre erã tarinũgacũ Goãmũ eropa ta pepicãñumi.

19 Eropigũ Canaa waĩcũri yebaguere siete cururi majarãre cóãtuhaja, Goãmũ iri yebare oñumi Israe masapũre.

20 Iri yebare otuhaja cuatrocientos cincuenta bojori gohra masare doremorãre apimũriñumi Goãmũ Israe masare.

—“Goãmũ ãgũ apinirã Samue ãgũ árĩcũgue árĩtumũriñuma. Samuepũ Goãmũ yare weremũhtagũ árĩmũriñumi.

21 Samue árĩrisubu Israe masapũ erã opũ árĩbure amamũriñuma. Eropirã Goãmũre serẽmũriñuma. Erã eropa serẽcũ ãagũ Goãmũ Saulore apimũriñumi. Saulo Cis magũ árĩñumi. Benjami ya curu majagũ árĩñumi. Eropigũ cuarenta bojori gohra erã opũ árĩbure apiñumi Goãmũ ãgũre.

22 Eropigũ Goãmũ Saulore ãgũ cóãra pũhrũ Davire apimũriñumi ãgũ. Ôpa arĩñumi Goãmũ

Davire. “Davi Isaí magure bocabu yũhũ. Īgure mucubiria yũhũ. Īgu yũ gamerire iipehogucumi,” arĩñumi Goãmũ.

²³ Ihĩ Davi ĩgu pãrami árĩturiagu aħrimi Jesu. Goãmũ Jesure apidigu árĩmi Israe masare itamubure. “Masare õaro iigũca,” arĩñumi Goãmũ. Īgu arĩdiro dopa ta iidi árĩmi ĩgu Jesu.

²⁴ Īgu eropa iiboro core Jesu ĩgu ariboro core Ñu waĩyegu õpa arĩ buherũ: “Mũa ñerire bujawereque. Õaripũre gohrotoque. Eropirã waĩyesũnirã árĩque,” arĩ buherũ Ñu árĩpehrerã Israe masare.

²⁵ Eropigu Ñu ĩgu buhetuboro core, ĩgu sĩriboro core õpa arĩ weremũripũ. “¿Nihino aħriri yũhũ mũa pepicũ? Iribojegue majagu Goãmũ yare weremũhtadigu árĩbeaa yũhũ. Cristo árĩbeaa yũhũ. Gajigu aħraa. Cristo yũhũ árĩbiriqerẽcũ yũ pũhrũ yũ tauro turagũpũ arigũcumi. Īgũpũ õatariagu aħrimi. Īgu iro dopa árĩbeaa yũhũ,” arĩ werẽpũ Ñu masare, arĩpũ Pablo.

²⁶ “Acawererã, Abrahã pãramerã, árĩpehrerã mari Pagũre gũhyadiaro ĩarã, marire i ĩgu tauborore wereri buherire obeodi árĩmi mari Pagũ.

²⁷ Jerusalén majarã erã oparã mera Jesu erãre taugu ĩgu árĩcũ masibirinirã árĩma. Sabadonũri árĩcũ Goãmũ yare weremũhtanirã erã gojarare buhequererã ta Jesure masibirinirã árĩma. Eropa masibirã Jesure wejẽdoreñorã. Eropa iirã Goãmũ yare weremũhtanirã erã gojadiro dopa ta iirã iĩñorã.

28 Īgure erã wejēboro core erã Jesure weresãriñorã. Īgũ ñerire iibiriquerecũ ta erã Pilatore Jesure wejēdoremorã serēñorã.

29 Eropirã iribojegue majarã erã gojadiro dopa ta Jesure iituhaja, Īgure crusague árĩgure aĩdiju, masa gobegue utãyegue erã seara gobegue apiñorã erã Īgure.

30 Eropa erã Īgure wejēquerecũ ta Goãmũ masudi árĩmi Īgure.

31 Eropirã Galileague arinirã Jerusaléngue ĩgũ mera ejanirã bajanũri ĩgure sĩri masa deyo-digure ĩañorã. Eropirã dohpaguere ĩgure erã ĩarare masare werema erã.

32-33 Eropa masare werenĩguĩgũ õpa arĩ weren-emopũ daja Pablo:

—Eropirã õari buherire werea gũa mũare. Goãmũ mari ñecũ sũmarãre “Masare õaro iĩgũca,” iribojegue ĩgũ arĩdiro dopa ta dohpaguere marire erã acawererãre iiami. Irire ĩgũ wererare õpa iiami ĩgũ. Goãmũ Jesure masudi árĩmi. Eropirã Jesure ĩgũ masurare werea gũa mũare. Salmopũgue iribojegue ĩgũ õpa arĩ gojadiro dopa eropa wayoro Jesure: “’Mũhũ yũ magũ ãhraa. Dohpagãre mũre dehyoacũ iiabũ,’ arĩmi Goãmũ ĩgũ magũre,” arĩ gojañumi iribojegue.

34 Eropigũ Goãmũ Jesure ĩgũ masuburire dipaturĩ ĩgũ sĩribiriborore weregũ õpa arĩ were gojadoreñumi Salmopũgue: “Davire yũhũ mójomoro ĩadiro dopa ta diaye ta õaro iĩgũra mũa sãre,” arĩ gojadoreñumi.

35 Eropigũ gaji Salmo sãre õpa ta arĩ wereñumi: “Goãmũ mũ õagũ ĩgũ dũpũre

boadorebirabu m̄uh̄u,” ar̄i gojañumi.

³⁶ Eropigu Davi Goãm̄u ïgu gamediro dopa ta ïgu ár̄irasubu majar̄are itamum̄ariñumi. P̄hr̄u ïgu s̄iria wañumi. ïgu s̄irira p̄hr̄u ïgu pagu s̄umar̄are er̄ã iidiro dopa ta yaañuma ïgu s̄are. Eropigu ïgu boa wañumi.

³⁷ Eropigu ih̄i Jesu Goãm̄u ïgu masudigup̄u ne boabiridi ár̄imi.

³⁸ Eropir̄ã m̄ua, yu acawerer̄ã, ire masique: Goãm̄u m̄ua ñerire ïgu cóãborore m̄uare ire werea gūa. Jesupu m̄ua ñerire cóãbu ãhr̄imi.

³⁹ Eropigu ïgure umupeor̄are er̄ã ñero iirare cãdijicãgucumi ïgu. Moiser̄e ïgu apira dorerire m̄ua iira mera Goãm̄u pohrogue wasome m̄ua. Eropigu iri dorerire iiri mera taridiar̄are er̄ã ñerire cóãsome Goãm̄u.

⁴⁰ Eropir̄ã ðaro iique. M̄ua ðaro iibiricũ Goãm̄u ya werem̄htanir̄ã er̄ã gojadiro dopa ta m̄uare waroca. Òpa ar̄i gojañuma:

⁴¹ Peeque m̄ua queoricur̄ã. Yure ïhaturir̄ã ãhraa m̄ua. Yu ðpa iicũ güique m̄ua. Eropir̄ã peamegue waque. M̄ua ár̄irinur̄ire m̄uare ii ïhmugur̄a. Yu eropa ii ïhmucũ ïaquerer̄ã “Diaye ta ãhraa,” ar̄isome m̄ua. Gajigu irire m̄uare ïgu ðaro werequerecũ ta “Diaye ta ãhraa,” ar̄isome m̄ua, ar̄i gojañumi Goãm̄u yare werem̄htadigu, ar̄i werep̄u Pablo er̄are.

⁴² ïgu eropa ar̄i werera p̄hr̄u judio masa buheri wihigue er̄ã wiriara p̄hr̄u judio masa ár̄ibir̄ap̄u er̄are serẽñor̄ã.

—Gaji semanague Sabado ár̄icũ ire buheba daja gūare, ar̄i serẽñor̄ã er̄ã Pabl̄ore.

⁴³ Eropirã iri wihigue árĩnirã wiria, judio masa bajarã, judio masa árĩbirã sã Pablo, Bernabé sã mera wañorã. Judio masa árĩbirã judio masa yare buherã árĩñorã. Erã erã mera wacũ Pablo Bernabé mera ðaro wereñorã erãre. “Goãmũ mũare mahimi. Eropirã ìgũre umupe-orã árĩniguicãque,” arĩ buheñorã erã.

⁴⁴ Eropirã gaji semanare Sabado árĩcũ árĩpehlerã Jesu yare peediarã gamenereñorã.

⁴⁵ Eropirã judio masapũ bajarã masa Jesu yare peediarã gamenerecũ ìarã guañorã. Eropa guarã, erã gajiropa arĩ werenigui, Pablöre ñero quere goroweoñorã. “Mũare ìgũ buheri diaye árĩbeaa,” arĩñorã erã.

⁴⁶ Erã eroparĩcũ peerã, Pablo, Bernabé mera erãre quere goroweonirãre güiro mariro wereñorã.

—Goãmũ ìgũ dorediro dopa ta mũare judio masare buhemũhtarabũ gũa. Mũapũ irire gamebirituhabũ. Ùmuri nũcũ Goãmũ mera árĩniguicũ sãre gamebirituhabũ mũa. Eropirã guapũ judio masa árĩbirãpũre buhenũgarãca.

⁴⁷ Õpa ta doreñumi mari Opũ guare:

Mũa judio masa árĩbirãre buherã erãre Goãmũ yare ðaro masicũ iirãca mũa. Eropigũ mũa yorogue árĩrãre mũa buhecũ peerãre erãpũre peamegue wabonirãre taugũca yũhũ, arĩ wereñumi Goãmũ guare ìgũ yare go-jarapũgue, arĩ werepũ Pablo, Bernabé mera.

⁴⁸ Erã eroparĩcũ peerã judio masa árĩbirãpũ mucubiriñorã. “Mari Opũ yapũ ðari ãhraa,” arĩñorã erã. Eropirã Goãmũ ìgũ gamenirã,

umuri nucu ĩgu mera erã árĩniguiborore ĩgu odianirã Jesure umupeonũgañorã.

⁴⁹ Eropirã mari Opũ Cristo yare iri yebague werepehoñorã.

⁵⁰ Erã eropa iicũ ĩarã judio masa suabiria wañorã. Erogue mari Pagure umupeorã nome, õarã nome árĩñorã. Eropirã judio masa Pablo sãre ñero wereniguñorã. Erã eropa wereniguicũ peerã erã nome Pablo mera Bernabé mera guañorã. Eropirã iri maca majarã oparã sã erã mera guañorã. Eropa quarã ero majarã ñero iñorã Pablo sãre. Erã eropiira, pũhrũ Pablo sãre erã ya yebague árĩrãre cohã wiucãñorã.

⁵¹ Erã eropa iicũ ĩarã, Pablo Bernabé mera erã guburi maja nicure pasiripiñorã iri maca majarã erã ñeri wajare ĩhmurã. Eropa iituhaja erã Iconiogue waha wañorã.

⁵² Eropirã erã Jesu yarã wũaro mucubiri, Espĩritu Santo wũaro ĩgu dorediro dopa iirã iñorã.

14

Pablo Bernabé mera Iconiogue árĩñorã

¹ Eropirã Iconiogue árĩrã Pablo Bernabé mera judio masa buheri wihigue ñaja, Jesu yare wereñorã. Eropirã judio masa bajarã Jesure umupeonũgañorã. Eropirã judio masa árĩbirã sã Jesure umupeoñorã.

² Judio masa Jesu yare peediabirãpũ judio masa árĩbirãre Jesu yarã mera erã guacũ iñorã daja. Erã eropa iicũ judio masa árĩbirã ñero pepiñorã Jesu yarãre.

³ Erã eropa pepicũ ĩarã Jesu yarãpũ Pablo sã erogue yoari boje árĩrã, güiro mariro mari Opũ yare õari buherire buheñorã. Goãmũ masare ĩgũ mahirire buheñorã. Erã eropa buherisubũ Goãmũ turari mera deyoro moarire ii ĩhmuñorã, “I buheri diaye ta ãhraa,” arĩ ĩhmurã.

⁴ Eropirã iri maca majarã deco mera judio masa yare gamerã dujañorã. Deco mera ta Jesu yare gamerã sã dujañorã. Erã pe curu dũca wariñorã.

⁵ Eropirã Jesu yare gamebirãpũ judio masa sã árĩbirã, judio masa sã erã oparã mera gamenere Jesu ĩgũ apinirãre ñero iidiariñorã. Utã mera dea wejẽdiariñorã erãre.

⁶ Erã eropa iidiarire masirã, Pablo, Bernabé mera Licaonia yebague duhrigã waha wañorã. Iri yeba árĩri macari tari wahgã Lистра waĩcũri macare Derbe waĩcũri maca sãre ejañorã.

⁷ Erogue ejarã, õari buherire buheñorã daja erã.

Listrague Pablore utã mera deañorã

⁸ Eropii Listrague curimasibigũ doapũ. ĩgũ ne masa dehyoagũgue ta curimasibiridigũ árĩpũ.

⁹⁻¹⁰ Eropigũ ĩgũ Pablo ĩgũ buhecũ peepũ. ĩgũ peerisubũ Pablopũ ĩgũ dihtare ĩapũ. ĩgũre ĩanũrũ õpa arĩ pepipũ: “Ihĩ Jesure umupeomi. Eropigũ ‘Jesu yũre dũpũ õacũ iimasimi,’ arĩ pepigũ iicumĩ,” arĩ pepipũ Pablo curimasibigũre. Eropa pepigũ turaro mera õpa arĩpũ Pablo ĩgũre: —Wahgãnũgajaque, arĩpũ Pablo ĩgũre.

Ĩgũ eroparĩcũ peegũ ta curimasibigũpũ buhri-manũgaja, warũ.

11 Pablo ïgu eropa iicũ ïarã masa gaguinigiñorã. Erã Licaonia ya mera õpa arĩ gaguinigiñorã:

—Goãmarã masa dopa bejarã umarogue árĩrã mari pohrogue dijarama, arĩ gaguiniñorã erã.

12 Eropirã erã Bernabére “Mari goãmũ Zeus ãhrimi,” arĩ piyuñorã. Eropirã Pablo buhemũhtadigu opu iro dopa ïgu árĩcũ ïarã “Mari goãmũ Hermes ãhrimi,” arĩ piyuñorã erã ïgũre.

13 Eropirã Zeure umupeorã ya wihi iri maca tũro pohro árĩyoro. Eropigu Zeus yarã erã pahipu iri wihigue árĩgu macague ñajariri disiporo pohrogue wecũare, gori amurare aĩgãripũ. Iri mera Pablöre Bernabére “Mari goãmarã ãhrima,” arĩ umupeodiariñorã. Eropirã erã wecũare soemuju Pablöre, Bernabére umupeodiariñorã.

14 Erã eropa iidiacũ ïarã Pablo, Bernabé mera erã basi erã ya suhrire yehguenũgañorã erã bujawererire masare ïhmurã. Erã yehguenũgara pũhrũ masa watope omagã, gaguinigiñorã erã.

15 —Mũa õpa iibiricãque. Gũa sã mũa iro dopa ta masa ãhraa. Mũa õpa iiri ne duhpiburi árĩbeaa. Eropirã mũare õarire buherã ahrabũ. Õpa iirire duhudorerã arirã iiabũ. Oã mũa goãmarãre mũa wéanirãre ñerãre cóãcãque. Eropirã Goãmũre ojo-carigũpũre umupeoque. Goãmũpũ umarore, yebare, wũariyare, árĩpehrerire, árĩpehrero majarãre iigu ãhrimi.

16 Eropigu ĩgu iribojegue árĩpehreri macari majarã erã gamero iirare eropa ĩacãñumi.

17 ĩgu eropa ĩacãqueregu ĩgu árĩricũre ĩhmumi marire. ĩgu masare õarire ii, deco aricũ ii, dũcare oo, masare barire oniguimi. ĩgu eropa ocũ masa mucubirima. Eropa ta ĩgu árĩricũre ĩhmumi masare, arĩpu Pablo, Bernabé mera.

18 Eropirã erã eroparĩcũ peequererã ta masa wecũare wejẽ soemuju erãre umupeodiariñorã. Eropa erã umupeodiacũ ĩarã erãre eropa iidorebiriñorã Pablo sã. Erã eropa iirire duhudiabiri-quererã duhuñorã.

19 Eropii gajirã judio masa Antioquía majarã, Iconio majarã sã Listrague ejañorã. Erogue ejarã, Pablore ñero wereniguiñorã ero majarãre. Erã eropa wereniguicũ peerã masa ĩgu mera guanũgañorã. Eropa guarã masapu utã mera deañorã Pablore. Utã mera ĩgũre deatuhaja, "Ihĩ sĩria wahãmi," arĩrã, iri maca tũro pohroque ĩgũre taragã mehpicã, waha wañorã.

20 Erã eropiiquerecũ Jesu yarã Pablo pohro erã gamenerenũgajacũ gohra Pablo masa wahgãnũgaja, erã mera macague waha wapũ. Eropirã gajinu ĩgu Bernabé mera Derbague wapũ.

21 Eropirã erã erogue erã õari buherire bajarã masare erã werera puhru, erã Listrare eja daja iri macare tarigã, Iconiore eja daja iri macare tarigã, Antioquía Pisidia yebague árĩri macare ejañorã daja.

22 Iri macarigue ejarã, ero majarã Jesu yarãre õari buherire wereñorã daja. Erãre õaro

sīporācūcū iīñorā. Eropirā Jesure umupeodor-eniguicārā ōpa arī wereñorā erāre.

—Goām̄ arīroguere mari wadiarā, burigā marire ñero tariro gahmea, arī wereñorā erā.

²³ Eropirā macari nūcū majarāre Jesu yarāre erā oparā árīmorāre apiñorā Pablo Bernabé mera. Eropirā erā ba dūhura pūhr̄ Goām̄re serēñorā.

—Op̄, oā m̄ yarāre īhadibuque, arī serēbasañorā erā Goām̄re erā umupeogure.

Pablo Bernabé mera Antioquíague erā árīm̄htara macague dujaa wañorā

²⁴ Erā eropa iira pūhr̄ erā Pisidia yebague tariara pūhr̄ waha wañorā Panfilia yebague.

²⁵ Eropirā Pergeguere erā buhetuhaja Atalia waīc̄ari macague buha wañorā.

²⁶ Eropirā iri macague eja, Antioquíague dujaarā, dohodiru mera waha wañorā. Iri maca coregue erā árīnicū Jesu yarā Goām̄ yare buhedorerā Pablo sāre obeoñorā. Eropā obeerā Goām̄re ōpa serēñorā:

—Goām̄, m̄ mahiri mera oāre īhadibuque, arī serē, obeoñorā erā.

Eropirā erā buhedorerare buhepehonirā árīrā Pablo Bernabé mera dujaniñorā iri macare.

²⁷ Eropirā erā Antioquíague erā dujajara pūhr̄ Goām̄ yarā mera gamenere, Goām̄ īḡ turari mera erā iirare werepehoñorā erā. Judio masa árībirā sā Goām̄ yarā erā warare wereñorā erā.

²⁸ Eropirā Pablo sā eroguere Jesu yarā mera yoari boje árīcām̄riñorā.

15

Jerusaléngue Jesu yarã gamenereñorã

¹ Eropi Judea yeba majarã bajamerãgã Antioquíague ejarã, Jesu yarãre õpa arĩ buhenugañorã erã.

—Goãmũ ãgũ dorerire Moisere apigu õpa arĩ apimuriñumi. Árĩpehrerã erã dũpũre miri gasirogã erã wiri aĩborore were apimuriñumi Moisere. Mũa irire iibiricũ Goãmũ mũare tau-some, arĩ buheñorã erã ero majarãre.

² Erã eropa arĩ buhecũ peerã Pablo Bernabé mera gamebiriñorã. Iri buherire buriã game dũyasoñorã Judea yeba majarã mera. Erã eropa game dũyasora pũhrũ Jesu yarãpũ Pablõre, Bernabére, gajirã ero majarã sãre Jerusaléngue obeoñorã. Judea yeba majarã erã buherire Jesu ãgũ apinirãre Jesu yarã oparã sãre serẽpi ãadorerã obeoñorã Pablo sãre.

³ Eropirã Jesu yarã erãre erã obeocũ waha, Fenicia yebare eja tarigã, Samaria yebague ejañorã. Iri macarigue ejarã, judio masa árĩbirã Goãmũ yare erã gemenugarare wereñorã erã ero majarãre. Erã eropa werecũ peerã ero majarã Jesu yarã buriã mucubiriñorã.

⁴ Eropirã erã Jerusaléngue ejacũ ãarã ero majarã Jesu yarã Jesu ãgũ apinirã, ãgũ yarã oparã mera mucubiriri mera õaro bocatĩriñorã erãre. Eropirã Pablo, Bernabé gajirã mera Goãmũ ãgũ turari mera erã iirare wereñorã Jerusalén majarãre. Judio masa árĩbirã Jesu yarã erã wara sãre wereñorã erã.

⁵ Erã eropa werequerecũ erogue fariseo masa Jesu yarã bajamerãgã árĩnorã. Eropirã erã eroguere wahgãnũgaja, õpa wereñorã.

—Erãre judio masa árĩbirãre erã dũpũre miri gasirogãre wiriro gahmea. “Goãmũ Moisere ĩgũ dorerare iique mũa sã,” arĩro gahmea erãre, arĩnorã erã fariseo masa.

⁶ Erã eroparĩcũ pee, Jesu ĩgũ apinirã, Jesu yarã oparã mera irire amudiarã, gamenereñorã.

⁷ Eropirã erã yoari boje erã wereniguira pũhrũ Pedro wahgãnũgaja, werepũ erãre.

—Acawererã, iribojegue yũhũ mũa mera árĩgũre Goãmũ õpa iidoregũ yũre apimi. ĩgũ yũre õari buherire judio masa árĩbirãre were-doregũ apimi. Erãre Jesure umupeodoregũ yũre erãre buhedoremi.

⁸ Eropigũ Goãmũ masa erã pepirire masimi. Eropigũ ĩgũ judio masa árĩbirãre ĩgũ yarãre ĩgũ iirare ĩhmubu ĩgũ Espĩritu Santore ohãmi erãre marire ĩgũ iidiro dopa ta.

⁹ Eropa ogũ ĩgũ marire erã sãre yujuro pa ta õaro iimi. Erã ĩgũre umupeocũ erã ñerire cadijimi ĩgũ.

¹⁰ Maripũ Moise dorerire yujuro bojebeaa. Mari ñecũ sũmarã mũa sã irire yujuro bojebirimariñuma. ¿Eropa mari yujuro bojebiriquerã duhpirã Jesu yarãre judio masa árĩbirãre irire Moise dorerire iidorediari mũa? ¿Duhpirã Goãmũ judio masa árĩbirãre ĩgũ yarã wacũ ĩgũ iirare “Ero wabeaa,” arĩri mũa?

¹¹ Eropa arĩbirã mari õpa pepia. Dohpaguere judio masa árĩbirã iro dopa ta mari sãre mari

Opu Jesu mahiri mera Goamu taugucumi, aripu Pedro erare.

12 Igu eroparicu peerã aripehrerã ejarimaria wañorã. Eropirã Pablo Bernabé mera judio masa aribirã watope Goamu turari mera erã ii ihmurare wereñorã erare.

13 Eropã erã weretuhajara puhru Santiago sã werepu.

—Acawererã, peeque yure.

14 Goamu judio masa aribirãre igu yarã arimorãre igu ne iirare weretuhajami Pedropu.

15 Iribojegue Goamu ya weremuhtanirã erã werediro dopa ta eropa wahabu judio masa aribirãre. Opa arĩ Goamu wereniguirire gojañuma erã iribojeguere:

16 Iribojeque Davi muru ya curu majarã erã oparã arira pehrea wabu. Puhru dujariguca yuhu. Eropigu dipaturi igu ya curu majagure opu acuguca.

17 Yu eropa acura puhru aripehrerã judio masa aribirã yure erã opure gamerãcoma erã. “Yaharã arique,” yu arĩ sihubeorãpu yure gamerãcoma.

18 Eropã ta arĩmi mari Opu. Iribojegue igu ire masare weremuripu, arĩ gojañuma Goamu ya weremuhtanirã.

19 “Eropigu opa pepia yuhu, aripu daja Santiago. Judio masa aribirãre Goamu yare ne gamenugarãre baja iidorebircãrã mari.

20 Eropirã erãre goja, obeorã mari. Opa arĩ gojabeorã. “Goamarã wëanirãre erã umupeora barire babircãque. Eropirã nome mera ñero iibircãque. Nome sã uma mera ñero

iibiricãque. Eropirã wuunugu mohwejẽnirãre waimurãre babiricãque. Dire ihribiricãque,” iripẽta arĩ were gojabeorã. Iri doreri Moise apira doreri sã ãhraa.

²¹ Yoari boje judio masa buheri wirigue Sabado árĩcũ Goãmũ Moisere ãgu apira dorerire buhemurima masa. Eropii árĩpehreri macarigue Moise dorerire buhemurima masa. Eropirã yũ arĩdiro dopa ta judio masa árĩbirãre Jesu yarãre were gojabeocũ, judio masapũ pee, “Gua iiguari ta ãhraa,” arĩrãcoma, arĩpũ Santiago.

Judio masa árĩbirãre erã gojarapũ obeõnorã

²² Eropirã Jesu ãgu apinirã, Jesu yarã oparã árĩpehrerã Jesu yarã mera Santiago arĩrare peerã, “Eropa ta iirã,” arĩõnorã. Tuhajanugu erã mera majarãre beyeõnorã erã obeomorã. Antioquíague Pablo, Bernabé mera erã wamorãre erã beyeõnorã. Eropirã erã Judare, Sila mera beyeõnorã erã obeomorã. Judapũ Barsabá peñe waĩcpũ. Erã beyerã acawererã Jesu yarã erã umupeonirã arĩõnorã.

²³ Erãre erã beyera pũhrũ Jesu yarã gojabeorapũre obeõnorã erã mera. Õpa arĩ gojaõnorã erã:

—Jesu ãgu apinirã, Jesu yarã oparã, mũa acawererã Jesu yarã mera gua õadorea mũare. Árĩpehrerã judio masa árĩbirã Antioquíague, Siriague, Ciliciague árĩrãre mũare Jesu yarãre õadorea gua.

²⁴ Gua mera majarã mũa pohrogue ejarã, mũare baja dorerire iidoreaõnorã. Eropirã mũare gariboaõnorã. Erã Goãmũ dorerire Moisere ãgu

apiraguere, mua dupu merogã gasirogãre wiriri sãre iidoreañorã. Gupũ erãre irire buhedorerã obeobirabũ.

²⁵⁻²⁶ Eropirã gua árĩpehrerã mua pohrogue obeomorãre gua beyeabũ. Mari mera majarãre, mari mahirãre, Pablo, Bernabé mera Cristo Jesu mari Opũ yare güiro mariro erã buhecũ bajasuburi gajirã erãre wejẽbocuriñorã. Erã eropa wejẽbocuricũ merogã mera tarimuriñorã erã. Erã Pablo, Bernabé mera gua beyenirãre dohpaguere obeoa.

²⁷ Eropirã Juda, Sila mera mua pohrogue obeoa. Gua gojabeorare erãpũ mũare wererãcoma.

²⁸ Espíritu Santo ñgu guñaro dopa ta gua sã pepia. Ōpa ãhraa iri: Gaji doreriguere apibea mũare. I doreri dihtare apirãca mũare.

²⁹ Goãmarã wéanirãre erã umupeora barire babiricãque. Dire ihribiricãque. Wũunũgu mohwejẽnirãre waimurãre babiricãque. Eropirã nome mera ñero iibiricãque. Nome sã uma mera ñero iibiricãque. I gua eropa dorera iibirã õarire iirã iica mua. Iripẽta ãhraa mũare gua werediari, arĩ gojabeoñorã Jesu yarã Jerusaléngue árĩrã.

³⁰ Iripũre gojatuhaja, wiañorã Antioquíague warãre. Erã wiara pũhrũ waha, Antioquíague ejañorã. Erã erogue ejara pũhrũ bajarã masare gameneredore, erã gojarapũre wiañorã erãre.

³¹ Iripũre erã buhera pũhrũ, iri õarire erã werebeorare peerã, õaro mucubiriñorã.

³² Juda, Sila mera Goãmũ yare weremuhtarã árĩñorã. Eropirã yoari boje Jesu yarãre Goãmũ

erãre ĩgu weredorerare wereñorã. Erã eropa werecũ peerã, Jesu yarãpũ mucubiri õaro siporãcuñorã.

³³ Eropirã Juda, Sila mera erogue bajamenurigã erã arĩra pũhrũ erã dujaricũ, ero majarã erã goeriserecũ, “Õaro waque mua,” arĩñorã Antioquia majarã. Eropirã Juda sãre obeonirãre õadorebeoñorã. Erã eropa arĩra pũhrũ Juda waha warũ.

³⁴ Silapũ dujarũ Antioquiague.

³⁵ Eropirã Pablo Bernabé sã bajamenuri dujañorã iri maca ta daja. Eropirã erã gajirã bajarã mera Jesu yare buhe wereñorã.

Dipaturi Pablo õari buherire buhecurigũ warũ daja

³⁶ Eropii bajamenuri pũhrũ Pablo wererũ Bernabére.

—Ina, arĩpehrerãre mari buhenuganirãre ĩhacurirã warã daja, arĩpũ Pablo.

³⁷ Eropigũ Bernabépũ Ñure erã mera aĩgãdiaripũ. Ñu Marco peñe waĩcũpũ.

³⁸ Pablorũ ĩgũre aĩgãdiabiripũ. Ero core ĩgu erã mera Panfliague ejagũ erãre cohã dujaa warũ. Eropigũ ĩgu erã iirire yujuro bojebiri dujaa warũ. ĩgu eropa yujuro bojebiricũ ĩagũ Pablo dipaturi ĩgũre aĩgãdiabiripũ.

³⁹ ĩgu aĩgãdiabiricũ ĩagũ Bernabé Pablo mera erã basi perã burigã arĩ game erã basi purumujucãñorã. Erã eropa arĩra pũhrũ Bernabépũ Chipre waĩcũri nũgũrogue Marcure aĩtaribuja warũ.

⁴⁰ Pablopꝛ Sila mera waha wapꝛ. Eropirã erã buherã waboro core Jesu yarã erãre obeorã, “Goãmꝛ mũare õaro ðhadibuporo,” arĩñorã. Erã eropa arĩra pũhrꝛ, Pablo Sila mera waha wapꝛ.

⁴¹ Eropa warã, Siria yeba, Cilicia yeba sãre eja, erogue Jesu yarãre õaro sĩporãcꝛ iri erã mucubiricã iĩñorã erã.

16

Timoteo Pablo Sila mera wapicũgãpꝛ

¹ Erã eropa iira pũhrꝛ Pablo sã Derbegue, Listrague ejañorã. Erogue ejagꝛ Timoteore bocajapꝛ. Timoteo Jesu yagꝛ árĩgꝛ, judio maso magꝛ árĩpꝛ ðgꝛ. ðgꝛ pago sã Jesu yago ta árĩpo. ðgꝛ pagupꝛ Griego masꝛ árĩpꝛ.

² Eropirã Litra majarã, Iconio majarã, Jesu yarã Timoteore masa “Õagꝛ ãhrimi,” arĩ weremuriñorã.

³ Eropigꝛ Pablo Timoteore aĩgãdiapꝛ. Eropirã iri yeba majarã judio masapꝛ Timoteo pagꝛ griego masꝛ ðgꝛ árĩcũ masiñorã. Eropigꝛ Pablo judio masare guari arĩgꝛ, Timoteo dũpũre miri gasirogã wiri aĩpꝛ. Judio masa doreri iri arĩro dopa ta iipꝛ ðgũre.

⁴ ðgꝛ eropa iira pũhrꝛ waha erã ejari macari majarãre erã gojabeorapũ majare wereñorã. Iripũ Jesu ðgꝛ apinirã, Jesu yarã oparã mera Jerusalengue árĩrã erã gojabeorapũ árĩyoro. Eropirã erã iri dorerire õaro wereñorã ero majarã Jesu yarãre.

⁵ Erã eropa werecũ peerã, Jesu yarãpũ Jesure umupeonemoñorã. Eropirã Jesu yarã ɯmũri nɯcɯ bajarã waniguicãñorã.

Pablo quẽroque Macedonia majagũre ãapũ

⁶⁻⁷ Eropigũ Asia yebaguepũre õari buherire buherã wadorebiripũ Espĩritu Santo erãre. Eropirã erã Frigia yebare taria, Galacia yebare taria, Misia yeba tũro pohro ejañorã. Bitinia yebapũ wadiariñorã erã. Eropigũ Espĩritu Santopũ erãre eroguere wadorebiripũ.

⁸ Ìgũ eropa dorera pũhrũ erãpũ Misia yebare tarigã, Troague erañorã.

⁹ Eroque ìgũ erara pũhrũ iri ñamire õpa quẽpũ Pablo. Macedonia yeba majagũ ìgũ pohro niguicã ãapũ ìgũ. “Guare Macedonia yeba majarãre itamugũ arique,” arĩ, sihurũ ìgũ Pablore.

¹⁰ Ìgũ eropa quẽra pũhrũ wahgã, gũa yare amutuhaja, Macedoniague waha wabũ gũa. “Goãmũ iri yebare õari buherire buhedoregũ iimi marire,” arĩ pepibũ gũa.

Pablo, Sila mera Filipogue árĩpũ

¹¹ Eropirã gũa Troague árĩrã dohodiru mera Samotracia waĩcũri nũgũroque taribujabũ gũa. Eropirã gajinũ Neápoligue wabũ gũa.

¹² Iri macare taria, Filipogue Roma majarã ya macague ejabũ gũa. Iri maca Macedonia yeba árĩri maca árĩbũ. Gũhyadiari maca árĩro iibũ. Eroguere bajamenũrigã gũa árĩbũ.

¹³ Eropirã Sabado árĩcũ gũa iri maca tũro pohroque, dia weca pohroque ejabũ. Ero Goãmũ

mera erã wereniguiro árĩbũ. Ero doarã ero gamenererã nome mera weretamubũ gũa.

14 Yujugo guare peego Tiatira majago Lidia waĩcũgo árĩmo. Eropigo igo õari suhri wjacæri suhrire duago árĩmo. Mari Pagũ Goãmũ sãre umupeogo árĩmo. Eropigũ Pablo ãgũ wererire õaro peecũ iimi Goãmũ igore.

15 Eropii igore igo ya wihi majarã mera waĩyemi Pablo. ãgũ eropa waĩyera pũhrũ õpa arĩmo igo:

—“Jesu yago ãhraa,” arãa mũa sã yũre. Eropirã yaha wihi ñajarinique mũa. Yũ mera dujanique, arĩmo igo guare.

Igo eroparĩcũ peerã igo ya wihi dujanibũ gũa.

16 Gajinũ Goãmũ mera erã wereniguirogue gũa wacũ watĩ ñajasũdigo bocatĩrimo guare. Igo gajirã pohro majago árĩmo. Eropigo igo masare “Õpa waroca mũare,” arĩ wereyugo árĩmo. Irire masare werego wũaro wajatabasamo igo oparãre.

17 Eropigo Pablo mera gũa wacũ, guare nurũsia, gaguiniguimo igo.

—Oã Goãmũ turatarigũ ãgũ itumurã ãhrima. Mari sĩrira pũhrũ Goãmũ marire ãgũ õaro tauborore werema erã, arĩ gaguiniguimo igo.

18 Bajanũri eropa arĩ garibomo Pablora. Igo eropa arĩ gaguiniguicũ daja Pablo gamebigũ maji ãha, õpa arĩmi watĩre:

—Jesucristo turari mera dorea mũre. Igore duhuque. Wanisa mũhũ, arĩmi Pablo.

ãgũ eroparĩcũ ta watĩpũ waha wapũ.

19 Watĩ igore eropa wara pũhrũ igo õago dujago masa erã waburire werego árĩbirimo pare. Eropirã igo oparãpũ niyerure igo wajatabigo igo wacũ ãarã, erã Pablo Sila mera ñeama. Ñehatuhaja, erãre taragãma iri maca decogue oparã pohrogue.

20 Eropa aĩgãrã, dipuwaja moadorerã pohrogue erãre apima erã õpa arĩrã:

—Oã judio masa mari ya macare gariborã iima.

21 Erã mari dorerire cóãdorerã, gaji buherire buherã iima. Mari ya dorerire tarinũgacũ iidiarã iima. Mari Roma majarã árĩrã oã erã wereripure iimasibea mari. Eropirã erã buherire mari gamebeaa, arĩma igo oparã dipuwaja moadorerãre.

22 Erã eroparĩcũ peerã masa bajarã Pablo sã mera guatariacãma. Eropirã dipuwaja moadorerãpũ Pablo Sila sã ya suhrire erã yehgue cóãra pũhrũ mta yucũgã mera tãradorema erãre.

23 Bũrigã erã tãrara pũhrũ peresu iima erãre. Erã eropa peresu iira pũhrũ peresure coregure õaro ãhadibudoreñorã erã.

24 Erã eropa dorera pũhrũ erãre coregũpũ iri wihi poheca maja taribugue erãre api, taboamiji goberigue sĩhacu erã guburire bihacãpũ.

25 Ñami deco Pablo, Sila mera Goãmure serẽ ãgure bayapeoñorã. Erã eropa bayacũ peeñorã gajirã peresugue árĩrã.

26 Erã eropa bayacũ ta iri wihi bũrigã ñohmeyoro. Ero eropa ñohmecũ yujuro mera árĩpehleri disiporori pãrimaapehrea wayoro.

Peresugue árĩrãre erã diriradari sã pãrisiri dija wayoro.

²⁷ Eropa wacũ ïagu, iri wihire coreguru wahgã, ïgu ñoserimijire aĩbeo, ïgu basi ñosediaripu.

²⁸ ïgu eropa iicũ ïagu Pablo ïgure burigã gaguiniguĩ opa arĩpu.

—Mu basi ñero iibiricãque. Árĩpehrerã õre ãhraa gua, arĩpu ïgu erãre coregure.

²⁹ ïgu eroparĩcũ peegu erãre coreguru sihãgodore, erã pohrogue omagã Pablo, Sila guburi pohrogue naragã merejapu ïgu.

³⁰ Eropigu ïgu erãre iri taribugue árĩrãre aĩ wiria, serẽpipu erãre.

—¿Dohpa iigucuri yũhu Goãmu ïgu yare taucũ gamegu? arĩ serẽpipu ïgu.

³¹ —Jesucristore umupeoque mũhu. Mu acawererã sã ïgure umupeoporo. Mũa eropa iicũ Goãmu muare taugucumi ïgu pohro mũa waboro dopa, arĩ wereñorã erã.

³²⁻³³ Erã eropa arĩrisubu ñami deco puhrugã arĩyoro. Erã eropa arĩra puhru erãre coredigu ïgu ya wihigue aĩgãpu erãre. ïgu ya wihigue aĩja, erã camire coepu ïgu. ïgu eropa coetuhajara puhru ïgu acawererã mera Goãmu yare buhepu Pablo sã. Erãre ïgu buhera puhru waĩyepu.

³⁴ Erãre waĩyetuhajara puhru erãre coredigu Pablo sãre bari peopu. Eropirã ïgu ïgu acawererã mera õari buherire erã peera puhru burigã mucubiriñorã. Goãmure masinugañorã.

³⁵ Boyodiji merecũ ĩarã oparãpũ erã surarare peresugue oboñořã Pablo sãre wiudorerã.

³⁶ Erã eropa wiudorera pũhrũ iri wihire coregũpũ Pablo sãre werepũ.

—Oparã mũare wiudoreañořã. Eropirã gũiro mariro wirique, arĩpũ ĩgũ Pablo sãre.

³⁷ Eropa erã wiudiaquerecũ ta Pablo werepũ surarare:

—Gũa ñero iibirabũ. Eropirã gũa ne dipuwaja mara. Bu gohra ta erã oparãpũ masa bajarã erã ĩhurore yucũ mera tãrama gũare. Gũa Roma majarã gũa árĩquerecũ ta gũare tãrama. Tãratuhaja peresu iiama gũare. Eropirã dohpagueere masa erã ĩabiro wiudiana gũare, gũare erã ñero iirare gũhyasiũro tariri, arĩrã. Oparã erã basi ta ahri aĩ wiurã ariporo gũare, arĩpũ Pablo surarare.

³⁸ ĩgũ eropa arĩ werecũ peerã dujaa wereñořã oparãre surarapũ. Erã eropa arĩ werera pũhrũ Pablo Sila mera Roma majarã erã árĩcũ masirã oparãpũ gũi árĩñořã.

³⁹ Eropirã erã Pablo sã pohro ejarã, õpa arĩñořã:

—Ñero iiabũ gũa mũare. Ne eropa dipaturi iisome, arĩñořã oparã Pablo sãre.

Eropa arĩtuhaja oparã erãre peresugue aĩ wiu, erã ya macare wiridoreñořã.

⁴⁰ Eropirã Pablo Sila mera peresugue árĩnirã wiri, Lidia waĩcũgo ya wihigue eja, Jesu yarãre bocatĩriñořã. Eropirã erã Jesu yarãre õaro wereñořã. Õaro sĩporãcũcũ iiñořã erãre. Erã eropa iira pũhrũ Pablo Sila mera waha wañořã.

17

Tesalónica majarã guañorã Jesu yarã mera

¹ Eropirã erã Anfípoligue eja taria, Apolonicague eja taria, Tesalónicague ejañorã erã. Ero judio masa buheri wihi árĩyoro.

² Eropigu Pablo iri buheri wihigue wapũ ñgũ iiguaro dopa ta gaji macarigue árĩgũ. Erogu eja, ùhre semana gohra erã soorinũrire Sabadonũrire Goãmũ yare iribojegue erã gojarare masare buhe, irire erã mera wereniguipũ Pablo.

³ Eropigu ñgũ Goãmũ yare werepũ õpa arĩgũ:
—Judio masa, mũa Opũ mũa coregũ Cristo arĩpũ masa ya arĩburire ñero taribu. Eropigu ñgũ sĩaria waha masa mũriapũ. Eropigu ihĩ Jesu yũhũ arĩ weregũ, ñgũ Cristo gohra ta ãhrimi marire taubu. Ñgũ ta ãhrimi mũa coregũ. Eropa ta werea Goãmũ yare erã gojarapũ, arĩ werepũ Pablo.

⁴ Ñgũ eroparĩcũ peerã bajamerãgã ero arĩrã “Diaye ta ãhraa,” arĩñorã. Eropirã erã Pablo sã mera wañorã. Eropirã gajirã sã griego masa bajarã Goãmũre umupeorãpũ, Pablöre peerã erã mera majarã nome sã, bajarã oparã nome sã, ñgũre peerã Jesu yarã dujañorã. Eropirã Pablo sã mera wañorã.

⁵ Judio masapũ erã eropa iicũ ñarã erãre ñhaturiñorã. Eropirã erã ñerãre mohmebirãre bajarãre sihu gameneo, õpa arĩdoreñorã: “Pablo ñgũ mera majarã mera ñero iirã iima,” arĩ gaguiniguidoreñorã erãre iri maca majarãre. Eropa gaguiniguirã arĩpehrerã iri maca majarãre guacũ iñorã Pablo sã mera. Eropirã

erã judio masa Jasõ ya wihigue ñaja Pablo sãre amariñorã erãre masaguere omorã.

⁶ Eropã amarã erãre bocabiriñorã. Eropirã Jasõre, gajirã Jesu yarã sãre ñeha tarawiriañorã erãre. Oparã pohroque aĩ eja, õpa arĩ weresãñorã erã.

—Pablo sã masare árĩpehreroguerẽ garibotariañorã. Eropirã dohpaguere mari ya macaguere eratuajama.

⁷ Eropigũ ihĩ Jasõ erãre ãgu ya wihigue ñajaridoreami. Erã árĩpehrerã mari weca opu Roma majagu ãgu dorerire tarinũgama. “Gajigu mua opu ãhrimi. Jesu ãgu ta ãhrimi,” erã erĩcũ mari opu César dorerire tarinũgama erã, arĩ weresãñorã judio masa erã oparãre.

⁸ Erã eropa arĩ weresãcũ peerã, árĩpehrerã masa, oparã sã gua “¿Dohpa wahari?” arĩ pepiñorã.

⁹ Eropirã oparã Jasõre, ãgu mera majarã sãre niyerure wajayedore, wiucãñorã.

Pablo Sila mera Bereague ejañorã

¹⁰ Iri eropa wacũ iri ñami ta mata Jesu yarã Pablo sãre dihbu obeocãñorã Bereague. Erogue eja judio masa buheri wihigue ñaja wañorã.

¹¹ Judio masa Berea majarãpu Tesalónica majarã tauro Goãmu yare õaro peerã árĩñorã. Eropirã erã Jesu yare erã peera puhru “¿Diaye ta ãhriri?” arĩ masidiarã, umuri nucũ Goãmu yare erã gojarapũre eropa buheniguicãñorã erã.

¹² Eropirã erã bajarã Jesure umupeoñorã. Griego masa sã, uma, oparã nome mera Jesure umupeoñorã.

13 Eropirã Pablo Bereague Goãmũ yare ïgũ buhecã sãre peebeo Tesalónica majarã judio masa Bereague ejañorã. Erogue ejarã, Berea majarãre quere goroweñorã. Pablo sã mera guacã iñorã erã.

14 Erã eropa iicũ ïarã Jesu yarã Pablöre yojarö mera wũariya tũrogue obeñorã. Eropigũ Sila, Timoteo mera Bereague ta dujañorã.

15 Eropirã gajirã Pablöre Atenague aĩgã soñorã. ïgũre sotuhaja maji dujaa wañorã. Erogue ejarã,

—Yojarö mera waha, wapicũrã waque Pablöre, arĩ wereñorã Silare, Timoteo sãre. Eropa arĩ weredorepũ Pablo erãre.

Pablo Atenague árĩpũ

16 Eropigũ Pablo Atenague coregũ iipũ Sila, Timoteo sãre. Eropigũ Atena majarã erã goãmarã wéanirãre bajarã erã opacũ ïagũ Pablo burigã bujawerepũ erã mera.

17 Eropa bujaweregũ judio masa buheri wi-higue judio masa mera dũyaso wereniguipũ ïgũ. Eropigũ daja judio masa árĩbirã mera sãre wereniguipũ ïgũ. Erã yujurãyeri Goãmũre umupeorã árĩñorã. Eropigũ Pablo iri maca deco umũri nũcũ ïgũ pohrogue eropa curimaji ñajarã mera wereniguipũ.

18 Gajirã epicũreo yare buherã, estoico yare buherã sã Pablo mera wereniguiñorã.

—¿Ihĩ wereniguiiri pehrebĩgũ dohpa arĩ wereniguiũ iiri ïgũ? arĩñorã erã.

Pablo Jesu yare, ïgũ masa mũriarare ïgũ wercã peerã õpa arĩ pepiriñorã erã masa. “Ïgũ

gajirã goãmarãre weregũ iicumĩ,” arĩ pepiriñorã erã.

¹⁹ Erã peera pũhrũ erã wereniguirogue Areópago waĩcũrogue Pablore aĩgãñorã.

—I buheri, mama buherire mũhũ dohpague wererare masidiaa gũa.

²⁰ Mũ buheri gajiropa ãhraa. Eropirã gũa irire masidiaa, arĩñorã erã Pablore.

²¹ Árĩpehrerã Atena majarã Ʃmũri nũcũ mama buherire wereniguidiañorã. Eropirã irire peediañorã. Gaji yeba majarã sã Atenague erarã eropa dihta iidiañorã. Eropirã Pablo ĩgũ wererire peediañorã erã.

²² Eropigũ Pablo Areópago waĩcũro wahgãnũgaja õpa arĩ werepũ:

—Atena majarã, bajarã goãmarã wéanirãre mũa bũrigã umupeocũ masia yũhũ.

²³ I maca mũa ya macare goãmarã wéanirãre mũa umupeori gororire ĩhacuriabũ yũhũ. Eropa ĩhacurigũ yũ sã yuju gorogue mũa goja apirare buheabũ. “Goãmũ, mari masibigũ yare umupeori goro ãhraa,” arĩ gojarare buheabũ mũa irire apiroguere. Mũa ĩgũre masibiriquererã ĩgũre umupeoabũ mũa. ĩgũre ta mũa masibigure weregũ iiaa yũhũ mũare.

²⁴ “Goãmũ árĩpehreri yebare, yeba maja sãre deyoro moañumi. ĩgũ Ʃmarore, yebare opũ árĩgũ ĩgũ masa erã iira wiri árĩbeamĩ.

²⁵ Eropigũ ĩgũ mari árĩricũrĩre ogũ mari itamurire gamebeamĩ. ĩgũ mojomorocũgũ árĩbeamĩ.

26 “Īgɯ yujugɯ ɯmɯ mera árĩpehreri yeba majarãre masare iĩñumi. Eropigɯ árĩpehreri yebaguere marire apiñumi ĩgɯ. “Ipẽ yoari boje õguere árĩrãcoma,” arĩgɯ queo apiñumi marire.

27 “Erã amarã yɯre bocarãcoma,” arĩ pepiñumi Goãmɯ. Eropigɯ Goãmɯ yoarogue árĩbeami. Mari mera ta àhrimi. Ōpa arĩ gojañumi gajigɯ.

28 “Marire árĩcũ iimi ĩgɯ. Īgɯ maricũ mari-boya mari sã. Eropigɯ masa nɯcɯre eropa árĩniguicãmi ĩgɯ,” arĩ gojañumi. Mɯa mera majarã iribojegue majarã bayarire õaro gojarã erã gojara àhraa iri. “Mari sã Goãmɯ porã àhraa,” arĩ gojañorã erã.

29 Eropirã mari ĩgɯ porã árĩrã, goãmarã wéanirãre, oro, plata, ɯtã mera mɯa gamero mɯa iinirãre “Goãmɯ àhrimi,” arĩ pepibiricãque mɯa.

30 Iribojegue masa masibirã erã árĩnicũ erã ñero iiquerecũ ta Goãmɯ eropa ĩacãniñumi. Eropa iiqueregɯ dohpaguepɯre árĩpehreri yeba majarãre erã ñerire bɯjaweredoremi Goãmɯ.

31 Pɯhrɯ ĩgɯ queorinɯ árĩpehreri yeba majarãre diaye ta beyegɯcumĩ Goãmɯ õarãre, ñerãre. Īgɯ beyedore ĩgɯ apidiro dopa Jesupɯ beyegɯcumĩ. Jesure sĩridigɯguere masupɯ ĩgɯ. Eropa masugɯ “Ihĩ yɯ apidigɯ àhrimi,” arĩ, ĩhmugɯ iipɯ Goãmɯ masare, arĩ werepɯ Pablo Atena majarãre.

32 Īgɯ eroparĩcũ sĩrinirã masa mɯriarare ĩgɯ wereniguicũ peerã gajirã ĩgɯre wereyañorã.

Gajirãpɯ õpa arĩñorã:

—Dipaturi ire m̄ werecũ gua peediaa daja, arĩñorã erã Pablore.

³³ Erã eropa arĩra p̄hr̄ Pabło waha war̄.

³⁴ Eropirã bajamerãgã ĩgu mera árĩrã Jesure umupeonũgañorã. Dionisio Areópago majaḡ oparã mera majaḡ Jesure umupeonũgar̄. Dámari waĩcũgo sã, gajirã mera Jesure umupeonũgaro.

18

Pabło Corintogue árĩr̄

¹ Eropiḡ Pabło Atenague árĩdiḡ waha Corinto waĩcũri macague ejar̄.

² Eroque ejaḡ judio mas̄ Aquila waĩcũgure bocajar̄ ĩgu. Arĩpehrerã weca op̄ Claudio waĩcũḡ judio masare Romague árĩrãre ĩgu cóãcũ Aquilar̄ ĩgu marapo Priscila mera waha, Corintogue ejar̄. Aquilar̄ Ponto waĩcũri yeba masa dehyoadiḡ árĩr̄. Eropirã erã Corintogue árĩcũ Pabło erã pohrogue ejar̄.

³ Aquila sã suhri wirire iirã árĩñorã. Pabło sã suhri wirire iigu ta árĩr̄. Eropiḡ ĩgu erã mera mohme ero dujar̄.

⁴ Eropiḡ Pabło Sabado árĩcũ semanari n̄c̄ judio masa erã buheri wihigue judio masare, judio masa árĩbirã sãre Goãm̄ yare werer̄.

—Ihĩ ĩgu werenigui ri diaye ta aħraa, arĩñorã masar̄ erã peera p̄hr̄.

⁵ Eropiḡ Sila, Timoteo mera Macedoniague árĩnirã Pabło pohrogue ejañorã. Eroque erã ejara p̄hr̄, Pabło suhri wiri mohmerire duhucã ʘm̄ri n̄c̄ judio masare buhem̄r̄.

—Jesucristo marire taubu mari coredigu ta ãhrimi, arĩ werepu erãre.

⁶ Īgu eropa arĩ buhequerecũ ta judio masapu ĩgure peediabiriñorã. Eropirã erã ñero quere goroweoñorã ĩgure. Erã eropa iicũ Pablo erãre ĩgu turibodiro dopa ta, ĩgu suhri maja mera pasiri mehpiru.

—Mua ya dipuwaja peamegue warãca. Goãmũ ĩgu dorediro dopa ta mũare buherabu yũhũ. Mũaru yure peediabirabu. Dohpaguere yuru judio masa árĩbirãre buhegu waguara, arĩpu Pablo judio masare.

⁷ Īgu eropa arĩra puhru ĩgu erogue árĩdigu waha, Tito Justo waĩcugu ya wihigue eja pu. Justo Goãmure umupeogu arĩpu. Īgu ya wihipu judio masa buheri wihi pohro árĩyoro.

⁸ Eropirã Crispo waĩcugu iri buheri wihi opu, ĩgu marapo, erã porã mera mari Opu Jesure umupeoñorã. Eropirã gajirã Corinto majarã bajarã Goãmũ yare peerã, Jesure umupeoñorã. Erã eropa umupeorã árĩcũ erãre waĩyepu.

⁹⁻¹⁰ Yuju ñami Goãmũ quẽroque werepu Pablöre. ĩgure õpa arĩpu:

—Mũ mera ãhrra. I macare yaharã bajarã ãhrima. Eropirã gajirã masa mũre ñero iimasibeamã. Eropigu güibita mũhũ. Eropigu yahare buriã wereque. Eropa pepibiricãque, arĩ werepu Goãmũ Pablöre.

¹¹ Eropigu yuju bojori õaro gaji bojori deco gohra ero majarãre Goãmũ yare buhe, árĩmũripu Pablo.

12 Īgŭ eropa árĩrisubu Galiõ waĩcugŭ Acaya yeba majarã opŭ ĩgŭ árĩcũ, judio masa árĩpehrerã yujuropa ta Pablore ñero weresãrã erañorã. Īgŭre ñeha dipuwaja moadorerã pohrogue aĩgãñorã erã Galiõ pohrogue.

13 Aĩgã õpa arĩ weresãñorã ĩgŭre:

—Ihĩ masare Goãmŭre umupeodoregŭ i yeba maja doreripŭre cóãdoremi, arĩ weresãñorã judio masa dipuwaja moadorerãre.

14 Erã eropa arĩ weresãcũ peegŭ Pablopŭ erãre werediaripŭ. Eropigŭ Galiõ opŭpŭ judio masare wererŭ.

—Ihĩ ñerire iidigŭ árĩcũ gŭa Romano majarã ya dorerire tarinugagŭ árĩcũ, mŭare yŭhriboaya yŭhŭ.

15 Mŭa ya doreripŭre ihĩ tarinugagŭ ĩgŭ árĩcũ mŭa basi ire amuque. Ire masibea yŭhŭ mŭa mera, arĩ wererŭ ĩgŭ judio masare.

16 Eropa arĩgŭ ta erãre Pablore weresãñirãre ĩgŭ ya taribugue árĩrãre cohã wiucãpŭ ĩgŭ.

17 Īgŭ eropa cohã wiura pŭhrŭ árĩpehrerã iri wihi árĩrã Sóstenere judio masa buheri wihi opŭre Jesu yagŭre ñeha, dipuwaja moadorerã pohrogue pañorã ĩgŭre. Erã eropa pacũ ĩagŭ Galiõ eropa ĩacãpŭ.

Pablo Antioquíague dujaa wapŭ daja

18 Eropigŭ Pablo Corintogue yoari boje árĩdigŭ “Wagŭ ĩaa,” arĩ goeriserepŭ ĩgŭ Jesu yarãre.

Īgŭ eropa arĩra pŭhrŭ ĩgŭ Priscila, Aquila mera Siria yebague árĩri macague taribuja wapŭ. Cencrea waĩcŭri macague erã taribujara pŭhrŭ Pablo Goãmŭre “Õpa mŭre iibasagŭra,”

ĩġu arĩrare iituhajagu árĩpũ. Eropigũ eropa iĩġu judio masa erã iiro dopa ta ĩġu poarire wũapehocãdorepũ.

¹⁹ Eropirã erã Efeso waĩcũri macague eja, Priscilare, Aquila sãre apipũ Pablopũ. Erãre ero api, ĩġupũ judio masa erã buheri wihigue wapũ. Iri wihigue eja, Goãmũ yare wererũ. Eropa wererũ judio masa mera dũyaso wereniguirũ.

²⁰ ĩġu eropa werera pũhrũ ĩġure erã mera dujadoreriñorã erã. Erã eroparĩquerecũ,
—Dujabeaa mũa mera, arĩpũ Pablo erãre.

²¹ Eropa arĩġu ta,
—Jerusalengue yũre waro gahmea. Bosenũre ĩagũ wabu iiaa. Eropigũ wagũ iiaa. Goãmũ gamecũ dipaturi dujariboca, arĩpũ erãre.

Ĩġu eropa arĩtuhaja Efesogue árĩdigũ taribuja wapũ.

²² Eropigũ Cesareague taribujaja tarigã, Jerusalengue ejapũ. Eroque eja, ero majarã Jesu yarãre “¿Ne ãhriri mũa?” arĩ, erãre ĩha taria Antioquíague ejapũ daja.

²³ Ero bajamenũri árĩpũ. Ero árĩdigũ tariapũ. Galacia yeba árĩri macarigue, Frigia yeba árĩri macarigue dipaturi eja, iri macari majarãre Jesu yarãre buhe õaro mucubiricũ iipũ.

Apolo waĩcũgu Efesogue buherũ

²⁴ Irisubure, judio masũ Apolo waĩcũgu, Alejandrĩa maca majagũ Efesogue ejapũ. ĩġu õaro weremehregũ árĩpũ. Eropigũ ĩġu Goãmũ ĩġu gojarare õaro masipũ.

²⁵ Gajigũ ĩġure Goãmũ yare weretuhamũripũ. Eropigũ ĩġu Ñũ waĩyegũ ĩġu buheri dihtare

masipũ. Eropa árĩqueregũ ãgũ burigã mucubiriri mera Jesu yare õaro buhepũ.

²⁶ Eropigũ judio masa erã buheri wihigue ãgũ güiro mariro erãre buhenugapũ. ãgũ eropa buhecũ erã peera pũhrũ Priscila Aquila mera ãgũre erã mera aĩgãñorã. Goãmũ yare õaro diaye õaro ãgũ werepehobiricũ ãarã diaye werepehocãñorã erã ãgũre.

²⁷⁻²⁸ Eropigũ ãgũ Apolopũ Acaya yebague ãgũ wadiacũ Jesu yarã ãgũre “Õaro waque,” arĩ, erã gojarapũrire oñorã ãgũre. Iripũri Acayague árĩrã Jesu yarãre Apolore õaro bocatĩridoreripũri árĩyoro. Eropigũ Apolo erogue ejagũ ero majarãre Jesure umupeorãre Goãmũ mahiri mera õaro itamupũ. Judio masare iri maca árĩrãre õpa arĩ werepũ:

—Goãmũ ãgũ obeodigũ mũa coredigũ ãhrimi Jesu. Cristo gohra ãhrimi, arĩ werepũ judio masare gajirã masa erã ãaro.

ãgũ eroparĩcũ, Goãmũ wereniguiiri gojarapũre õaro queroro werecũ erã pee “Diaye árĩbeaa,” arĩmasibiriñorã erã. Eropigũ Jesu mahiri mera Jesure umupeorãre ãgũ õaro itamupũ erãre Apolo.

19

Pablo Efesogue wapũ

¹ Corintogue Apolo ãgũ árĩrisubu, Pablopũ utã yucũgue mũri taria, Efesogue ejapũ. Erogue eja, yujurãyeri Jesu yarãre bocajapũ.

² Erãre ãgũ bocajara pũhrũ ãgũ erãre serẽpi ãapũ.

—¿Múa Jesure umupeora pũhrũ mũapũ Espíritu Santore opanũgari? arĩ serẽpi ĩapũ Pablo.

Īgũ eroparĩcũ peerã ĩgũre õpa arĩ wereñorã erã:

—“Espíritu Santo ãhrimi,” arĩ ne werebirama gũare, arĩ wereñorã erã.

³ Erã eropa arĩ werera pũhrũ Pablo erãre serẽpi ĩapũ daja:

—¿Noa ya buherire mũa peera pũhrũ waĩyeari mũare? arĩpũ ĩgũ daja.

—Ñu ya buherire gũa peera pũhrũ waĩyeama gũare, arĩ wereñorã erã.

⁴ Erã eroparĩcũ peegũ õpa arĩpũ Pablo:

—Masa erã ñeri iirare erã duhucũ ĩagũ waĩyerũ Ñu. Eropiro ĩgũ waĩyeripũ erã ñeri iirare erã duhurare masare ĩhmuburi árĩyoro. Eropigũ gajino sãre werenemopũ Ñu. “Yũ pũhrũ aribure ĩgũre umupeoque mũa,” arĩpũ Ñu masare. Eropa arĩgũ Jesure ta umupeodoregũ ĩipũ, arĩ werepũ Pablo erãre.

⁵ Īgũ eroparĩcũ erã peera pũhrũ, Jesu waĩ mera waĩyerũ erãre.

⁶ Eropigũ Pablo erã yujurãyeri weca ĩgũ mo-jotorire ĩgũ duhpeocũ, Espíritu Santopũ erapũ erãguere. Īgũ eropa erara pũhrũ erãpũ peeyamariri yare werenĩgui, Goãmũ yare wereñorã.

⁷ Erã árĩpehrerã doce ũa erã árĩñorã.

⁸ Pũhrũ Pablo judio masa erã buheri wihigue ñaja, ƚrerã abe gohra gũiro mariro Goãmũ ĩgũ opũ árĩrare were, wereniguirũ erã mera.

Īgure erã eropa peera pũhrũ “I diaye ta ãhraa,” arĩñorã erã.

⁹ Gajirãpũ peediabiriñorã. Eropirã erã masa erã peeuro iri õare buherire ñero arĩ werenigui ĩhmuñorã. Erã eroparĩcũ peegũ Pablopũ Jesu yarãre sihu wiria, gajipũgue waha warũ. Waha, Tirano waĩcũgũ ya buheri wihigue umũri nũcũ masare Goãmũ yare werepũ igũ.

¹⁰ Pe bojori gohra buhepũ erãre. Īgũ eropa buhecũ árĩpehrerã Asia yeba majarã judio masa, judio masa árĩbirã mera mari Opũ Jesu yare peeñorã.

¹¹ Eropigũ Goãmũ turari mera Pablo bajasuburi deyoro moarire ii ĩhmupũ.

¹² Pablo ĩgũ suhri gasirore, ĩgũ suhrirore ĩgũ dupũ pẽhrera gasirore dorecũrãre aĩgãñorã gajirãpũ. Masa dorecũrã iri suhrire pẽhrerã õarã wañorã. Eropirã watẽa ñajasũnirã iri suhrire erã pẽhrera pũhrũ watẽa wiria wañorã erãre.

¹³⁻¹⁴ Gajirã judio masa eropa curiniguirã watẽare cóãrã judio masa yeea árĩñorã. Esceva waĩcũgũ siete ĩgũ porã árĩñorã. Escevapũ judio masũ pahia opũ árĩpũ. Eropirã erã Pablo ĩgũ iidiro dopa ta Jesu turari mera watẽare cóãdiariñorã. Eropirã watẽa ñajasũdigũre boca watẽare doreriñorã erã.

—Jesu Pablo ĩgũ weregũ ĩgũ turari mera dorea mũare. Duhuque ĩre, arĩriñorã erã.

¹⁵ Watẽare erã wadorera pũhrũ, watẽapũ masũguere õpa arĩñorã erãre.

—Jesure masia. Pablo sãre masia. Mũapũre masibea, arĩñorã watẽa erãre.

16 Erã eroparĩcũ ta watẽa ñajasũdigupũ burigã erãre ñehamaa wapũ. Eropigũ erãre ñetariaro iipũ. Īgũ eropa iira pũhrũ suhri marirã, camicurã oma wiriañorã erã iri wihire watẽa cóãdiarãpũ.

17 Erã eropa iira pũhrũ árĩpehrerã Efeso majarã, judio masa, judio masa árĩbirã mera irire pee, gũitariacãñorã erã. Eropirã mari Opũ Jesu yare wereyaro mariro werenĩguĩñorã masapũ.

18 Eropirã masa bajarã Jesure umupeorã erã ñero iirare wererã ariñorã.

19 Erã mera majarã bajarã yeea árĩñorã. Eropirã erã erã gojarapũrire purisiriri wereripũrire erogue aĩgãri, masa erã ĩaro iripũrire soe cóãcãñorã erã. Iripũri wajacurare erã queocũ, árĩpehreripũri cincuenta mil plata árĩripũri wajacuriyoro iripũri.

20 Eropirã Goãmũ yare gamerã bajarã wañorã. Goãmũ turari mera ĩgũ yarã wañorã.

21 Erã eropa wara pũhrũ Pablo õpa arĩ pepipũ: “Macedonia yeba ejamũhta, iri yebare taria Acaya yebaguere ejagũra. Iri yebare yũ ejara pũhrũ Jerusaléngue wagũra. Iri macare yũ ejara pũhrũ Romague ĩagũ wagũra,” arĩ pepipũ Pablo.

22 Eropigũ perãre ĩgũre itamurãre ĩgũ core obeomũtapũ Macedonia yebague. Timoteo Erasto sã árĩñorã erã. Eropigũ Pablopũ yujugũ ta dujapũ Asia yebague.

Efesogue masa gua gaguiniguiñorã

23 Irisubure Efesogue Jesu yare gajirã gamebirã Pablo sãre ĩhaturiñorã.

24 Yujugu platare mohmegu Demetrio waĩcugu árĩpu. Īgu plata mera erã goãmo Artemisa waĩcugo umupeori wihi wéara wirire m̄ta wirigãre iigu árĩpu. Eropigu ĩgu gajirã plata mohmerã mera erã wéanirãre w̄aro dua w̄atamuriñorã erã.

25 Eropigu Demetrio gajirã plata mohmerãre sihu gameneo, werepu erãre.

—Peeque m̄a. I mohmeri mera mari wéanirã mera w̄aro mari w̄atarare masia m̄a.

26 Ihĩ Pablo ĩgu iirare ĩgu buhera sãre masia m̄a. Ōpa arĩ buhemi ĩgu: “Goãmarã wéanirã masa erã iinirã ojocarirã árĩbeama,” arĩ weremurami ĩgu. Īgu eroparĩcũ peerã, Efeso majarã, árĩpehrero Asia yeba majarã sã ĩgu buherare “Diaye ta ãhraa,” arãñorã irire.

27 Eropa arĩrã mari mohmerire mari wéarare masa gamesome. Eropirã mari goãmo w̄ago Artemisa ya wihire cóãbocoma. Eropirã árĩpeherrerã Asia yeba majarã, árĩpehleri yeba majarã igore umupeosome pare. Eropirã masa igore masibirã mari wéarare asũsome, arĩpu Demetrio erãre.

28 Īgu eroparĩcũ peerã burigã gua, gaguiniguĩñorã:

—Artemisa Efeso majarã yago goãmo turago ãhrimo, arĩ gaguiniguĩñorã erãpu.

29 Erã Eropa gaguiniguicũ Efeso majarã árĩpeherrerã sã gaguiniguitaria wa pee masiri pehrea wañorã. Eropa warã Gayore, Aristarco sãre ñeha, masa erã gamenererogue erãre

taragãñorã. Gayo, Aristarco mera Macedonia majarã árĩñorã. Pablo mera curirã árĩñorã.

³⁰ Erãre ñeacũ ĩha Pablopũ masa pohro weregũ wadiaripũ. Jesu yarãpũ ĩgũre wadore-biriñorã.

³¹ Eropirã gajirã sã iri yeba majarã oparã, Pablo mera majarã árĩrã erã pohro majarãre weredoreñorã Pablore:

—Masa erã gamenererogue wabiricãque, arĩ weredoreñorã oparã Pablore.

³² Eropirã ero gamenererã mera majarãpũ bajarã “¿Duhpimorã mari gamenererã iiri?” arĩ masibiriñorã. Eropirã erã gaguinigunemoñorã. Ipũgue árĩrã gajiropa arĩ gaguinigui, gajirã sã gajiropa arĩ gaguiniguiñorã.

³³ Eropirã judio masapũ Alejandro waĩcũgũre masare weredoreñorã. Eropigũ Alejandro “Ejarimaricãque,” arĩgũ ĩgũ mojoto mera paatupũ. “Oã gũare judio masare turirã iima,” arĩ pepigũ judio masare cãhmotadiagũ wereniguiripũ.

³⁴ ĩgũ eropa wereniguidiaquerecũ judio masũ ĩgũ árĩcũ ĩarã masa árĩpehrerã yujuro mera pe hora gaguiniguiñorã.

—Artemisa, Efeso majarã yago mari goãmo turago ãhrimo, arĩ, gaguiniguiñorã erã.

³⁵ Erã eropa arĩ gaguiniguiçũ ĩagũ Efeso majarã oparãre itamugũ masare “Ejarimaricãque,” arĩ, werepũ erãre.

—Mũa Efeso majarã peeque. Mari Efeso majarã turago Artemisa ya wihi corerã mari árĩcũ árĩpehreri yeba majarã masima. Eropirã

igo wéarare ɯmarogue dijaridigore diburã mari arĩɯ sãre masima masa.

³⁶ Eropirã “I diaye árĩbeaa,” arĩmasibeama. Eropirã guabiricãque mɯa. Ōaro pepique mɯa.

³⁷ Oã mɯa ñeagãrirã mari goãmore ñero arĩ wereniguibirama. Eropirã erã goãmarã ya wiriguere ñaja, yajabirama. Eropirã ōaro iique mɯa.

³⁸ Demetrio, plata mohmerã mera oãre mɯa ñearãre weresãdiarã, dipuwaja moaropure wereporo erã. Erã oparãre oãre weresãmasima.

³⁹ Mɯa gajino iidiarã, ōaro mera irire gamenere iique. Mɯa iiro dopa iinemobiricãque.

⁴⁰ Dohpagãre mɯa gua, gaguinirare mari oparã peerã, erã marire weresãbocoma. “Marire cóãrã iicoma,” arĩ pepirãcoma oparã marire. Eropirã mari arĩ gaguiniguirare erãre ōaro diaye weremasibeaa mari, arĩpɯ oparãre itamugɯpɯ masare.

⁴¹ Eropa arĩ weretuhaja, “Iripêta ãhraa. Waque,” arĩpɯ ãgɯ masare.

20

Macedonia yebague sãre, Grecia yebague sãre Pablo ejaɯ

¹ Erã eropa wara pɯhrɯ, Pablopɯ Jesu yarãre sihu gameneo werepɯ. Weretuhaja, mojoto ñeha, goeriserepɯ. Goeriseretuhaja, Macedoniague waha wapɯ.

² Eroque eja were, ero majarã Jesu yarãre mucubiricã iipɯ ãgɯ. Erãre weretuhaja, Greciague ejaɯ ãgɯ.

³ Erore ïgu urreã abe gohra árïpu. Ero árïgu Siria yebague taribuja wadiaripu. Eropirã judio masa duhri, ïgure ñeadiariñorã. Irire pee Pablo gaji mague Macedonia wari mague waha wapu.

⁴ Eropa wagu Asiague ta eja pu. Ero Berea majagu Sópater waicugu Pablöre wapicugãpu. Eropirã Tesalónica majarã Aristarco, Segundo sã ïgure wapicugãñorã. Eropirã Asia majarã Tíquico, Trófimo sã Asiague ïgure wapicugãñorã. Derbe majagu Gayo waicugu Timoteo sã ïgu mera wañorã.

⁵ ïgu mera majarã ïgu core waha, Troa waicuri macague ïgure coreñorã.

⁶ Erã eropa corecũ bugabiriri panre bari bosenu puhru guapu Filipogue árïñirã dohodiru mera waha, cinco nuri taribujarã Troague gua eja pu. Siete nuri gohra árïbu gua erogueru.

Troague Pablo curigu wapu

⁷ Soorinu árïcũ Jesu yarã gamenere panre duhpeoñorã Goãmũ yare bocatïrimorã. Erã eropa iiboro core Pablo erãre buhepu. Eropigu Pablo gajinupure wabu árïgu yoari boje ïgu buhepu. Ñami deco mera buhe duhubu iiripu.

⁸ Eropirã erã umaro maja taribugue baja dipu sihãgori dipu árïri taribugue gamenereñorã.

⁹ Pablöre erã peerisubu mamũ Eutico waicugu ventana weca müribejaja doapu. Eropigu Pablo erãre yoari boje buhenemocũ ïgu mamũre waja ariyoro. Eropigu ïgu carïa wa uhre caya wecague doadigu majimadija wapu. ïgu eropa yuhridijara puhru erã ïgure sïriadigugueru aïwahgũ doboñorã.

10 Erã eropa iicũ ãagũ Pablo dijari, mamũre papeopũ. Ìgũ eropa iira pũhrũ Jesu yarãre werepũ Ìgũ:

—Sĩporã ñebiricãque. Sĩribeamĩ ihĩ. Ojocarimĩ, arĩpũ Pablopũ.

11-12 Ìgũ eroparĩcũ mamũpũ sĩridigũpũ masa wapũ. Ìgũ masacũ ãha erã mucubiritaria wañorã. Eropa mucubirirã umaro maja taribugue mũria, panre duhpeoñorã bocatĩrimorã. Erã eropa iira pũhrũ yoari boje Pablo erãre buherũ daja. Boyoboro coregã erãre buheduhupũ. Buhetuhajacã waha wapũ Pablo.

Pablo Troague árĩdigũ waha, Miletogue ejapũ

13 Pablo core dohodiru mera Asogue gũapũ ejamũhtabũ. Pablopũ mague wadiami. Pablo Ìgũ arĩdiro dopa ta Asogue Ìgũre gũa bocatĩribũ.

14 Ìgũre gũa bocatĩricũ, gũa mera ñajami dohodirugue. Iriru mera waha, Mitilenegue gũa ejabũ.

15 Eroguere eja taria gajinũ Quĩore tariabũ gũa. Gajinũ Samogue ejabũ gũa. Gũa carĩra pũhrũ gajinũpũre Miletogue ejabũ pare gũa.

16 Pablo Pentecostenũ gohra Jerusalenguere ejadiami. Eropigũ Asia yebague yoari boje árĩdiabirimi. Eropigũ Efesore diaye taria, Miletogue ejatuhajabũ gũa.

Pablo Efeso majarã Jesu yarã oparãre werepũ

17 Eropigũ Pablo Miletogue árĩgũ, Goãmũ yarã Efeso majarã Jesu yarã oparãre sihubeomi Ìgũ.

18 Eropa ïgu sihubeora pũhrũ erã Pablo pohrogue erama. Erã eracũ ïagũ erãre Pablo weremi.

—Asiague ne eragũ mũa mera yũ iirare masia mũa.

19 Mũa mera árĩgũ ne gajiropa arĩro mariro Jesu mari Opũ yare iimũribũ yũhũ. Eropigũ mũare mojomoro ïabũ. “Mũare tarinũgaa,” arĩbirimũribũ yũhũ. Judio masa erã yũre ñero iiquerecũ ta Goãmũ yare iimũribũ yũhũ.

20 Eropigũ mũa õaro waburi dihtare mũare buhepehocãbũ yũhũ. Masa erã ïaro mũa wirigue sãre buhebũ yũhũ.

21 Eropigũ judio masare, judio masa árĩbirã sãre yujuropa ta buhebũ yũhũ. “Mũa ñerire bujawereque. Goãmũ yare gohrotoque. Eropirã Jesu mari Opũre umupeoque,” arĩ weremũribũ yũhũ.

22 Eropigũ Espĩritu Santo ïgu dorediro dopa ta dohpaguere Jerusaléngue wagũ iiaa. Yũ erogue wagũ yũ gajiropa waborore masibea yũhũ.

23 Õpa arãmi Espĩritu Santo yũre: “Jerusaléngue mũhũ ñero tarigũca. Eropirã mũre peresu iirãcoma,” arãmi Espĩritu Santo yũre. Dohpaguere yũ ejara macari nũcũgue eropa arĩ wereama yũre. Jerusaléngue wagũ Espĩritu Santo ïgu werera dihtare masia.

24 Eropigũ õari buherire, Goãmũ ïgu mahiri buherire werebu ãhraa yũhũ. Jesu mari Opũ ïgu ya árĩburire iipethodiaa yũhũ. Ire iigu árĩgũ, yũ sĩriborore gũibea yũhũ.

25 “Eropigũ mũa mera árĩgũ Goãmũ ïgu opũ árĩrare weremũribũ yũhũ mũare. Mũa yũ eropa

arĩ buhenirãre ne dipaturi mũare ĩasome yũhũ. Ire masia yũhũ.

26-27 Eropa masigũ dohpagãre ire werea mũare. Árípehreri Goãmũ yare werebũ yũhũ mũare. Eropirã arĩpehrerã mũa mera majarã Goãmũ yare gamebirã erã árĩcũ yaha dipuwaja árĩbeaa.

28-29 Mũa basi õaro iique. Eropirã mũa Jesu yarãre Espíritu Santo mũare ĩgũ ĩhadibudorerare ĩhadibuque. Ovejare ĩhadiburã ovejare erã ĩhadiburo dopa ta Goãmũ yarã sãre ĩhadibuque mũa. Goãmũ magũ ĩgũ sĩrigũ ĩgũ di cóãro mera Goãmũ erãre ĩgũ yarã árĩmorã iidi árĩmi. Yũhũ õre wara pũhrũ gajirã ñerãpũ mũa pohro ahri erã buheri mera mũare goroweo dũca waricũ iirãcoma. Eropirã Jesu yarãre õaro ĩhadibuque.

30 Pũhrũguere gajirã mũa mera majarã ta Jesu yarãre gũya, gaji buherire peedorerãcoma. Erã eropa peedorecũ erã peerãcoma.

31 Eropirã õaro iique mũa. Ëmũri nũcũ, ñamiri nũcũ mojomoro ĩari mera buhemũribũ yũhũ mũare. Ëhre bojori gohra õaro buhebũ mũa arĩpehrerãre. Irire yũ buhera õaro guñaniguicãque mũa.

32 “Dohpaguere yũ wara pũhrũ Goãmũ mũare ĩhadibugũcumi. ĩgũ mahiri buherire mũa buherã õaro árĩrãca mũa. Goãmũ ĩgũ buheri mera mũare ĩgũ yarãre õaro itamumasimi. Eropigũ ĩgũ yarã dihtare ĩgũ iidiadiro dopa ta mũa tamerare õaro iigũcumi.

33 Mũa niyeru oparire, mũa suhri opari sãre

“Yure oque,” arĩbirimuribũ.

³⁴ Yũ basi mohme wajatabũ yaha árĩburire. Eropigũ yũ gamerire, yũ mera majarã erã gameri sãre yũ mohme wajatara mera aĩmuribũ. Yũhũ eropa iirare masia mũa.

³⁵ Mari õpa bũrigã mohmerã gajino moorãre itamuro gahmea marire. Ire mũare ii ãhmumuribũ yũhũ. Jesu mari Opũ ãgũ arĩrare guñaque mũa. “ãgũ ocũ ñeadigũ tauro odigupũ mucubirimi,” arĩpũ Jesu ãgũ basi, arĩ weremi Pablo Jesu yarãre.

³⁶ Eropa arĩtuhaja Pablo erã mera mereja, Goãmũre serẽma.

³⁷ ãgũ eropa serẽtuhajacũ erã árĩpehrerã Pablõre pabua wayuporã mimi ore goeriserema.

³⁸ “Mũare dipaturi ãasome yũhũ,” ãgũ arĩcũ peerã bũrigã bũjawerema erã. Eropirã erã ãgũre tuunũrusia buhama peramague. Eroque ãgũre ãhanũrusiama gũa wacũ.

21

Pablo dipaturi Jerusalẽngue warũ

¹ Jesu yarãre “Wagũ iiaa,” arĩ, dohodiru mera, Cos waĩcũri nũgũrogue diaye waha taribujabũ gũa. Gajinũ Roda waĩcũri nũgũrogue taribujaja, taria, Pátara waĩcũri macague ejabũ gũa.

² Pátara árĩrã, Feniciague waburidirure dohodirure bocajabũ gũa. Eropirã iriru mera wabũ gũa.

³ Eropa warã Chipre waĩcũri nũgũrore diaye ta ãha tariabũ gũa. Copũ dujabũ iri nũgũro. Iri nũgũrore taria, Siria waĩcũri yebague ejabũ

gua. Eropirã dohodiru maja doberire dohodiru majagu Tiro waĩcũri maca ĩgu durimujucũ, ero payanibũ.

⁴ Ero Jesu yarãre ĩarã, siete nũri gohra dujanibũ gua iri maca ta. Eropirã ero majarã Jesu yarã Espĩritu Santo ĩgu werediro dopa ta erã Pablõre Jerusalẽngue wadobiririma.

⁵ Erã eropa arĩquerecũ iri macare siete nũri gua arĩra pũhrũ, waha wabũ daja. Gua waboro coregã arĩpehrerã Jesu yarã, erã marasã nome mera, erã porã mera, maca tũro pohro guare ĩhadujarã wama. Eropirã arĩpehrerã gua imiporogue eja, mereja Goãmũre serẽbũ.

⁶ Gua eropa serẽra pũhrũ, “Warã iiaa,” arĩ, erãre pabuatuhaja goeriseretuhaja waha wabũ gua. Gua wacũ ĩhanũrusia, erãpũ majaa wama erã ya wirigue.

⁷ Tiro waĩcũri macare maja tariabũ gua. Eropirã Tolemaidague tuhajabũ gua. Ero ta wũariyare watubũ. Iri macare eja, Jesu yarãre “Acawererã, ¿ãhriri mũa?” arĩ, yujunũ erã mera arĩribũ.

⁸ Eropirã iri maca ma buharo arĩcũ gajinũ daja Pablo mera mague wabũ gua Cesarea waĩcũri macague warã. Eroque eja, õari buherire weregu Felipe waĩcũgu ya wihigue ejabũ. Eropirã ĩgu mera dujabũ gua. Felipe Jesu yarã erã siete beyenirã mera majagu arĩmi.

⁹ Eropigu ĩgu wapicũrã nome pagũ arĩmi. Erã nomepũ Goãmũ yare wererã nome arĩma.

¹⁰⁻¹¹ Eroque gua bajamenũri gua arĩra pũhrũ, Agabo waĩcũgu Goamũ yare weremũhtagũ Judeague arĩgu guare ĩagu erami. Eropigu

ĩḡu Pablo yadare tuãdiuridare aĩ, ĩḡu basi ĩḡu guburire, ĩḡu mojotorire diri ĩhmu wereyúmi.

—Ōpa arĩmi Espĩritu Santo. “Idare opagu Jerusaléngue ĩḡu ejacũ, judio masa eropa ta dirirãcoma ĩḡure. Dirituhaja, judio masa árĩbirãre orãcoma erã ĩḡure,” arĩmi Espĩritu Santo, arĩ wereyúmi Agabo.

¹² ĩḡu eroparĩcũ peerã, gũa Cesarea majarã mera Pabloure bũrigã mahibũ. ĩḡure “Jerusaléngue wabiricãque,” arĩribũ.

¹³ Gũa eroparĩcũ Pablopũ yũhrimi:

—¿Dohpa arĩ orerã iiri mũa? Yũpũre bũjawerecũ iiaa mũa. Erã yũre peresu iicũ õaroca. Yũhũ Jerusaléngue Jesu mari Opũ yare yũ iira waja yũ sĩricũ õaroca, arĩmi Pablo gũare.

¹⁴ “Wabeaa,” ĩḡu arĩcũ peediarã iiribũ gũa. ĩḡu “Wagũra,” ĩḡu arĩcũ, eropa pepicãbũ gũa. Ōpa arĩbũ:

—Mari Opũ ĩḡu gamero dopa ta iiporo, arĩbũ gũa.

¹⁵ Irire weretamutu, gũa yare ahmu, waha wabũ daja Jerusaléngue warã.

¹⁶ Eroque gũa wacũ bajamerãgã Cesarea majarã Jesu yarãpũ gũa mera wama. Eropirã Jerusaléngue eja erã mera majagũ Mnasón waĩcũgu ya wihigue ejabũ gũa. Mnasón Chipre majagũ ĩḡu yoari boje Jesu buhegu árĩmi. Eropirã ĩḡu ya wihi gũa árĩguri wihi árĩbũ. Eropirã Jerusaléngue ejabũ gũa.

Pablo Santiagore ĩagũ warũ

17 Jerusaléngue gua ejacũ, ero majarã Jesu yarãpũ “¿Erarari?” arĩ, mucubiriri mera bo-catĩrima guare.

18 Gajinũ Pablo gua mera Santiagore ĩagu ejami. Gua erogue ejacũ ero árĩpehrerã Jesu yarã oparã árĩma.

19 Eropigu Pablo erãre ĩgu mojoto ñeara pũhrũ judio masa árĩbirãre ĩgu buherare werepehomi. Goãmũ ĩgu itamuri mera ĩgu iirare werepehomi Pablo Jesu yarãre.

20 ĩgu eropa arĩ werecũ peerã,

—Goãmũ õagu, turagu aħrimi, arĩ umupeoma erãpũ. Eropa arĩtuhaja erã Pablora õpa arĩ werema.

—Acaweregũ, dohpaguere bajarã judio masa Jesure umupeorã aħrima. Mũhũ irire masia. Eropirã erã õpa arĩ pepima: “Goãmũ ĩgu dorerire, Moisegue marire ĩgu apirare marire iipehoro gahmea,” arĩrã iima.

21 Õpa arĩnemoma erã. “Gajipũgue árĩrãre judio masa árĩbirã watope árĩrãre judio masare Goãmũ Moiserẽ ĩgu apirare ‘Iibiricãque,’ arĩ doremi Pablo,” arãma õ majarã judio masa mũre. “Pablo judio masa porãre mari dorero dopa miri gasirogãre wiri aĩdorebeamĩ,” arãma erã mũre. “Judio masa erã iidorerire Pablo duhudoremi,” arĩ i sãre werewũama mũre.

22 Eropirã mũhũ õre eracũ peerã erã gamenerãcoma mũre turimorã. Eropigu õpa iiro gahmea mũre.

23 Mũre gua dorero dopa ta iique. Dohpague õre wapicũrã mũma Goãmũre umupeorã “Õpa iirãra,” arĩrã aħrima.

24 Erã mera waque. Eropirã Goãmũ Moisere ïgũ dorediro dopa ta erã basi Goãmũ yare iiburire iimorã erã ñeri iirire coerã iima. Mũ sã eropa ta iique. Eropa iigũ erã eropa iira wajare wajayeque m̃pũ. Mũhũ eropa wajayera pũhrũ erã poarire wuadoremāsima erã. Mũ eropa iicũ ïarã masa m̃re erã arĩra iri gũyara árĩcũ masirãcoma erã árĩpehrerã. Goãmũ Moisere ïgũ apira dorerire iigũ m̃ árĩcũ masirãcoma erã.

25 Judio masa árĩbirã Jesu yarãpũre gũa go-jarapũre obeotuhajabũ. Őpa arĩ gojabũ gũa. “Goãmarã wéanirãre umupeora barire, dire, wũunũgũ mohwejenirã waimũrãre babiricãque m̃a. Eropirã nome mera ñero iibiricãque. Nome sã ũama mera ñero iibiricãque,” arĩ were gojabũ gũa gojarapũre, arĩma erã Pablore.

Goãmũ wihigue judio masa Pablore ñeañorã

26 Erã eropa arĩ wereniguira pũhrũ gajinũ Pablorũ wapicũrã ũama mera erã basi Goãmũ yare iimorã erã ñeri iirire coemorã, Goãmũ wihigue ñaja wañorã. Iri wihigue ñajajagũ, erãre werepũ Pablo: “I nũcũ nũri dũhyaa m̃a coeboro,” arĩ werepũ ïgũ wapicũrãre. Eropirã erã coeturinũ erã nũcũ Goãmũre waimũrãre erã oburinũ árĩbũ.

27 Eropii erã coepehodiromo merogã dũhyacũ gohra Goãmũ wihigue Pablo ïgũ árĩcũ Asia yeba majarã judio masapũ ïañorã ïgũre. Eropa ïarã gajirãre iri wihi árĩrãre Pablo mera guacũ iĩñorã erã. Eropa guarã judio masa Pablore ñeha õpa arĩ gaguiniñorã:

28 —Mua gua acawererã Israe masa guare itamurã arique. Ihĩ ãhrimi. Moise dorerire i wihi sãre cóãdore buhemi árĩpehrerãre. Eropigũ ãgũ Goãmũ wihiguere judio masa árĩbirã sãre aĩñajadi ãhrami. Eropigũ i wihire ñeri mariri wihire ãgũ goroweoadi ãhrami, arĩ gaguiniguĩnorã judio masa Asia yeba majarã ero majarãre.

29 Ero core Jerusalén Pablo Trófimo mera ãgũ árĩcũ judio masa ãañorã. Trófimo Efeso majagũ judio masũ árĩbiridigũ árĩmi. ãgũ eropa árĩcũ masirã õpa arĩ pepiñorã erã: “Pablo Trófimore Goãmũ wihire aĩñajagũ iicumi,” arĩ pepiriñorã judio masa.

30 Masare erã eropa arĩ were erã gaguinigu-ira pũhrũ iri maca majarã árĩpehrerã burigã guañorã. Bajarã omagãri, Goãmũ wihi árĩgũre Pablöre ñeha tarawiria wañorã. Tuhajanugu iri wihi disiporore bihañorã erã ãgũgue ñajariri arĩrã.

31 Eropirã erã ãgũre wejẽmorã iiriñorã. Erã eropa iicũ ãarã gajirãpũ wererã wañorã surara opũre. “Árĩpehrerã Jerusalén majarã gamenere gua, gaguiniguirã iiama,” arĩ wererã wañorã surara opũre.

32 Erã eroparĩcũ peegũ opũpũ ãgũ surarare, erã dorerã sãre gameneo, erã mera Pablöre wejẽdiarã pohrogue omagã ejañorã. Surara erã ejaçũ ãarã Pablöre panirã pa duhuñorã.

33 Eropigũ surara opũ Pablo pohrogue eja, ãgũre ñeha, peda comeda mera diridorepũ. Erã dirituhajacũ ãha, opũ Pablöre serẽpipũ masare:

—¿Nihino áhriri ihĩ? ¿Ñeheno dipuwaja ĩgure eropa iiri mũa? arĩ serẽpirũa ĩgũ erãre.

³⁴ ĩgũ eropa serẽpicũ peerã masarũa “Ōpa iiami ĩgũ,” arĩ, gajirã sã gajiropa arĩ, gaguinigui wereñorã surara opũre. Erã eropa gaguiniguicũ surara opũa ðaro peebiripũa. Eropigũa ĩgũ surara ya wihigue Pablore aĩgãdorepũa.

³⁵ Iri wihigue eja, Pablo mũriariñere ĩgũ mũriacũ masarũa ĩgure padiarã cãhmotañorã. Erã eropa iicũ surararũa ĩgure aĩcoã mũria wañorã.

³⁶ Masa bajarã erãre nũrũsia, gaguinigui nũrũsiañorã.

—Īgure wejẽcãque, arĩ gaguiniguĩñorã erã Pablore.

Pablo “Ne masare ñero iibea yũhũ,” arĩ werepũa

³⁷ Eropii Pablore iri wihigue erã peresu iiboro core, Pablorũa opũre serẽpirũa.

—Yũhũ mũa mera weretamudiaca, arĩ serẽpirũa Pablo.

—¿Mũhũ griego masa yare wereniguiri?

³⁸ ¿Sohõ árĩdigũa, Egipto majagũa árĩbeari mũhũ? ĩgũa masare ĩgũ oparãre cóãdoregũa, cuatro mil masa gamewejẽrãpũre masa marirogue aĩgãarũa. ¿Īgũa árĩbeari mũhũ? arĩpũa opũa Pablore.

³⁹ ĩgũa eroparĩcũ peegũa Pablo yũhripũa.

—Īgũa árĩbeaa yũhũ. Judio masũ áhrraa. Tarso Cilicia yeba árĩri maca masa dehyoabũa yũhũ. Bu árĩri maca majagũa árĩbeaa yũhũ. Yũhũ oã masa mera wereniguidiaa, arĩpũa Pablo ĩgure.

40 Ìgũ eroparĩcũ peegu opũpũ werenigu-idorepũ masa mera. Eropigu Pablo m̃ariariñegue nigui, ìgũ mojotori mera “Ejarimaricãque,” arĩpũ masare. Ìgũ eropa iicũ ìarã, ejarimaripehrea wañorã. Erã ejarimaripehrecũ ìha, Pablo judio masa ya mera werepũ erãre.

22

1 Yũ acawererã, yũ iirare weregura mũare. Yũhũ werecũ peeque mũa, arĩpũ Pablo.

2 Ìgũ eroparĩcũ Pablo judio masa ya mera ìgũ wereniguicũ peerã masa ejarimariro dujañorã. Eropigu Pablo erãre werepũ:

3 —Yũhũ judio masũ ta ãhraa. Tarso waĩcũri maca, Cilicia yeba árĩri maca masa dehyoabũ yũhũ. Eropigu i maca ta Jerusalén ta masabũ yũhũ. Eropigu yũre Gamalie waĩcũgu buhemũrimi yũre. Eropigu yũhũ mari ñecu sũmarã mũra dorerire õaro buhebũ. Dohpa-guere Goãmũre mũa umupeoro dopa ta yũ sã umupeoniguia.

4 Eropigu Jesure umupeorãre ñero iimũricarabũ yũhũ. Yujurãyeri erãre wejẽcãmũricarabũ yũhũ. Ñmare, nome sãre ñeha, peresu iimũribũ yũhũ.

5 Pahia opũ, mũrã mera yũ eropa arĩri “Di-aye ta ãhraa,” arĩ weremasima mũre. Erã gojaripũrire Jesu yarãre ñeadoreburipũrire yũre gojabasama. Mari acawererãre Damasco majarãre iripũre ìhmubu iiribũ Jesu yarãre ñeabu. Erãre ñeha, aĩgãri peresu iibu iiribũ.

Jerusaléngue erāre aīgādiaribū erāre dipuwaja moabu, arīpū Pablo.

Pablo Jesu yagū īgū warare wererū

⁶ Eropa arītuhaja ōpa werenemopū:

—Jesu yarāre ñeari masū wadigū árīqueregū goeri boje árīcū, Damascogue yū ejaboro pohro gohra árīcū amarogue goesiri medijubū yūre.

⁷ Ero eropa wacū yebague mehmerejagarabū yūhū. Yū mehmerejara pūhrū wereniguigū carimi yūre. “Saulo, ¿duhpiḡū yūre ñero iiri mūhū?” arīḡū carimi yūre.

⁸ “Opū, ¿nihino āhriri mūhū?” arī serēpibū yūhū. “Yūhū Jesu Nazare majagū, mū ñero iigū ta āhraa yūhū,” arī yūhrimi īgū yūre.

⁹ Yū eropa wacū yū mera majarā boyorore ĩama. Eropirā yū mera īgū wereniguicū peebir-ima erā.

¹⁰ “Opū, ¿dohpa iigūcuri yūhū?” arī serēpibū Jesure. “Wahgānūgajaque. Damascogue waque. Ero mūhū wacū, mūre árīpehreri yū iidore-burire gajigū wereḡucumi mūre,” arīmi īgū yūre.

¹¹ Būrigā ero cuimijuro wacū yū cuiri boboa wacarabū yūhū. Eropirā yū mera majarā yū mojtore ñeha, Damascogue tūā wahgāma yūre.

¹² “Ero Ananía waīcūḡū, Goāmūre umupeogū, marire Goāmū dorerire iipehogū árīmi. Ero majarā judio masa árīpehrerā erā umupeogū árīmi.

¹³ Eropigū īgū yū pohro eranūgara yūre weremi. “Acaweregū Saulo, ĩaque dipaturi

daja,” arĩmi ĩgu. ĩgu eropa arĩra puhrũ dipaturi ĩabu yũhu daja. Eropigu ĩgure ĩabu yũhu.

14 Yũ eropa ĩacũ ĩgu Ananía yũre weremi. “Mari Pagũ ĩgu gamerire õaro masibure iri-bojegue beyetuhapũ mũre. Eropigu ‘Yũ magũ õagũre ĩha peegũcumi,’ arĩ weremũhtarũ mũre mari Pagũ iri-bojegue mũ arĩboro core. ĩgu āhrimi mari ñecũ sumará mũra erā umupeodi.

15 Eropigu mũ ĩarare mũ peerare weregũca arĩpehreräre.

16 Eropirã dohpaguere yoari boje arĩbiricãrã. Wahgãnũgajaque. Eropigu waĩyedigu arĩque. Jesure mũ serẽcũ mũ ñerire cóãgũcumi,” arĩmi ĩgu yũre, arĩrũ Pablo.

Pablo judio masa arĩbiräre ĩgu buherare werepũ

17 ĩgu eropa arĩtuhaja Pablo masare weren-emporũ:

—Eropa iituhaja yũhu Jerusalẽngue dujari, Goãmũ wihigue Goãmũre serẽgu ejabũ.

18 Yũhu ero arĩcũ yũ Opũ Jesu yũre dehyoami. Eropa dehyoagu yũre weremi. “Jerusalén majarã yahare mũ werecũ peediabeama. Eropigu duru gajipũgue waque,” arĩmi yũ Opũ Jesu yũre.

19 ĩgu eroparĩcũ peegu werebũ ĩgure: “Opũ, mũ yaräre judio masa buheri wiri arĩräre yũ ñeha para sãre, peresugue eräre iimũrirare masima Jerusalén majarã.

20 Eropigu mũ yare weregure Estebanpũre erā wejẽcũ ĩagu õaro iirã wejẽma, arĩribũ. ĩgure erā wejẽcũ erā ya suhrire opabasabũ yũhu. Iri

sãre masima i maca majarã,” arĩ werebũ yũhũ Jesure.

²¹ Yũ eroparĩcũ peegũ yũ Opũ yũre weremi: “Yoarogue judio masa árĩbirãre buhebure obeogũra mũre. Eropigũ waque mũhũ,” arĩmi yũre yũ Opũ, arĩpũ Pablo masare.

Surara opũ Pablo mera weretamupũ

²² Īgũ weremũhtara dihtare ðaro peeriñorã masa. Eropa peequererã judio masa árĩbirã pohro Jesu Pablora ĩgũ obeoburire ĩgũ werecũ peerã erã gua gaguiniguinũgañorã daja.

—Ihĩ dohpague tamerare sĩricuraporo, arĩ gaguiniguinũorã erã.

²³ Eropirã erã gaguiniginemo, guari mera erã suhrire wejẽsiribeo, nicu mera deañorã.

²⁴ Erã eropa iicũ ĩha surara opũ surara ya wihigue Pablora añajadorepũ ĩgũ surarare. Eropigũ surara opũ “¿Duhpirã Pablo mera gua eropa siari gaguiniguirã iiri masa?” arĩ serẽpidiaripũ. Pablora irire serẽpibu, yuradari mera tãradoreripũ ĩgũre.

²⁵ Īgũ tãradorequerecũ ĩgũre erã dirira pũhrũ, ĩgũ pohro árĩgũre surarare werepũ Pablo.

—Yũhũ Roma majagũ ãhraa. Eropirã “Ñero iigũ ãhrimi,” yũre arĩmasibea mũa. Eropirã yuradari mera tãramasibea mũa, arĩpũ Pablo ĩgũre.

²⁶ Īgũ eroparĩcũ surara ĩgũ opũre weregũ wapũ.

—Ihĩ Roma majagũ ãhrimi. Eropigũ ðaro iique ĩre, arĩ werepũ ĩgũ ĩgũ opũre.

27 Īḡu eropa arīra pūhrū surara opūpū Pablōre serēpigū warū.

—¿Diaye ta mūhū Roma majagū āhriri? Werequisite yūre irire, arīpū ĩḡu.

—Īḡu ta āhraa yūhū, arī yūhripū Pablo.

28 Īḡu eroparīcū peegū opūpū ĩḡure wererū.

—Yūhū Roma majagū árīdiagū niyeru wūaro wajayebū, arīpū ĩḡu.

—Yūhū Roma maja macague masa dehyoabū. Eropigū Roma majagū āhraa, arīpū Pablo.

29 Īḡu eroparīcū peerā ĩḡure tārabonirā waha wañorā. Eropigū Pablo Roma majagū ĩḡu árīcū masigū, ĩḡure comedari mera erā dirirare guñagū, gūi árīpū surara opū.

Pablo judio masa opūre wererū

30 Eropigū surara opū judio masa Pablōre erā weresārare ōaro masidiapū. Eropa masidiagū gajinūgue comedarire ĩḡure ĩḡu pādorera pūhrū pahia oparāre, judio masa erā mūrā mera gameneredorepū surara opū. Īḡu eropa gameneredorera pūhrū ĩḡu erogue Pablōre aīgā, erā core duhudobopū ĩḡure.

23

1 Eropigū Pablo judio masa mūrā oparāre ĩabocatīunūgaja wererū:

—Acawererā, Goāmū ĩḡu ĩaro ūmūri nūcū ōaro iinigūicābū yūhū, arīpū Pablo.

2 Īḡu eroparīcū peegū árīpehrerā pahia weca árīḡu opū Ananíapū Pablo disirore padorepū.

3 Īḡu pohro niguirāre padorepū. ĩḡure erā para pūhrū Pablo Ananíare turipū.

—Masa erã ĩaro dihtare õaro iigu ãhraa mũhu. “Goãmu dorerire tarinũgagu iiaa,” yure arĩqueregu ta yure padorea mũhu. Eropa padoregu mũpu dorerire tarinũgagu iica, arĩpu Pablo ĩgure.

⁴ ĩgu eroparĩcũ peerã Pablo pohro niguirã õpa arĩñorã ĩgure:

—Goãmu ĩgu beyedigu pahia opure ñero wereniguibiricãque mũhu, arĩñorã erã Pablöre.

⁵ Erã eroparĩcũ peegu Pablo arĩnemopu:

—Acawererã, ĩgu, ĩgu pahia weca opu ĩgu árĩrire masibirabu yũhu. Eropigu eroparĩmaacãbu yũhu. Goãmu ya erã gojarapũ õpa arĩ werea ĩgure: “Mũa maca majarã opure ñero arĩ wereniguibiricãque,” arĩ gojara ãhraa, arĩpu Pablo erãre.

⁶ Eropirã ero pe curu majarã árĩñorã. Yuju curu saduceo masa árĩñorã. Gaji curupu fariseo masa árĩñorã. Pe curu erã árĩcũ masigu, Pablo erãre busuro mera werepu:

—Acawererã, yũhu fariseo masu ãhraa. Fariseo masu magu ta ãhraa yu sã. “Sĩrinirã masa mũriarãcoma,” yu arĩ wereri dipuwaja yure ñero iidiaa mũa, arĩpu Pablo.

⁷ ĩgu eroparĩcũ peerã fariseo masa, saduceo masa erã basi gameturiñorã. Eropirã erã basi pe curu dũca wariñorã.

⁸ Saduceo masa õpa arĩrã árĩñorã: “Sĩrinirã masa mũriasome. Espĩritua anyua sã ne marima,” arĩrã árĩñorã. Eropirã fariseo masapu erã arĩro dopa arĩbiriñorã. Eropirã Pablo

“Sĩrinirã masa mũriarãcoma,” ĩgu arĩcũ erã erã basi gameturiñorã.

⁹ Eropa gameturirã, buriã gaguiniguĩnorã. Eropirã fariseo masa mera majarã judio masa buherã wahgãñugaja, tuhri, wereñorã:

—Ihĩ Pablo ñero iibirami. Eropigu Espĩritu, o anyu diaye ĩgu mera wereniguigu arĩbocumi. Eropirã ĩgure dipuwaja moarã Goãmure ĩhaturirã arĩboca mari. Eropiibiricãque, arĩñorã erã.

¹⁰ Erã eropa arĩra pũhrũ erã arĩpehrerã game-turi, buriã guañorã. Erã eropa buriã guacũ ĩha gũisãpũ Pablöre surara opũpũ. “Pablöre patasiricãrãcoma,” arĩgu ĩgu ya wihigue aĩgãridoregu ĩgu masa watope ĩgu surarare obeopũ.

¹¹ Gaji ñami Jesu mari Opũ Pablo pohro de-hyoa, werepũ ĩgure:

—Gũibiricãque. Dohpague òre Jerusaléngue yaha buherire wereabũ mũhũ. Eropigu Romague sãre òpa ta iigu waque, arĩpũ mari Opũ Pablöre.

Judio masa Pablöre wejẽdiariñorã

¹² Gajinũ ñamiñarigã arĩcũ judio masa bajamerã gamenereñorã.

—Òpa iirã, arĩñorã. Pablöre wejẽcãrã. Eropirã ĩgure mari wejẽboro core ihribiricãrã. Babiricãrã. ĩgure wejẽbirã oa mera sĩrirã. ĩgure mari wejẽbiricũ Goãmũ marire wejẽporo, arĩñorã erã.

¹³ Erã eropa arĩrã cuarenta weca ñari judio masa arĩñorã.

14 Erã eropa arĩ wereniguira pũhrũ erã pahia oparãre, mũrã sãre wererã wañorã:

—Pablore gua wejẽboro core barire babeaa gua.

15 Eropirã mũa, mari mũrã mera õpa arĩ sihubeoque. “Pablore dipaturi serẽpidiaca,” arĩbeoque surara opũre. Mũa eropa arĩra pũhrũ surara opũre aĩgãridoreque Pablore. Eropirã Pablo ĩgu õre ĩgu eraboro pohro gohra árĩcũ ĩgũre wejẽrãca gua, arĩñorã erã pahia oparãre.

16 Eropigũ Pablo tĩgo magũ erã eropa arĩ wereniguicũ peepũ. Erã eroparĩcũ peegũ waha, surara ya wihigue Pablore weregũ ñajapũ.

17 ĩgu eropa werera pũhrũ Pablopũ yujugũ surarare sihubeo, werepũ ĩgũre.

—Ihĩ mamũre mũ opũ pohrogue aĩgãque. Ihĩ mũ opũre werediagũ ĩĩmi, arĩpũ Pablo.

18 ĩgu eroparĩcũ peegũ surarapũ Pablo tĩgo magũre ĩgu opũ pohrogue aĩ eja, werepũ.

—Peresugue árĩgu Pablopũ yũre sihubeo, ĩre mamũre mũ pohrogue aĩgãridoreami. Ihĩ mũre weregũ arigũ ĩiami, arĩpũ surara ĩgu opũre.

19 ĩgu eroparĩcũ peegũ opũpũ mamũre ĩgu mojtore ñeha tuãgã, masa marirogue ĩgũre serẽpi ĩapũ.

—¿Dohpa arĩbu ĩiari mũhũ yũre? arĩpũ ĩgu Pablo tĩgo magũre.

20 ĩgu eropa serẽpicũ peegũ õpa arĩ werepũ.

—Judio masa yujuro mera, “Õpa iirã,” arĩ, wereniguiama. Ñamigãre judio masa oparã pohrogue mũre Pablore aĩgãdorerãcoma.

“Mũrã dipaturi Pablore serēpidiama,” arĩ gũyarãcoma.

²¹ Eropirã cuarenta weca ñari masa ĩgũre wejēdiarã mague duhrinijarã corerãcoma. Erã ĩgũre wejēboro core barire basome. Eropirã ihrisome. “Īgũre mari wejēbiricũ, Goãmũ marire wejēporo,” arãma erã erã basi. Eropirã dohpaguere mũre Pablore aĩgãridorerã erãpũ duhri coretujajama Pablore wejēmorã. Eropigũ erã wererã eracũ erãre yũhribita mũhũ, arĩ wererũ mamũ surara opũre.

²² Īgũ eroparĩcũ peegũ surara opũ õpa arĩpũ:

—Yũre mũ wererare gajirãre werebiricãque, arĩ wererũ mamũre. Eropa arĩtujaja mamũre “Wahanisa,” arĩpũ.

Pablore opũ Feli waĩcũgũ pohrogue obeopũ

²³ Eropigũ surara opũ perã ĩgũ surarare si-hugã, erãre dorepũ:

—Doscientos surarare, setenta cabayu peyarãre, doscientos ñoseri mijiri oparãre Cesareague wamorãre erã yare amudorerã waque. Eropirã dohpagã ñami nueve árĩcũ mũa waborore coreque.

²⁴ Eropirã Pablore cabayuare ĩgũ peyamorãre amubasaque. Opũ Feli pohrogue, Cesareague õaro sorã waque ĩgũre, arĩpũ surara opũ.

²⁵ Eropa arĩtujaja papera gojapũ. Õpa arĩ gojapũ ĩgũ:

²⁶ “Yũhũ Claudio Lisia mũre turagũ opũ Felire õadorea.

27 Judio masa ïre ñeha, wejêrama. Eropigu ïgu Roma majagu ïgu árĩcũ masigu, yu surara mera ïgure itamugu ejabu.

28 Eropigu ïgure erã weresãrare masidiagu judio masa oparã pohro aïgãbu ïgure.

29 Eropigu ïgu judio masa ya doreri dihtare ïgu tarinugacũ, mari ya dorerire ïgu tarinugabiricũ ïagu, ïgure peresugue apidiabirabu. Ñehe dipuwaja sĩriro mara ïgure.

30 Eropigu judio masa ïgure wejêdiarã, erã duhri corecũ ïagu gajigu wereami yure. ïgu eropa werera pũhrũ Pablöre dohpaguere mu pohro obeogu iiaa. Eropigu ïgure weresãnirãre ïgu ñero iirare mure weredoretuhajabu yuhũ,” arĩ gojarũ surara opu.

31 Eropirã surara erã opu ïgu dorediro dopa ta iĩñorã. Iri ñamire Antípatri waĩcũri macague Pablöre aĩ ejañorã.

32 Gajinũ gajirã surara cabayua weca peyabirã iri maca ta dujariñorã erã ya macague. Gajirã surara cabayua peyarã dihta ïgure aĩ tarigãñorã.

33 Pũ Cesareague aĩ ejañorã Pablöre. Eropirã surara opu ïgu obeorapũre opu Felire wiañorã. Eropirã Pablöre aĩ ejañorã opu pohrogue.

34 Erã eropa wiara pũhrũ iripũre ïgu ïara pũhrũ ïgu gajirãre serẽpi ïaru:

—¿Di yeba majagu ãhriri ihĩ Pablo? arĩ serẽpi ïaru.

—Cilicia yeba majagu ãhrimi, arĩ wereñorã ïgure.

35 Erãre serẽpituhaia, Feli Pablöre werepu:

—Mure weresānirā òre erā eracū mu wererire peegura, arīpū Feli Pablöre.

Īgu eropa arīra pūhrū Herode ya wihigue ĩgure arīpū. Eropīgu ĩgu umare ĩgure core-dorepū ĩgu opū.

24

Pablo “Ñero iibirabū,” arī wererū Felire gajirā weresāra pūhrū

¹ Cinco nūri pūhrū Ananía pahia opū, judio masa erā murā, dorerire weremehregū Tértulo waĩcugū mera Cesareague ejañorā. Eropirā erā Pablöre weresādiarā, opū Feli pohrogue ejañorā.

² Eropīgu Pablöre erā gamenererogue erā aĩ ejara pūhrū Tértulo ĩgure weresānugapū. Eropa weresānugagū òpa arīpū Felire:

—Mūhū òaro masīgū, gua opū mūhū òaro dorecū gua i yeba majarā òaro árīcāa gua gamequeāro mariro. Mu doreri mera òaripure gohrotoro iiaa i yeba.

³ Eropirā gua òaro árīcārā mucubiria. Eropirā mū mera òaro mucubiria.

⁴ Dohpague merogā mure garibogura yūhū. Merogā mū mera weretamudiaca. Guare peenique dohpa.

⁵ Ihī guare garibotariami. Árīpehreri yebari majarāgue judio masare erā gua gaguiniguicū iimi ihī. Eropīgu masa erā basi gameturicū iimi ihī. “Oparāre cóarā,” arīrā mera majagū āhrimi ihī. Eropīgu nazareno waĩcūri curu opū āhrimi.

⁶ Eropīgu Goāmū wihire ñero ĩgu iidiacū ĩarā gua ñeabū ĩre. Gua ñeara pūhrū gua ya

dorerire ĩġu tarinugagu árĩcũ ĩġure dipuwaja moadiarabu ġua.

⁷ Eropa moadiaquerecũ surara opurpu Lisia waĩcũġu ĩġure ġuare turaro mera emacãmi.

⁸ Pũhrũ ĩġure weresãnrãre mũ pohrogue wadoreami Lisia. ĩġu eroparĩcũ peerã ahrabu ġua. Mũ tamera ĩre serẽpigũ, árĩpehrerire ĩġu ya dipuwajare masigũca mũhũ, arĩpu Tértulo Felire.

⁹ ĩġu eropa arĩra pũhrũ ġajirã judio masa Tértulo ĩġu arĩdiro dopa ta “Diaye ta ãhraa,” arĩñorã erã sã.

¹⁰ Erã eropa arĩ weresãra pũhrũ opu Feli Pablöre weredorepu. Őpa arĩ werepu Pablo:

—Baja bojori i yeba majarãre mũ dorerare masia yũhũ. Eropigũ yũ iirare mũre wereġũ mucubiria.

¹¹ Doce nãri ta wahaa Jerusaléngue Goãmũre yũ umupeora pũhrũ. Mũhũ i diaye árĩcũ masidiagu ġajirãre serẽpi ĩaque.

¹² Judio masa yũre Goãmũ wihiguere boca erã ñeacũ masare arĩ ġaguinigũ iibirabu. Eropigũ “Oparãre cóãque,” arĩġũ iibirabu. Eropigũ judio masa buheri wirire, erã ya maca sãre ne ñero iibirimurabu.

¹³ Eropirã yũre weresãnrãpu erã weresãrare “Őpa iiami ihĩ,” arĩ weremasibeamã mũre.

¹⁴ Dohpague yũ iirare wereġura mũre. Matague ta ġua ñecu sumarã erã umupeodiro dopa ta Goãmũre umupeoa yũ sã. Eropigũ Goãmũ yare iiaa Jesu ya õari buheri iri arĩro dopa ta. Oã “Jesu ya ġuyabirari ãhraa,” arĩ wereniguima oã judio masa. Eropigũ Goãmũ

doreri, Moiseguere ĩgu apirare iri sãre umupeoa yũhũ. Eropigu Goãmu ya weremãhtanirã erã gojara sãre umupeoa yũhũ.

15 Oã gajirã judio masa mera ta “Goãmu árĩpehrerã masare sĩrinirãre õarã, ñerã mera erã masa mũriacũ iigucumi,” erã arĩ pepiro dopa ta yũ sã eropa ta arĩ pepia.

16 Eropigu dipuwaja mara yũhũ. Goãmu irire masimi. Eropirã masa sã irire masima. Eropigu diaye ta werea yũhũ mũre.

17 “Gaji bojorire gajipũgue yũhũ curigu árĩgu dujarabu Jerusalengue. Yũ acawererã Jerusalén majarã mojomorocũrãre niyeru ogu arigu iiaabu.

18 Dujara, Goãmũre umupeobu ĩgu ya wihigue ejarabu. Eropigu Goãmu ĩgu coedorero dopa yũ basi iira pũhrũ waibũgũre odjarabu Goãmũre umupeobu. Erogu yũ árĩcũ oã judio masa yũre bocama. Erã bocacũ gajirã yũ mera majarã marama. Gua gaguiniguirã marama.

19 Eropirã gajirã judio masa Asia yeba majarã ero ãhrama. Erã yũ ñero iicũ ñanirã árĩrã weresãrã ariporo õguere.

20 Oã õgue árĩrãpũ judio masa oparã gamenererogue yũ árĩcũ ñanirã yũ erogue ñero iirare masirã, erã sã weresãporo.

21 Gaji tamerare yũre erã weresãmasima: Erã mera árĩgu õpa arĩ bũrigã gaguiniguibũ yũhũ: “‘Sĩrinirã masa mũriarãcoma,’ yũ arĩra waja dipuwaja moaa mũa,” arĩbũ erãre, arĩ werepũ Pablo Felire “Ñero iibiribũ,” arĩgu.

22 ĩgu eropa arĩ werera pũhrũ Feli õpa arĩ werepũ Pablõre:

—Dohpaguere iripêta ãhraa. Surara opu Lisia ïgu erara pũru mure yu iiborore masiguca yũu, arĩpu Feli Pablore. Filipu Jesu yarã erã iirare ðaro masipehogu arĩpu.

²³ Eropa arĩtuhaja, Pablore coregure surarare Feli ðaro ïhadibudorepu peresugue arĩgu duhriri arĩgu. Eropa ïhadibudorequeregu ðaro iidorepu ïgure. Eropigu merogã opu ïgu curiborore. Pablo mera majarãre ïgure peresugue arĩgure itamudoregu eropa dorepu Feli.

²⁴ Bajamenuri pũru Feli ïgu marapo Drusila waĩcũgo mera ahri, Pablore sihuñorã daja. Feli marapopu judio maso arĩpo. Pablore erã sihura pũru, Jesucristore ïgu umupeorire Pablopũ werepu erãre.

²⁵ Eropa weregu, ðarire, ðaro guñamasirire, ñerire gamebiririre, pehrerinũ arĩcũ masare Goãmũ dipuwaja moaborore werepu Pablo. ïgu eropa arĩ werecũ peegu Feli gũigu, Pablore werepu:

—Dohpaguere waque. Pũru yure mohmeri maricũ sihugura daja, arĩpu Pablore.

²⁶ Eropa arĩgu, Pablo ïgure niyeru ocũ gameripu Feli. Eropigu ïgu niyerure gamegu, bajasuburi Pablore sihu, ïgu mera wereniguimuripu Feli. Niyerure ïgu wajayecũ ta Pablore wiubonũmi gajisubu arĩgu.

²⁷ Pe bojori pũru Porcio Festo waĩcũgu Felire gohrotogu arĩpu. Eropigu Filipu opu arĩgu judio masare mucubiricũ iidipũ. Eropigu ïgu Palore peresu arĩdorepu dohpa.

25

Festore Pablo ĩgu iirare werepũ

¹ Eropii Festo iri yebague ʘhrenũ ĩgu opũ ñajara pũhrũ, Cesareague árĩdigũ waha, Jerusaléngue ejapũ.

² Ero ĩgu ejacũ ĩha pahia oparã, judio masa oparã mera Pablöre erã weresãrare wereñorã Festore.

³ Pablo ĩgu mague wacũ iri mague ĩgũre cohre, wejēdiariñorã ĩgũre erã. Jerusalén mague aricũ gameriñorã ĩgũre wejēmorã. Eropirã erã õpa Festore ʘpũtũ serēriñorã:

—Pablöre õguere Jerusaléngue obeoque, arĩ serēriñorã erã Festore Pablöre wejēdiarã.

⁴ Erã eroparĩcũ peegu, Festo werepũ erãre:

—Dohpaguere Pablo Cesareague peresu āhrimi. Dohpaguere yũhũ erogue wabu iiaa.

⁵ Pablo ĩgu ñero iigu árĩcũ, mua oparã Cesareague yũ mera waha, ĩgũre weresãque, arĩpũ Festo.

⁶ Eropigũ Festo ocho o diez nũri erã mera ĩgu árĩra pũhrũ Cesareague dujaa wapũ. Gajinũ ĩgu dipuwaja moadoreri wihi doagu, Pablöre aĩgãridorepũ.

⁷ Eropirã Pablo Festo pohrogue ĩgu eracũ, judio masa Jerusaléngue arinirãpũ Pablo pohro nigui, ĩgũre bũrigã weresãnũgañorã. Eropa weresãquererã “Ihĩ ĩgu ñero iicũ ĩabũ,” arĩ weresãmasibiriñorã.

⁸ Erã eropa arĩ weresãra pũhrũ Pablo ĩgu iirare werepũ:

—Judio masa erã dorerire, Goãmũ wihi maja dorerire, Roma opũ ãgũ dorerire ne tarinũgabirabũ, arĩpũ Pablo.

⁹ Festopũ judio masare mucubiricũ iidiagũ, Pablore serẽpipũ.

—¿Jerusalẽngue wadiari mũhũ? Mũ iirare yũre erogue weregũca mũhũ, arĩpũ Festo Pablore.

¹⁰ ãgũ eroparĩcũ Pablo yũhripũ:

—Arĩpehrerã weca opũ ãgũ ya wihi dipuwaja moadoreri wihi ãhraa dohpaguere. I wihino ta ohõ sã ãhraa. Eropigũ yũ iirare ohõ ta amu purumujuque. Judio masare yũ ñero iibirirare õaro masia mũhũ.

¹¹ Ñerire iigũ dorerire tarinũgagũ árĩgũ “Yũre wejẽbiricãque,” arĩbiriboaya. Eropigũ oã weresãripũ gũyari iri árĩcũ yũre weresãnirãre yũre omasibea mũhũ. Yũ iirare árĩpehrerã weca opũre Césare weregũ wadiaca yũhũ, arĩpũ Pablo.

¹² ãgũ eroparĩcũ peegũ Festopũ õaro masi wererãre serẽpituhaja, werepũ Pablore.

—Mũhũ árĩpehrerã weca opũre mũ iirare mũ werediacũ, ãgũ pohrogue Romague obeorãra mũre, arĩpũ Festo Pablore.

Pablo opũ Agripare ãgũ iirare werepũ

¹³ Festo opũ ñajara pũhrũgue opũ Agripa, Berenice waĩcũgo mera Cesareague Festore ãarã ejañorã.

—¿Ne, erarari mũ sã? arĩñorã erã Festore bocatĩri serẽrã.

¹⁴ Ero bajamenũrigã erã árĩra pũhrũ Festo werepũ Agripare Pablore erã iirare.

—Ōre Feli ĩġu peresu iidigü āhrimi.

15 Eropirā Jerusaléngue yu wacū judio masa erā pahia oparā, erā mūrā mera ĩre weresāma. “Īġu ya dipuwajare wejēque ĩġure,” arī serēama erā yare.

16 Erā eroparīcū peegu yu ōpa wereabu: “Gua Roma majarāpu peresu erā iinirāre masare eropa ta ocābirimūribu. Eropigu ĩġure osome mūare. Gua ñeadigūre ĩġure weresānirā guare wereniguiboro core ĩġure dipuwaja moamasibeaa gua. Īġu basi sā ĩġu iirare ĩġu werenibiricū ĩġure dipuwaja moamasibeaa gua,” arābu erāre.

17 Eropigu ōre erā weresārā eracū ĩaġu yoari boje iibirabu yuhū. Eropigu ġajinure masa dipuwaja moadoreri wihi yu doagu, erā weresādigūre sihubeoabu.

18 Eropirā iri wihi ĩġu eracū ĩarā ĩġure ĩhaturirā wahġānūġajama. Erā eropa wahġānūġajacū ĩaġu ñetariaro arī weresārācoma arī pepirabu yuhū erāre. ĩġure weresādiaquererā weresāmasibirama erā.

19 Eropirā ĩre Goāmū yare ĩġu werera dipuwaja judio masa ĩġure ĩhaturiyama. “Jesu waīcūġu ĩġu sīridigū masa mūriadi árīmi,” arī ĩġu werera waja weresāma ĩre. I dihtare weresāma.

20 Ire masibigu ĩġure ōaro serēpi ĩabu. “¿Jerusaléngue wadiacuri yu mera? Eroġue wereque mū iirare yare,” arīrabu ĩġure.

21 Yu eroparīcū peegu ĩġupu wadiabirami. “Yu iirare árīpehrerā weca opure werediaca,” arāmi ĩġu yare. ĩġu eropa arīra pūhrū ohō ta ĩġure

coredoreabu árīpehrerã weca opu pohro ĩgure yu obeoboro core, arīpu Festo Agripare.

²² —Yu basi peediaca ĩgure, arīpu Agripa Festore.

—Ñamigã ta ĩgure peeguca mũhu, arī yuhripu Festo.

²³ Eropirã gajinu árĩcũ Agripa, Berenice mera masa dipuwaja moadoreri wihigue eja, “Oparã ãhraa gua,” arĩrã gũhyadiaro ii ĩhmuñorã erã, surara oparã, iri maca majarã oparã mera. Eropa ii ñajarã iri wihiguere ñajañorã. Erã ñajajara pũhrũ Pablora sihubeopu Festo.

²⁴ Eropigu Festo õpa werepu:

—Opu Agripa, mua árīpehrerã i wihire gamenererã peeque. Õre ihĩ bajarã judio masa erã weresãgu ãhrimi. Jerusalengue Cesareague sãre erã ĩgure weresãma. “Īgure wejẽque,” eropa arĩniguicãrã iima erã.

²⁵ Erã eropa arĩquerecũ ta õpa arĩ pepia yũhu. Ihĩ ne ñero iidigu árĩbeamĩ. ¿Ñehe dipuwaja mari wejẽbocuri ĩgure? Eropigu árīpehrerã weca opu César Augustore ĩgu iirare ĩgu werediacy árīpehrerã opu pohrogue obeogura ĩre.

²⁶⁻²⁷ Eropigu ihĩ ĩgu iirare masibirinica yũhu dohpa. Eropa masibirinigu mari opu were gojamasibirica. Eropigu mũare ĩgu werecũ peedoregu iiaa dohpaguere. Opu Agripa, dohpague tamerare ihĩ ãhrimi mũ serẽpi ĩabu. Mũ serẽpi ĩatuhaja mari masira pũhrũ ĩre erã weresãrãre õaro were gojagura. Ihĩ ĩgu ñero iirare yu masibiqueregu ta opu pohrogue ĩgure yu obeocũ õabeaa. Eropigu dohpaguere erã

weresārare ðaro masidiagu iiaa, arīpū Festo erāre.

26

Pablo Agripare īgu iirare werepū

¹ Īgu eropa arīra pūhrū Agripa Pablōre arīpū:
—Mū basi ta wereque, arīpū īgu Pablōre. Īgu eropa arīra pūhrū Pablōpū, “Ejarimaricāque,” arīgu īgu mojotorire aī wahgūbeo, īgu iirare werenūgarū:

² —Opū Agripa, yūre judio masa erā weresārare, yū iirare mūre weregu, dohpaguere ðaro sīporācūa.

³ Gūa judio masa gūa iiricūrire, gūa buheri sāre mūhū ðaro masicū tamerare mucubiria yūhū. Eropigu mūhū yūre ðaro peeque, arīnūgarū Pablo.

Pablo Jesu yagu īgu árīboro core īgu árīricūrare werepū

⁴ Eropa arītuhajagu ðpa arīnemopū īgu:

—Mamū árīgu yū árīricūrare árīpehrerā judio masa masima. Ūmūri nūcū yū masa dehyoara pūhrū yaha yebaguere, Jerusaléngue sāre yū árīrare masima erā.

⁵ Negohraguere fariseo masū árīribū. Eropigu fariseo masa erā dorerire, erā iirinore yūhū iipehodigu árīcū erā masima. Erā mūre were-diarā, irire weremasima erā.

⁶ I dipuwaja ta yūre weresāmūrima. Gūa ñecu sūmarāre “Sīrinirāre masugūra,” Goāmū īgu arī apirare “Diaye ta āhraa,” yū arīri waja oā yūre weresāmūrima.

7 Yũ acawererã judio masa, árĩpehrerã doce cururi majarã Goãmũ masare ãgũ masuborore mucubiri cohrema. Eropirã Goãmũre umupe-oniguicãma. Eropa corerã árĩrã yũ iiro dopa ta iima erã sã. Opũ Agripa, eropa yujuropa gũa iirã árĩquerecũ ta erãpũ yũhũ ãgũ masuborore ii corerĩ waja yũre weresãmũrima judio masa.

8 ¿Duhpirã sĩrinirãre Goãmũ ãgũ masuborore peediabeari mũa judio masa? arĩ wererũ Pablo.

Pablo Jesu yarãre ãgũ ñero iirare wererũ

9 Eroparĩtuhaja õpa werenemopũ:

—Jesu Nazare majagũre ãnibigũ dohpa ñeri dihtare iidiaribũ yũhũ ãgũ yarãre.

10 Eropigũ Jerusalengue eropa iimũrribũ yũhũ. Pahia oparã yũre erã dorera pũhrũ bajarã Jesu yarãre peresu iimũribũ yũhũ. Eropigũ oparã erãre erã wejẽdorecũ, wejẽmũribũ yũ sã.

11 Bajasuburi árĩpehreri judio masa erã buheri wirigue Jesu yarãre ñero iidoremũricarabũ. Eropigũ Jesu yarã Jesure erã cóãcũ iidiaribũ yũhũ. Erã mera burigã guabũ yũhũ. Eropigũ gajĩ macarigue sãre erãre ñero iigũ ejamũricarabũ yũhũ, arĩ wererũ Pablo.

Pablo Jesu yagũ ãgũ warare wererũ

12 Eropa arĩtuhaja õpa werenemopũ:

—Eropigũ Damascogue Jesu yarãre ñero iidiaagũ ejaribũ. Erãre yũhũ ñero iidiacũ ãarã pahia oparã yũre wadorema.

13 Õpa árĩbũ, opũ Agripa: Goeri boje árĩcũ gohra mague yũ wacũ umaro maja goesiriri,

abe ɯmɯ majagu tauro yure yu mera warã sãre gosesiribu.

14 Gɯa árĩpehrerã yebague mehmerejabɯ. Judio masa ya mera yure ĩgu wereniguicũ peebɯ. “Saulo, Saulo, ¿duhpigu mɯhɯ yure ñero iiri? Mɯhɯ yu mera guagu yure yuhribigu, mu basi ñero taria,” arĩmi yure.

15 “Opɯ, ¿nihino àhriri mɯhɯ?” arĩ serẽpibu yurɯ. “Yuhɯ Jesu ta àhraa mu ñero iigu.

16 Wahgãnugajaque mɯhɯ. Yu pohro majagu mure iibu dohpague dehyoa yuhɯ. Dohpagãre mɯhɯ yure ĩarare, pɯhrɯ mure yu ĩhmuburi sãre gajirãre weredorebu apiguca mure.

17 Judio masare, judio masa árĩbirã sãre mure buhedoregu obeogura. Erã pohro mu árĩcũ, mure erã ĩhaturicũ mure itamugura.

18 Yahare erãre masicũ iique mɯhɯ. Eropigu erã ñerire duhucũ iique mɯhɯ. Ōaripure gohrotocũ iique erãre. Watĩre erãre gamebircũ iique mɯhɯ. Eropigu Goãmɯ yapure iicũ iique mɯhɯ erãre. Mɯhɯ eropa iicũ erã yure umupeorãcoma. Erã eropa umupeocũ ĩagu erã ñeri iirare cãdijiguca. Eropirã erã Goãmɯ ĩgu beyenirã mera majarã mera árĩrãcoma. ĩgu oburire opamorã árĩrãcoma erã,” arĩmi Jesu yure, arĩ werepɯ Pablo.

Pablo ĩgu iirare ĩgu mohmerire werepɯ

19 Eroparĩtuhaja õpa werenemopɯ:

—Opɯ Agripa, ɯmaro maja yu peerire tarinugabiribu.

20 Damascogue buhemuhtabɯ. Pɯhrɯ Jerusalén buhebɯ daja. Pɯhrɯ Judea yeba, judio

masa árĩbirã pohrogue sãre masare erã ñero iirare bujaweredore, Goãmũ yare gamedorebũ. “Ōarire mũa iicũ ĩarã mũa ñeri iirare mũa bujawererare gajirã masirãcoma,” arĩgũ, erãre ōarire iidoregũ buhebu.

²¹ Goãmũ ya wihi yũ árĩcũ yũ eropa arĩ wereri waja judio masa yũre ñeha wejẽdiarima.

²² Eropigũ umuri nũcũ Goãmũ ĩgũ itamuro mera eropa buheniguicãa. Eropigũ dohpaguere mũa árĩpehrerãre oparãre bu árĩrã sãre ĩgũ yare weregũ iiaa. ĩribojegue majarã Goãmũ yare weremũhtanirã Moise mera erã wereyudiro dopa ta werea yũ sã. Ōpa arĩ wereyuñorã erã:

²³ “Cristo Goãmũ ĩgũ obeodigupũ ñero tarigũcumi. Eropigũ sĩrigũ masa mariamũhtagũ árĩgũcumi ĩgũ. Eropigũ masare ĩgũ itamuborore judio masare judio masa árĩbirã sãre masicũ iigũcumi,” arĩ wereyu gojamuriñuma iribojegue majarã. Yũ sã erã werediro dopa ta werea, arĩ werepũ Pablo Agripare.

Pablo Agripare Jesu yagũ iidiaripũ

²⁴ ĩgũ eropa arĩ werera pũhrũ Festo ĩgure burigã gaguinigui wereniguiipũ:

—Pablo, mũhũ goroweregũ ãhraa. Mũhũ baja buhegũ goroweregũ wahaa, arĩ gaguiniguiipũ Pablora.

²⁵ ĩgũ eroparĩcũ peegũ ōpa yũhripũ Pablo Festora:

—Opũ, goroweregũ árĩbeaa yũhũ. Yũ wereri diaye ta ãhraa. Eropigũ yũhũ ire guhyadiaro mera arãa.

²⁶ Opu Agripapu i yu wererire ðaro masimi. Eropigu yuhu ïgure güiro mariro werea. I wererire árïpehrerã masa masima. Eropigu árïpehreri ire yu arïrare opu Agripa ïgu masicũ masia yuhu, arïpu Pablo Festore.

—Ïgu eropa arïtuhaja ðpa arïpu Agripare:

²⁷ —Opu Agripa, Goãmu ya weremuhtanirã erã wererare peea muhu. Erã wererire mu peecũ masia yuhu, arïpu Pablo Agripare.

²⁸ —¿Ire yure weregu merogã mu wereri Jesu yagu yu wacũ iidiagu iiri muhu? arïpu Agripa Pablore.

²⁹ Ïgu eroparicũ Pablo yuhripu.

—Merogã wereniguigu o yoari boje wereniguigu mua árïpehrerãre yuhu arïro dopa ta Jesu yarã aricũ gahmea. Irire serëbasaa Goãmure. Eropigu yu iro dopa ta peresugue mua aricũ tamerare gamebeaa yuhu, arïpu Pablo.

³⁰⁻³¹ Ïgu eropa arïra puhru Agripa, Festo, Berenice árïpehrerã gajirã mera wahgãnuga wiria, erã basi wereniguiñorã:

—Ihï ïgu iira waja ne peresu iimasibeeaa mari. ¿Eropirã mari ñeheno dipuwaja ïgure wejëbocuri? arï wereniguiñorã erã erã basi.

³² —Ihï “Árïpehrerã weca opure yu iirare werediaca,” ïgu arïbiricũ mari wiuboaya ïgure peresugue arïgure, arïpu Agripa Festore.

27

Pablo ïgure weresãrare Romague weregu waru

1 Pablöre Italiague árĩpehrerã weca opũ pohrogue dohodiru mera obeorã, ĩgũ mera gajirã peresu árĩrã sãre obeoñorã. Eropirã Julio waĩcũgũre erãre ĩhadibudorerã obeoñorã erã. Julio cien surara opũ árĩpũ. ĩgũ ya curu Augusto yarã surara waĩcũñorã.

2 Ƴũ sã Pablöre wapicũgãbũ. Eropirã Adramitio waĩcũro majaru dohodiru mera ñajabũ gũa. Iriru Asiague waburiduru árĩbũ. Ñajatuhaja, iriru mera wabũ. Aristarco Tesalónica waĩcũri maca majagũ gũa mera wami. Tesalónica Macedonia yeba árĩbũ.

3 Gajinũ gũa Sidóngue ejabũ. Erogue ejagũ Julio Pablöre õaro iimi. Eropigũ Pablöre ĩgũ mera majarã pohrogue ĩagũ wadoremi. Eropigũ Pablo mera majarã ĩgũre ĩgũ gamerire erã ocũ “Õaroca,” arĩmi Julio.

4 Dohodirugue ñajarã daja gũa taribujacũ burigã miruñe gũare gajipũgue weãtaribujubũ. Eropirã Chipre waĩcũri nũgũro cãhmotarogue diayerũ wabũ gũa.

5 Pũ Ciliciare taria, Panfilia sãre taria, Mira waĩcũri macague Licia yebague árĩri macague tuhajabũ gũa.

6 Erogue ejarã, Alejandriague aridirure, Italiague wadirure dohodirure bocabũ. Eropigũ surara opũ gũare irirugue wadoremi.

7 Bajanũri dabero waro waha, “Ñe yeboca,” arĩ, waha, Gnido waĩcũri maca diaye ejabũ gũa. Erogue eja taria, miruñe burigã weã, gũa wadiadirore gũare weãbeobiribũ. Eropirã gũa copũgue majipa wabũ. Eropirã Creta

waĩcũri nũgũro iri nũgũro cãhmotari masepũ gũa taribuja waha, Salmón waĩcũri ñorore tariabũ gũa.

⁸ Erogue tari, iri nũgũro pohro waha, “Ñe yeboca,” arĩ waha, “Õari peramaha” waĩcũrogue tuhajabũ. Peramaha Lasea waĩcũri maca pohrogue áribũ.

⁹ Erogue gũa yoari boje áĩra pũhrũ, gũa waboropũ gũhyataribũ. Eropiro erã ba duhurinũ bosenu pũhrũ, Pablo dohodiru majarãre weremi.

¹⁰ —Peegue mũa. Ba duhurinũ bosenu pũhrũ mari wacũ marire mirimaja gũhyataria. Iru dohodiru, dohodiru maja, mũa doberi sã mari mera majarã sã mari dedereboca warã, arĩrimi Pablo.

¹¹ Īgũ eroparĩquerecũ surara opũ dohodiru opũpũre peegu, autugũ sãre peegu, Pablo ĩgũ wereripũre peediabirimi wadiagu.

¹² Erã payari peramaha puhiró áricũ õari payari peramaha áribiribũ. Ero eropa áĩri peramaha áricũ dohodiru majarã bajarã wadiarã, Fenicegue mũriadiarima puhiró waboro core. Fenice Creta waĩcũri nũgũro maja peramaha áĩro, miruñe ero aridirogue abe mũririroguepũ copũgue diayepũgue sãre ĩhabeo miruñe aricũ õaro cãhmotari maca áribũ. Ero eropa áĩri peramaha áricũ masirã erã erogue yuju puhibũgũ áĩrisubu áĩrdiarima.

Wũariyague miruñe, deco wũaro ariyoro

¹³ Eropii docapũ surgue daberogã miruñe arinũgabũ. “Dohpagãre õarinũ mari waburinũ

ãhraa,” arĩ pepiriñorã erã. Miruñe ero aricũ erã comeyere tarawahgũ, Creta nũguro pohrogã m̄ariabũ gua.

¹⁴ Eropii p̄hruñari miruñe gohroto noreste waĩc̄ari miruñe b̄urigã weãbũ.

¹⁵ Eropiro dohodirure miruñe b̄urigã weã erabũ. Miruñe ero weãbeoro wamasibiri, majipa, miruñe mera wabũ gua.

¹⁶ Clauda waĩc̄ari nũgurogã pohroque do-capugue waha, iri nũgurogã guare merogã cãhmotabũ. “Marire yebo ãhraa,” arĩrã erore dohodiru majaru miridirugã gasirure õaro tarapeo diribũ gua.

¹⁷ Irirure dohodirugue gua tarasã diripehora p̄hru w̄arida mera erã waĩnea peoma. Libia yeba t̄uro pohro árĩri imipororire “Iriru gasiru dohodiru iri mehtuhajari,” arĩrã gũi árĩma erã. Eropirã erã miru ñeari suhrire erã aĩdjura p̄hru dohodiru dihtare miruñe weãbeobũ.

¹⁸ Miruñe, deco mera b̄urigã aribũ. Gajinũ sãre miruñe m̄araro ta daja aricũ ãarã erã erã doberire diague duhrimeyura p̄hru taribujabũ gua.

¹⁹ Gajinũ dohodiru majare diague cóãma erã erã basi.

²⁰ Bajan̄ari ñĩpirin̄ari árĩcũ, abe umu majagu necã sã ne deyobirima. Eropiro b̄urigã miruñe aribũ. Eropirã “Miria waha mari. Eropirã s̄iria warãca,” arĩ pepiribũ gua.

²¹ Eropigu Pablo yoari boje erã ba duhura p̄hru ãgu erã core nũgaja, weremi erãre.

—M̄are yu werecũ peebirabũ m̄ua. “Cretague árĩrã mari wacũ gahya árĩca,” ȳahu arĩcũ pee-

birabũ mũa. Yũre peerã, iru maja árĩpehrerire dedeobiriboaya mũa.

22 Eropigũ dohpague mũare werea. Guñaturaque. Eropirã güibiricãque. Árĩpehrerã mari tarirãca. Iru dohodiru dihta marire wahribasaroca.

23 Dohpagã ñamire Goãmũ anyu yũre de-hyoami. Goãmũ yagũ ãhraa yũhũ. Eropigũ ãgũre umupeoa yũhũ. Anyurũ yũ pohro arigũ wereami.

24 “Pablo, güibita. Árĩpehrerã weca opũre mũ iirare mũre werero gahmea. Goãmũ õagũ ãhrimi. Eropigũ ãgũre mũ serẽro dopa ta dohpague mũa mera majarã sãre itamugũcumĩ,” arãmi yũre anyu. Eropirã güibirãta mũa.

25 Anyu yũre ãgũ arĩdiro dopa ta eropa waroca. Goãmũre umupeoa yũhũ. Eropigũ ãgũ werediro dopa ta “Diaye ta ãhraa,” arĩ pepia yũhũ.

26 Marire nũgũrogue miruñe weãbeo cóãroca, arĩ weremi Pablo erãre.

27 Yuju ñami pe semana pũhrũ wũariya Adria waĩcũriya miruñe gũare bũrigã weãbũ. Irisubure ñami deco dohodiru majarã Ʃmapũ “Tũrogue ãhraa mari,” arĩ pepima erã.

28 Erã eropa arĩ pepirã yurada nũcũdiru comerure dihri, duhmiumediju queoñama. Treinta y seis metro gohra Ʃhcãbũ. Mero ta waha, queoma daja. Irisubure veintisiete metro gohra Ʃhcãbũ.

29 Eropirã Ʃtãre mehtuhajari arĩrã dohodiru auturogue wapicũriye comeyerire dirimiu dijuma erã diague dabero wacũ gamerã. Eropirã “Yojaro boyoporo,” arĩrã, bũrigã serẽma erã.

³⁰ Dohodiru majarã ɯmapu erã dihta duhrir-ima. Erã miridirugãre dohodiru majarure di-ague taradijupo dohodiru ïguiru come dipure erã dijudiro dopa ta iirima erã miridirugã marire ïhari arĩrã.

³¹ Erã eropa duhridiaquerecũ Pablo erã eropa iicũ masigu surara opure, ïgu surara mera weremi:

—Oã, ɯma miridirugã mera erã wacũ mua árĩpehrerã sĩrirãca, arĩmi Pablo.

³² ïgu eroparĩcũ peerã surarapu miridirugãre diriridarire wirita, irirure cóãcãma.

³³ Boyoboro coregã Pablo erãre badoremi.

—Pe semana gohra mua ne babeaa.

³⁴ Eropirã dohpaguere barã arique. Eropigu mware badorea. Mua ojocaridiarã baque. Árĩpehrerã mua tarirãca, arĩmi Pablo erãre.

³⁵ ïgu eropa arĩra puhru Pablo panre aĩ, árĩpehrerã erã pohro Goãmure “Õhaa,” arĩ, duhpeo, irire bami ïgu.

³⁶ ïgu eropa bacũ ïha erã sĩporã turarã waha, árĩpehrerã erã sã bama.

³⁷ Gua árĩpehrerã doscientos setenta y seis masa dohodirugue árĩbu gua.

³⁸ Eropirã erã árĩpehrerã yapia waha “Iru dohodiru nucu árĩca,” arĩ, baja trigo barire diague cóãma daja.

Dohodiru imiporogue mehbejayoro

³⁹ Boyocũ dohodiru majarã ɯma nũgurore ïarã, “Õpa waĩcari nũguro ãhraa i nũguro,” arĩ

ĩha masibirima. Eropirã erã dipatũgure imiporo árĩcũ ĩarã, “Mari iritũgugue warã, erogue mehmejaboca imiporogue,” arĩma erã.

⁴⁰ Eropa arĩrã, come dipure diriridarire wiritamedijucãma erã. Erã eropa iira pũhrũ dohodiru ĩguiru maja suhriro aĩ wahgũ nuguma diaye miruñe weãbeocũ gamerã.

⁴¹ Eropiro dohodirupũ ĩguirupũ imiporogue sĩmaja merejamasibiribũ. Eropiro auturore bũrigã pãgũri pamehtucũ iriru auturo wahria wabũ.

⁴² Eropa wacũ ĩarã õpa arĩma surara.

—Iru miricũ mari peresu iinirã tũrogue baatuhaja duhricãrãcoma. Eropirã erãre wejẽpehocãrã, arĩrima surara.

⁴³ Eropigũ surara opũpũ Pabloure wejẽdiabigũ árĩpehrerã peresu árĩrãre wejẽdorebirimi. Eropigũ árĩpehrerã baamasirãre surara opũ mata tũrogue baatujadoremi.

⁴⁴ Eropirã gajirã dohodiru maja wahria mijiri mera yuuriñaja, iri mijiri weca peya baa majama. Gũa eropa iirã gũa árĩpehrerã tũrogue tuhajabũ õaro.

28

Pablo Malta waĩcũri nũgũro árĩpũ

¹ Eropii iri nũgũrogue gũa árĩpehrerã majajanũgajara pũhrũ iri nũgũro waĩre masibũ. Malta waĩcũri nũgũro árĩbũ.

² Iri nũgũro majarã masa õarã árĩrã, õaro iima gũare. Eropirã deco gũa weera pũhrũ

yusatariabũ guare. Eropirã ero majarãpũ peame dihutuhaja, guare sõhmadorema.

³ Pablo peare aĩgãri aĩtiami. Īgũ aĩtĩara pũhrũ iri pea pohecague árdigũ añã coñorpore wirigũ, Pablo mojoto curĩtuhajami yahawearo mariro.

⁴ Īgũ curĩtuhajacũ ĩarã, iri nũgũro majarã erã basi wereniguima:

—Ihĩ masa wejẽdigũ árĩbocumi. Eropigo mari turago dipuwaja moago ɯmaro majago ĩgũre dipuwaja moago, ojocaridorebeamo. Īgũ wũariyague mirigũ tarituhajadigũ árĩrami. Dohpague igo pũ ĩgũre ojocaridorebeamo, arĩrima erã basi.

⁵ Eropigũ Pablo añare peamegue wejẽsiri mehpeomi. Īgũ añã pũribirimi.

⁶ “Bijiroca,” arĩrã, corerima erã. Ne bijibiribũ ĩgũre. “Īgũ sĩria wagũcumi,” arĩrã erã ĩha corerima. Īgũre pũribirimi. Yoari boje ero bijibiricũ ĩarã, ĩgũre pũribiricũ ĩarã, gajiro pa pepirima erã. “Ihĩ goãmarã mera majagũ árĩbocumi,” arĩrima erã.

⁷ Erã baa tuhajadiro pohro Publio waĩcũgũ ya poeri árĩbũ. Īgũ iri nũgũro majagũ opu árĩmi. Eropirã ĩgũ guare õaro iicũ ɯhrenũ gohra ĩgũ ya wihigue árĩbũ gua.

⁸ Publio pagũ yojorocũ, nimacuricũgũ árĩmi. Eropigũ ĩgũ camague oyami. Eropigũ Pablo dorecũgũ ya taribugue ñaja, Goãmãre serẽ, ĩgũ mojotorire ĩgũ weca duhpeo, õagũ wacũ iimi ĩgũre.

⁹ Īgũ õagũ wacũ ĩarã árĩpehrerã gajirã iri nũgũro majarã dorecurãre Pablo pohroque

aĩgãrima. Erã eropa aĩ eracũ ãagũ Pablo erãre õarã wacũ iimi erã sãre.

¹⁰ Pũhrũ erã baja sãre waja mariro oma. Gũa waboro coregã árĩpehreri gũa gamerire, gũa warã gũa baburire dohodirugue durisãbasama erã.

Pablo Romague ejapũ

¹¹ Ûrerã abe iri nũgũrogue gũa árĩra pũhrũ dohodiru mera wabũ gũa daja. Iriru dohodiru ãgũuru perã goãmarã Cástro, Pólux waĩcũrã erã wéanirã niguima. Alejandrĩague aridiru árĩbũ iriru. Puhirópẽ iri nũgũrogue iriru dohodiru payabũ.

¹² Waha, Siracusa waĩcũri macague ejarã, ùhrenũ gohra iri macare árĩbũ gũa.

¹³ Iri macare wiri waha, Regio waĩcũri macague ejabũ gũa. Gajinũ surgue miruñe ahri gũare weãbeobũ. Penũ pũhrũ Puteoli waĩcũri macague ejabũ.

¹⁴ Eroque Jesu yarã bajamerãgã gũare bocatĩrima.

—Yuju semana gohra gũa mera dujaque, arĩma erã gũare.

Erã eroparĩcũ peerã yuju semana gohra erã mera dujanibũ. Pũhrũ mague majaa, Romague ejabũ gũa pare.

¹⁵ Ero majarã Jesu yarãpũ gũa ejarare peerã, Apio waĩcũrogue doberi duarogue gũare bocatĩrima. Gajirã Jesu yarã “Ûhre wihi” waĩcũrogue gũare bocatĩrima erã sã. Erã eropa bocatĩricũ ãagũ Pablo mucubiriri mera Goãmũre “Õhaa,” arĩ, õaro sññaja wami.

16 Romague gua ejara pührü erã peresu erã iinirãre ero majagu peresu corerã opäre weremi. Eropirã Pablopäre yujugu ta apima ero majarã oparã. Eropigu ïgure yujugu surara coremi.

Pablo Romague buherü

17 ðhrenü pührü Pablo judio masa buherã mera gamenerebu, erãre sihumi. Erã gamenerera pührü ïgu erãre weremi:

—Acawererã, mari acawererãre, mari ñecü sumarã erã iimurirare, marire erã buhera sãre tarinugabirimurabü yühü. Yu eropa tarinugabiriquerecũ ta Jerusalén yure ñehama Asia majarã judio masa. Erã eropa iira pührü Roma majarãre yure peresu iidorema erã.

18 Erã eropa iicũ Roma majarã yure serëpi, yühü ñero iibigu yu árĩcũ yure “Dipuwajacügu ährimi,” arĩmasibirama. “¿Ñehe dipuwaja dipuwaja wejëbocuri mari ïgure?” arãma erã yure. Eropirã yure serëpirãpü yure wiudiarama.

19 Judio masapü yure wiudorebirama. Eropigu yu acawererãre judio masare weresãdiabiriqueregu ta, “Árĩpehrerã weca opäre yu iirare diaye werediaca yühü,” arĩ serëabü. Judio masa yure erã wiudorebircũ ïagu “Roma majagu opäre weregu waro gahmea yure,” arãbü.

20 Eropii müare ire werediagu sihuabü. Cristo marire taubu judio masa erã coredigu ïgu yare yu wereri waja yühü peresugue ähraa. Eropigu irire müare werebu sihuabü, arĩmi Pablo judio masa oparãre.

21 ïgu eroparĩcũ peerã erãpü ïgure werema.

—Judio masa mure quere wereripũrire guare ne obeobirama. Eropirã erogue arinirã sã gua acawererã guare mũ eropa warare weribirimurama. Erã “Ígu ñero iigu ãhrimi,” arĩ mure weribirimurama.

²² Mũa ya curure árĩpehrerogue masa erã ñero wereniguicũ gua masia. Eropa masirã mũ buherire mũ wercũ peediaa gua, arĩma erã ígure.

²³ Eropa arĩtuhaja, “Gajinũ árĩrã,” arĩma erã. Gajinũgue Pablo mera gameneremũhtanirã tauro masa bajarã ígu árĩroguere erama. Ñamiñarigã Goãmũ ígu opu árĩrare õari buherire ígu buhenũga, pu ñamigue buhe duhũmi. Goãmũ dorerire Moisegue ígu apirare, Goãmũ ya weremũhtanirã erã gojarare buhemi. Eropa buhegu, erãre Jesure masicũ iidiagu iirimi Pablo.

²⁴ Yujurãyeri ígu buherire gamema. Eropirã gajirãpu peediabirima.

²⁵ Eropirã erã basi pe curu game dũca wari wama. Erã wiriaboro core Pablo Isaia ígu wereniguirare weremi. Ōpa arĩmi erãre:

—Isaia Goãmũ yare weremũhtadigu ígu werera diaye ta ãhraa. Mari ñecũ sumarãre weregu árĩgu Espĩritu Santo Isaiare õpa arĩ were gojadoreñumi:

²⁶⁻²⁷ Ire oãre weregu waque: “Dipu burirã ãhraa mũa. Eropirã yahare peediabees mũa. Gamiri toyobirã dopa ta peediabees mũa. Eropirã yahare peequererã peesome mũa. Mũa eropa árĩbirã õaro peeboaya mũa. Eropirã õaripure gohrotoboaya mũa. Eropigu

mũare peame wabonirãre tauboaya yũhũ,” arĩmi Goãmũ, arĩ gojañumi Isaia, arĩmi Pablo erãre.

²⁸ Ìgũ eropa arĩra pũhrũ Pablo werenemomi:

—Ire masique mũa. Goãmũ buherire masare ìgũ òaro taurire judio masa árĩbirãre buherãca gũa. Erãpũ peerãcoma, arĩmi Pablo judio masare.

²⁹ Ìgũ eroparĩcũ peerã judio masa irire erã basi bũrigã game dũyaso wiriama.

³⁰ Pe bojori gohra Pablo ìgũ eropa wajayeniguri wihigue árĩpũ. Ero árĩgũ, árĩpehrerã ìgũ ya wihigue warãre mucubiriri mera bocatĩrimũripũ ìgũ.

³¹ Eropigũ ìgũ gũiro mariro Goãmũ ìgũ opũ árĩrare, mari Opũ Jesucristo ya sãre buhemũripũ. Ìgũ eropa buhequerecũ ta ne gajirã ìgũre “Buhebircãque,” arĩbiriñorã.

Desano

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source files dated 1 May 2025

17771afc-c309-57fd-9ff3-2d5a0cd59ff1